

## LUCAS REMBICUACHIA JESUS RECOCUER RESENDAR SAN LUCAS

### *Lucas oicuachía Teófilo upe*

<sup>1-2</sup> Imboeteipri Teófilo, setá ava oicuachía yuvireco opacatu aracahendar mbahe imombehupri mboaviyesa cūrítei yande pãhuve co Jesucristo recocuer resendar. Acoi ava yipisuive osepia vahe omombehu tupri vahe Jesucristo recocuer ava upe yuvireco, ahe omombehu tupri avei yuvireco cheu.

<sup>3</sup> Sese che avei opa aseca tupri yipisuive opacatu co mbahe cua tupri água, Teófilo. Ichui che amoin-gatu tupri pota icuachiapri sesendar ndeu nara avei sereco.

<sup>4</sup> Evocoyase nde ereicua tupri ra co porombohesa supi eté vahe acoi nde mbohe agüer.

### *Tũpa rembiguai omombehu Juan Oporoãpiramo vahe ha água*

<sup>5</sup> Yipindar Jesús ha renondeve, Herodes mborerecuar ivi Judea rupindar recose aracahe, ahese aipo judío pahi secoi Zacarías serer vahe. Ahe pahi Abías rupindar secoi. Sembireco aipo pahi Aarón suindar, ahe serer Isabel.

<sup>6</sup> Co ñuvirío secocuer aviye tupri Tũpa upe; viroya tupri opacatu Yar porocuita yuvireco. Evocoyase ndipoi eté que ava “mara” ehi vahe yuvireco chupe.

<sup>7</sup> Zacarías rumo yipisuive ndatahi vahe. Esepia, sembireco ndimembi vahe ité, iyavei oyoya ité ocuacua-cuacuami yuvireco.

<sup>8</sup> Ñepeí ari aipo osupiti icuaita tũparo pipe imboetasa reseve iporaviqui ãgua Tũpa rovaque yuvireco.

<sup>9</sup> Pahi recosa ité ãgüe ehi aracahe suive, ahese iporavosa Zacarías yipindar yasiapri tũparo maranehi pipe oi que vahe ã itaisi rapi ãgua.

<sup>10</sup> Itaisi rapi viteseve aipo, opacatu ava oyerure yuvireco ocãrve.

<sup>11</sup> Aheseve aipo oyemboyecua yande Yar rembiguai itaisi renda maranehi i que coti chupe.

<sup>12</sup> Tũpa rembiguai repiase aipo, oyembosiquiyé iteanga.

<sup>13</sup> Tũpa rembiguai rumo aipo ehiño chupe:

—Zacarías —ehi—, eresiquiye eme. Tũpa osendu nde yeruresa. Sese nde rebireco Isabel imembira ndeu. Ahe nde rahir rer-ra Juan.

<sup>14</sup> Ereviharetera sese, iyavei oyemboviharetera opacatu ava yuvireco nde rahir ohase.

<sup>15</sup> Esepia niha, nde rahir secocuer tuvichara oico Tũpa rovaque. Ndoi hui chietera uva ricuer sai vahe, iyavei que ambuae mbahe sai vahe; secoira rumo Espiritu Santo rese ohañhi viteseve.

<sup>16</sup> ãgüe ehira omonguerẽhi setá ava judío Yar Tũpa reroya iri ãgua oico.

<sup>17</sup> Ahe virecora espiritu pĩratasa oyese oyoyara Tũpa ñehe mombehúsar Elías rese ‘ava guahir rese tiñero yuvireco oyeupe’ oya, ‘toyembohe avei ava ndiporeroyai vahe yuvireco seco catupri vahe aracusa mboyeroya ãgua rese’ oyapave. ãgüe

ehira ava mbohe imoingatu yande Yar pisi ãgua sereco —ehi chupe.

18 Evocoyase,

—¿Mara ahera pĩha aipo reroya? Che rumo acuacuami eté vichico, iyavei che rembireco ocuacuami avei no —ehi Tũpa rembiguai upe.

19 —Aní —ehi chupe—. Che aico Tũpa rembiguai Gabriel, Tũpa rovaingar. Ahe niha che mbou ndeu che ñehe ãgua iyavei co ñehesa aviye vahe mombehu ãgua.

20 Nde rumo ndereroyai acoi amombehu vahe ndeu. Sese co pipe suive ité nandehengatui chira eico. Osupitise voi che remimombehugüer, acoi ohase nde rahir, ahese ramo ndehengatura —ehi aipo Tũpa rembiguai chupe.

21 Osãro pucu tẽi aipo ocarve ambuae imboetasa eta yuvireco. “¿Mahera pĩha nose vitei tũparo pipe sui?” ehi tẽi yuvireco chupe.

22 Osẽse aipo tũparo pipe sui, niñehengatui voi eté. “Ñaro osepia mbahe tũparo pipe” ehiño ité aipo imboetasa eta yuvireco chupe. Ipo ãta-ãta tẽi aipo oñehengatuẽhise mbahe mombehu oico.

23 Ipare omboaviyese ocuaita tũparo pipe, oyevi oso güetave.

24 Coiye aipo sembireco Isabel ipuruha oico. Judío porocuita mboyeroyasave nose iri eté ambuae ava piri poyandepo yasi rupi. Ipihañemoñeta:

25 “Yar Tũpa ité egüe ehi cheu ava che rese ñeheẽhi iri ãgua yuvireco” ehi vorivetsa pipe arac-ahe.

*Tũpa rembiguai Jesús yesu ãgua omombehu*

<sup>26</sup> Coiye seis yasi p̄ipe Tūpa omondo güembiguai Gabriel tecua Nazaret ve ivi Galilea rupi

<sup>27</sup> cuñatai ndaseco marai vahe upe iñehe ãgua; ahe serer María. Ahe omenda pota vahe cuimbahe mborerecuar guasu David suindar José serer vahe rese.

<sup>28</sup> Tūpa rembiguai oi que co cuña rētave aipo ehi chupe:

—¡María, Tūpa nde rovasa, erereco mbahe icatupri vahe p̄itiviisa Yar Tūpa suindar! Tūpa nde rese ité secoi; nde rovasa catu opacatu cuña sui —ehi chupe.

<sup>29</sup> Tūpa rembiguai repiase, “¿Mara oya p̄iha co aipo ehi cheu?” ehi tēi osiquiyepave op̄ihañemoñeta rereco.

<sup>30</sup> Evocoyase Tūpa rembiguai aipo ehi chupe:

—María, eresiquiye eme. Esepia niha, Tūpa ité nde poravo nde rovasa ãgua.

<sup>31</sup> Cūritei voira rumo ndemembira: ererecora nde membri; ahe serer-ra Jesús.

<sup>32</sup> Ahe niha secouvicha catu vaherã secoira; “Tūpa seco ivate vahe Rahir secoi” ehira yuvireco chupe. Iyavei niha Yar Tūpa ité omoinguera mborerecuar guasu seco ãgua inungar tamoi David aracahe.

<sup>33</sup> Mborerecuar guasu secoira judío recua rupi apirēhi vaherã; imborerecuasa niha apirēhi vaherã ité secoira —ehi.

<sup>34</sup> Evocoyase ahe aipo ehi:

—¿Mara ahera vo aipo che membri viña? Esepia niha, ndaico v̄itei vahe cuimbahe rese —ehi Tūpa rembiguai upe.

<sup>35</sup> —Espíritu Santo ogüeyıra nde harive iva quiha nungar; Tũpa güeco pĩratasa pipe nde momembira. Sese acoi ohase nde membri seco maranehi vahe, “Tũpa Rahir” hesara chupe.

<sup>36</sup> Cũritei nde mu Isabel avei ocuacuami pipe imembĩ oico; ahe niha ndimembĩ vahe yipĩndar viña, cũritei rumo vireco seis yasi omembri vie pipe.

<sup>37</sup> Esepia niha, Tũpa upe ndipoi eté mbahe yavai vahe —ehi.

<sup>38</sup> Evocoyase María aipo ehi:

—Che Yar rembiguai aico, tayaviye ayase Tũpa remimbotar cheu nde ñehe rupi —ehi.

Aipo ihe pare, Tũpa rembiguai oyepipi oso ichui.

*María oso omu Isabel piri*

<sup>39</sup> Ahese María oso voi eté ivitri rupi tecua ivi Judea ve.

<sup>40</sup> Aheve aipo Zacarías rēta pipe oiquese oso, oyapo “avirave” omu Isabel upe.

<sup>41</sup> Evocoyase Isabel rie pipe omĩ imembri iñehe renduse. Ahese Espíritu Santo oique Isabel aviterve.

<sup>42</sup> Ipare osapucai pĩrata aipo ehi chupe vorivetesave:

—¡Tũpa nde rovasa cuña opacatu sui, iyavei osovasa nde membri!

<sup>43</sup> Noromohai eté che piri ereyu vaherã viña, che Yar si.

<sup>44</sup> Esepia, cheu “avirave” ereyapose, che membri omĩ voi vorivetesave che rie pipe.

<sup>45</sup> ¡Sovasapri ereico! Esepia, ereroya ité ñehesa ndeundar. Iyavei Tũpa omboaviyera güemimombehu nde rese —ehi Isabel chupe.

- 46 Evocoyase aipo ihese,  
 “Che niha amboetei che Yar vichico;  
 47 cheroriveté Tūpa che Pīsīrosar rese.  
 48 Esepia, ahe omahe che rese che reco yemomin-  
 isa pipe seroyasar che recosave.  
 Co pipe suive, ‘Sovasapri secoi’ ehira opacatu ava  
 yuvireco cheu.  
 49 Esepia niha, Tūpa mbahe mboavaisarēhi, oyapo  
 mbahe tuvichá vahe cheu.  
 ¡Tūpa imboeteipri catu tasecoi yepi!  
 50 Ahe oiparaisuereco opacatu omboeteisar yepi.  
 51 Nomboavai eté mbahe yapo.  
 Osecoreroyi ava oyemboivate ai tēi vahe.  
 52 Viroyi mborerecuar seco pīrata vahe pīratasa  
 sui; ava seco mbegüemi vahe rumo osec-  
 omboivate.  
 53 Ava yaracua pota vahe, omboaracua; ava ‘che  
 aracua vai’ ehi vahe rumo, nomboaracuai  
 eté.  
 54 Oipitivi niha opacatu viroyasareta judío  
 yuvirecoi vahe.  
 Esepia, ndasesarai eté poroparaisuerecosa  
 mondo ãgua  
 55 güemimombehugüer rupi yande ramoi aracahen-  
 dar Abraham upe, ichuindar upe avei yepi no” ehi  
 vorivetesá pipe omu  
 Isabel upe.  
 56 Ipare María opita Isabel piri mbosapi yasi  
 rupi. Ichui oyeví oso güëtave.

*Juan Oporoãpiramo vahe haragüer*

- 57 Osupitise ari Isabel upe, imembira. Ahe  
 imembrí cuimbahemi.

58 Imu iyavei icotindar oyanduse Tūpa rembiapo mbahe aviye vahe, aipo ehi yuvireco chupe: “Aviye ai catu Yar Tūpa secoi co cuña rese” ehi vorivetesave yuvireco.

59 Ocho ari pipe aipo, ahe pītani ombocircuncida yuvireco judío porocuita mboyeroyasa pipe. Ipape aipo omondo pota iyepa Zacarías rer yuvireco sese viña,

60 ichi rumo,

—Aní —ehiño—. Juan itera rumo serer —ehi.

61 —¿Mahera vo? Ndipoi eté rumo nde mu rer aipo nungar —ehi yuvireco chupe.

62 Evocoyase aipo omahe pītani yesupa rese yuvireco ‘¿mbahe pīha ahe omondo pota sererguã viña?’ oyapave yuvireco.

63 Evocoyase aipo iyepa oporandu ivirapemi rese sese serer oicuachía vaherã. Ahe serer oicuachía: ‘Juan sererguã’ ehi imoi. Ahese aipo opacatu ava: “¿Mara ehi rutei pīha co?” ehi tēi oyeupe yuvireco.

64 Ahese ramo Zacarías iñehengatu, omboipi Tūpa upe osapucái oico.

65 Opacatu aipo sēta cotindar oyembosiquiye tēi yuvireco, iyavei aipo opacatu Judea recuarupi omombehu-mbehu mbahe osepia vahecuer yuvireco.

66 Mbahe osendu vahecuer rese avei aipo oporandu-randu oyeupe yuvireco: “¿Mbahe pīha aipo pītani oyapora curi?” ehi. Esepia niha, supi eté Tūpa osovasa.

### *Zacarías sapucái agüer*

67 Zacarías, Espiritu Santo pīratasa pipe, oñehe Tūpa oyeupe ñehesa pipe aipo ehi:

- 68 “¡Yande Yar Tūpa imboeteipri tasecoi!  
 ¡Esepia niha, ahe ou yande judío yaico vahe pĩsĩro  
 āgua!
- 69 Ombou niha Poropĩsĩrosar güembiguai David  
 suindar yandeu.
- 70 Ëgüe ehi imombehu opacatu oñehengagüer  
 mombehusar seco maranehi vahe upe  
 aracahe.
- 71 Ahe yande pĩsĩrora yande amotarẽhimbar sui.
- 72 Ëgüe ehi Tūpa imbou oporoparaisuerecosa  
 yande ramoi aracadendar upe, iyavei  
 iyemomahenduha āgua güemimbotar  
 maranehi mombehu agüer rese.
- 73 Evocoiyase, ‘Che supi eté ayapora evocoi  
 mbahe’ ehi yande ramoi Abraham upe  
 aracahe
- 74 yande renose āgua yande amotarẽhimbar  
 povri sui ‘tache mboetei osiquiyeẽhisa pĩpe  
 yuvĩreco’ oya;
- 75 ‘toyuvĩrecoi che rembiepiave güeco ñvisa pĩpe  
 iyavei güeco maranehisa pĩpe ari yacatu  
 rupi’ oyapave.
- 76 Nde, che rahĩr, ‘Co Tūpa ivate vahe ñehe mombe-  
 husar secoi’ ehira ava yuvĩreco ndeu.  
 Esepia, nde eremoingatura ava recocuer Yar pĩsĩ  
 āgua senondeve eico.
- 77 Supi eté nde niha eremboyecuara opacatu ava  
 Tūpa upendar yuvĩrecoi vahe upe angaipa  
 sui ñeroisa pĩsĩ āgua ñnepĩsĩro āgua.
- 78 Esepia, yande Ru Tūpa, oporoparaisuerecosa  
 pĩpe ombou oporoesapesa iva pendar yan-  
 deu yande reco mbopiasu āgua



79 iyavei ava Tũpa cuaparẽhi resape ãgua  
‘toyuvirecoi mbahe tupri pipe’ oyapave.

Esepia, ahe inungar ava pĩtumimbisave yuvirecoi  
vahe, ocañi tẽi vaherã yuvireco”

ehi Zacarías.

80 Ichui pĩtani ocuacua iyavei vireco pĩratasa  
Espíritu suindar oyese. Ipare rumo oso oyem-  
boerecua ivi iporupirẽhi rupi. Coiye oyemboyecua  
omu Israel pendar upe oico.

## 2

### *Jesús yesu agüer*

1 Yipindar mborerecuar guasu Augusto  
oporocuai oico, “Tayecuachiasa opacatu tecua  
rupi” ehi.

2 Ahe yipindar yecuachiasa mborerecuar Cire-  
nio, Siria pendar rẽise.

3 Opacatu ava yuviraso güecua yacatu rupi oye-  
cuachía ãgua yuvireco.

4 Sese José avei osẽ Nazaret, Galilea ivi rupi  
sui oso ivi Judea rupindar tecua Belén ve. Es-  
epia niha, aracahendar mborerecuar guasu David  
aheve oha vahecuer, iyavei José ichuindar avei  
secoi.

5 Ëgüe ehi oyoya yuviraso güembirecovi María  
rese oyecuachía ãgua. María rumo imembira pota  
ité oico.

6 Aheve oyepota ramose, osupiti ari imembira  
ãgua.

7 Aheve oha imembri yipindar vahe cuimba-  
hemi. Ahese María oyao omembri turucuar pipe,  
ëgüe ehi imoñeno imondo mbahe mimba rembihu

riru pipe. Esepia niha, ndoyosui eté oque ãgua aheve yuvireco.

*Tũpa rembiguai eta omombehu Jesús haragüer ovesa rãrosar upe yuvireco*

<sup>8</sup> Namombriimi Belén sui ovesa rãrosar yuvirecoi. Aheve osãro ovesa pĩtu pipe yuvireco.

<sup>9</sup> Aviyeteramo tẽi oyemboyecua Tũpa rembiguai iva pendar chupe. Tũpa porañetesa avei sendi yivii chupe yuvireco. Ahe sepiase, oyembosiquiyé iteanga tẽi yuvireco ichui.

<sup>10</sup> Ahe rumo aipo ehi chupe: “Pesiquire eme. Esepia, che ayu mbahe icatupri vahe mombehu ãgua pẽu pe mbovĩharete ãgua iyavei opacatu ava mbovĩharete ãgua avei no.

<sup>11</sup> Co pipe oha David recua Belén ve Poropĩsirosar pẽu nara. Ahe niha Tũpa Rembiporavo, pe Yarguã secoi.

<sup>12</sup> Icuã ãgua peyosura pĩtani yaopri tupriimi vahe tui mbahe mimba rembihu riru pipe” ehi.

<sup>13</sup> Aviyeteramo tẽi oyemboyecua ambuae setá Tũpa rembiguai iva pendar yivii yuvireco. Tũpa upe osapucái yuvireco aipo ehi:

<sup>14</sup> “¡Imboeteipri tasecoi Tũpa ivave!  
ĩvive ava Tũpa rembiaisu toyuvirecoi tupri oyeaisusa pipe!” ehi osapucái yuvireco.

<sup>15</sup> Opase oyevi Tũpa rembiguai ivave yuviraso, ahese ovesa rãrosar aipo ehi oyeupe yuvireco:

—Yaso ru Belén ve; yasepiara aipo mbahe, acoi oicua uca vahe Yar oico yandeu —ehi yuvireco.

<sup>16</sup> Evocoyase ipoyava yuviraso. Ipare osepia María, José, Jesús pĩtani avei yuvireco cute. Ahe

pītani omoñenomi mbahe mimba rembihu riru pipe ino.

17 Ipare yuvínose omombehu-mbehu ambuae ava upe Tūpa rembiguai remimombehugüer pītani resendar ñehesa yuvireco.

18 Evocoyase opacatu ava oyepihamondi co ñehesa renduse yuvireco.

19 María rumo opacatu co mbahe rese oyapisacaño; ahe ehiño ité ipihañemoñetasa.

20 Oyevise ovesa rārosar yuviraso, omboetei iyavei osapucaí Tūpa upe yuvireco. Esepia niha, opacatu mbahe osendu vahe, osepi vahecuer yuvireco imombehupri rupi tupri ité.

*Jesús pītani seropovēhesa Tūpa upe tūparo pipe*

21 Ocho arí pipe ahe pītani ombocircuncida yuvireco; omondo sererguã Jesús yuvireco, ahe terer tupri avei acoi Tūpa rembiguai omombehu María upe imembiēhi viteseve.

22 Ipare omboaviyese ohari güetave oñemoatiro ãgua, ahe aipo ēgüe ehi Moisés porocuita rupi yuvireco yepi, ahese vínose pītani seraso tecua guasu Jerusalén tūparo pipe seropovēhe ãgua Yar upe yuvireco.

23 Ēgüe ehi yuvireco. Esepia, Yar porocuita aipo ehi icuachiapri pipe aracahe: “Opacatu yipindar pītani cuimbahe mini yuviroha vahe ipehasara Tūpa upe nara yepi” ehi.

24 Yuviraso oporerecosa reropovēhe ãgua yuvireco yande Yar porocuita rupi: “Ñepeí oyovaichor reseve picuhi, anise ñuvirío apicasu peropovēhera” ehi vahe.

<sup>25</sup> Ahe pipe mbia Jerusalén ve secói Simeón serer vahe. Ahe mbia aviye etepri vahe. Oyerure vahe Tūpa upe, osāro vahe avei Israel recua pendar Pīsirosar imombehupri. Ahe secói vahe ité Espíritu Santo rese.

<sup>26</sup> Ahe chupe Espíritu Santo opa uca oicua “eresepia rane itera Poropīsirosar Tūpa remimbou nde mano renondeve” ehi vahe.

<sup>27</sup> Ahe ari pipe Espíritu Santo viroguata tūparove. Oyepotase José, María reseve yuvireco tūparove Jesús pītani reropovēhe āgua Tūpa porocuita rupi tupri,

<sup>28</sup> ahese Simeón oyemboya oso sese, osupi ichi sui, viroyeroqui Tūpa upe señoa aipo ehi:

<sup>29</sup> “Che Yar, cūrítei che, nde rembiguai, amano tupriño itera.

Esepia niha, nde remimombehugüer eremboaviye ité cheu.

<sup>30</sup> Asepia ité niha Poropīsirosar vichico cute.

<sup>31</sup> Nde niha erembou opacatu ava rembiepiave.

<sup>32</sup> Ahe niha poroesapesa ité secói.

Esepia, omboyecudara mbahe supi eté vahe ava ndahei vahe judío yuvirecoi vahe upe, iyavei omondara poromboeteisa nde recua Israel pendar judío yuvirecoi vahe upe” ehi oyerokeri.

<sup>33</sup> José iyavei María ndoyembovihai tēi yuvireco pītani rese Simeón yeroqui renduse.

<sup>34</sup> Evocoiyase Simeón osovasa ahe pītani iyésupa reseve. Ipare aipo ehi ichi María upe:

—Esendu, co pītani reroyaēhisa pipe setá yande mu judío oviapira mbahe tēi pipe yuvireco; ambuae rumo seroya pipe sovasapri yuvirecoira.

Ahe avei omboyecuara mbahe ava upe. Amove rumo viroĩroñora yuvireco.

<sup>35</sup> Ipípe sui ava pihañemoñetasa icuasara curi. Iyavei co opacatu mbahe tasira nde pihá pípe inungar quise pucu osasara nde pihá viña —ehi chupe.

<sup>36</sup> Aheve avei cuña cuacuami yaracua vahe secói, ahe serer Ana, Fanuel rayri, Aser suindar. Ocuñataimiseve rumo omenda, iyavei secói raimi tēi omer rese siete araviter rupive.

<sup>37</sup> Cūrítei secói omer mano pare ochenta y cuatro araviter. Nosei eté tūparo pípe sui oico. Ēgüe ehi yande Yar mboetei pĩtu, arí rupi oyecuacusa pípe iyavei oyeruresa pípe avei oico no.

<sup>38</sup> Ahe evocoyase ahesa reseve avei ou pītani upe, “Aviye ndeu” ehi Tūpa upe. Ipare oñehe secocuer rese opacatu ava Jerusalén pendar osãro vahe güecua pĩsĩro ãgua upe oico.

### *Jesús pītani reroyevi agüer Nazaret ve*

<sup>39</sup> Evocoyase opacatu Moisés porocuita mboaviyere, opa oyevi Galilea pendar güecua Nazaret ve yuvireco.

<sup>40</sup> Ahese pītani ocuacua catumi imbahecua-ecua irimi eté oico iyavei ipĩrata catu irimi. Esepia, Tūpa osovasa ité sereco no.

### *Jesús chĩhivahe tūparo pípe secói*

<sup>41</sup> Iyesupa yuvĩraso araviter yacatu Jerusalén ve Pascua pieta repia yepi.

<sup>42</sup> Jesús doce araviter virecose, ahese viraso iyesupa Jerusalén ve oyeupi pieta repia yuvireco. Esepia, ãgüe ehi eté judío recocuer pietase yuvireco yepi.

<sup>43</sup> Ahe pieta pare voi, oyevise yuvireco güecosave, ahese Jesús opitaño Jerusalén ve; ichi rumo iyavei tu José ndoicuai eté ipitase yuvireco.

<sup>44</sup> “Ouño revo ava pãhu rupi” ehi yuvireco chupe viña; aipo ehiño ité ñepei ari pipe yuvireco chupe. Oseca tãise rumo omu pãhu rupi, iyavei omboripar pãhu rupi avei no,

<sup>45</sup> ndoyosui eté yuvireco. Ahese oyevi iri tãe Jerusalén ve seca yuvireco.

<sup>46</sup> Imombosapisa ari pipe oyosu ramo tũparo pipe yuvireco. Aheve uguapi ava Tũpa porocuaita rese oporombohe vahe pãhuve oĩ; oyapisaca iñehe rese iyavei oporandu-randu ahe ava upe Tũpa Ñehengagüer rese oĩ.

<sup>47</sup> Evocoiyase opacatu ava ndoyembovihai tãe imbahecua vaisa rese yuvireco. Esepia, oporanduse mbahe rese yuvireco chupe, omboyevi tupri voi-voiño ité ñehesa.

<sup>48</sup> Oyosuse iyesupa, oyepihamondii yuvireco. Ahese ichi aipo ehi chupe:

—Che membri, ¿mahera vo ãgüe ere eico oreu? Nde recasa tãe opacatu rupi, ore mopihañemoñeta ati uca eve —ehi.

<sup>49</sup> Evocoiyase,

—¿Mahera vo che reca co coti rupi tãe peye peico? ¿Ndapeicuai vo che Ru rãta pipe aico vaherã? —ehi osi upe.

<sup>50</sup> Iyesupa rumo ndosenducuai eté aipo oyeupe hesa yuvireco.

<sup>51</sup> Evocoyase oyevı Nazaret ve oso supı. Aheve omboyeroyaño ité oyesupa. Ichi niha opacatu co mbahe rese oyapısacaño ité.

<sup>52</sup> Ahese Jesús ocuacua-cuacua iri, iyetei catu avei imbahecua catu iri avei oico no. Secoi tuprı ai eté Tũpa upe iyavei ava eta upe avei no.

### 3

*Juan Oporoãpiramo vahe secoi ivi iporupırēhisa rupi*

<sup>1</sup> Quince aravıter pıpe mborerecuar guasu Tiberio recose, Poncio Pilato evocoyase mborerecuar secoi Judea rupi, Herodes avei mborerecuar secoi Galilea ve, tivrı Felipe evocoyase mborerecuar secoi Iturea ve iyavei Traconite ve, Lisantias avei mborerecuar secoi Abilinia ve.

<sup>2</sup> Anás iyavei Caifás ahe pahi rerecuar ivate catu vahe yuvırecoi. Ahese Tũpa, “Emombehu che ñehe ava upe cute” ehi Zacarías rahır Juan upe oico ivi iporupırēhısave.

<sup>3</sup> Juan evocoyase oso opacatu iai Jordán ivi oico, supı aipo ehi ava upe: “Pemboası pe angaipa, peyevı Tũpa upe, ahese opoãpiramora Tũpa pēu ñero ãgua pe angaipa rese” ehi.

<sup>4</sup> Co yaviye ité Tũpa ñehe mombehusar Isaías rembicuachiagüer pıpendar aipo ehi vahe:

“Sendusa ivi iporupırēhısave ava sapucaisa aipo ehi vahe:  
‘Pemoingatu yande Yar raperã, pemohıvi tuprı avei’ ehi.

<sup>5</sup> ‘Evocoyase opacatu ivısocuer opara imboapıposa chupe, opacatu ivıtri ivate

vahe iyavei ivitri mini opara imboyoyasa tupri no.

Acoi peri ipãri vahe, ahe imohivisapara; peri ipicucu ati vahe opara imboapiposa tupri chupe.

<sup>6</sup> Iyavei opacatu ava osendura ñehesa pĩsirosa re-sendar Tũpa remimbou yuvireco cute' ehi vahe" ehi.

<sup>7</sup> Ava rehii yuvinosepa chupe 'tayande ãpiramo' oyapave yuvireco viña. Ahe rumo aipo ehi: "¡Pe mboi mboetasa tẽi peico! ¿Ava vo, 'Pesẽra Tũpa ñemoirosa ou vaherã sui' ehi tupri tẽi pẽu?"

<sup>8</sup> Yipindar toyecua tupri rane yande Yar upe peyevisa pe angaipa mboasisa pipe. Iyavei ndapeyeroyai chira 'ore Abraham suindar oroico' pe hesa rese tẽi peñepisiro ãgua. Esepia, Tũpa oicatuño ite co ita sui Abraham suindar nungar tupri apo ãgua oyeupe nara yepi.

<sup>9</sup> Hacha niha imoingatusa voi ete opacatu ivira iha naporai vahe sapo rupi yasia ãgua yepi. Yasiapri evocoyase imondosapara tatave" ehi.

<sup>10</sup> —¿Mbahe pĩha evocoyase oroyapora ore recocuer recuñaro ãgua oroico? —ehi ava rehii oporandu yuvireco chupe.

<sup>11</sup> —Pe pereco vahe ñuvirio pe camisa, ñepeí pemondo ava ndovirecoi vahe upe; iyavei pe pereco vahe tembihu, pemboyahomi tẽi ambuae ava ndovirecoi vahe upe —ehi imboyevi ava upe.

<sup>12</sup> Yugüeru avei moviro ava sui guarepochi rerocuasar 'tayande ãpiramo' oyapave yuvireco. Ipare oporandu Juan upe mbahe rese yuvireco:

—Porombohesar, ¿mbahe vo ore oroyapora Tũpa rupi ore guata ãgua oroico? —ehi yuvireco chupe.



<sup>13</sup> Evocoiyase aipo ehi ahe ava yuvirecoi vahe upe:

—Aní perocua catu iri guarepochi p̄eu imombehusa sui —ehi.

<sup>14</sup> Iyavei amove sundao oporandu mbahe rese yuvireco chupe:

—Ore no, ¿mbahe vo ore oroyapora? —ehi.

—Ndaperocuai chietera que mbahe ambuae ava sui, ndapeñehe-ñehe t̄ei chira ava upe sembiapoēhi rese, iyavei peyembovihanora pe poraviqui repri rese —ehi sundao upe.

<sup>15</sup> Ava rumo, “¿Ndahei p̄iha co Porop̄isirosar s̄arombri secoi?” ehi t̄ei Juan upe yuvireco.

<sup>16</sup> Juan rumo aipo ehi opacatu ava upe: “Che opoãpiramo i pipe t̄ei; oura rumo ambuae che raquicuei, ahe pe ãpiramora Esp̄iritu Santo tata nungar pipe. Ahe seco p̄irata catu vahe secoi che sui. Sese cheu ndiyai eté ahe ipitaquisã yora ãgua ichui” ehi.

<sup>17</sup> “Ahe güeru trigo mbovevesa ihigüer sui ipeha ãgua. Sãhi evocoiyase yapocatusa, ihigüer rumo imondosa tata apir̄ehi vahesave” ehi ava upe.

<sup>18</sup> Omombehu-mbehu vite ñehesa aviye vahe ava upe ‘toyemonguer̄ehi güecocuer recuñaro ãgua yuvireco’ oya.

<sup>19</sup> Ipare rumo Juan oñehe p̄irata mborerecuar Herodes upe secocuerai rese. Esepia, vivri Felipe rembireco Herodías rese secoi, iyavei setá ambuae mbahe naporai vahe sembiapo.

<sup>20</sup> Sese Herodes oyapoño ambuae mbahe t̄ei: seroyaẽhisa pipe osoquenda ucaño Juan sereco.

*Jesús ãpiramosa*

21 Yipindar rumo voquenda viteẽhiseve Juan oñapiramo setá ava oico, aheseve avei oñapiramo Jesús. Jesús yerure viteeseve, aviyeteramo tẽi oyemboi tupri iva.

22 Ipare Espíritu Santo ogüeyi ou iharive apicasu nungar, iyavei oyeendu ñehesa iva sui aipo ehi vahe:

—Nde che Rahir ereico, che rembiaisu; sese aviha ité nde rese —ehi.

*Ava eta oyesu vahe Jesucristo yesu renondeve*

23 Jesús virecose treinta araviter, ahese ramo omboipi oporombohe. Ahe icuapri vahe ité José rahir secose viña. José Elí rahir secoi,

24 Elí evocoyase Matat rahir, ahe Matat evocoyase Leví rahir, Leví evocoyase Melqui rahir, ahe Melqui evocoyase Jana rahir, Jana evocoyase José rahir,

25 ahe José Matatías rahir, Matatías evocoyase Amós rahir, ahe Amós evocoyase Nahúm rahir, Nahúm evocoyase Esli rahir, ahe Esli Nagai rahir,

26 Nagai evocoyase Maat rahir, ahe Maat Matatías rahir, Matatías evocoyase Semei rahir, ahe Semei evocoyase Josec rahir, Josec evocoyase Judá rahir,

27 ahe Judá Joanán rahir, Joanán evocoyase Resa rahir, ahe Resa evocoyase Zorobabel rahir, Zorobabel evocoyase Salatiel rahir, ahe Salatiel Neri rahir,

28 Neri evocoyase Melqui rahir, ahe Melqui Adi rahir, Adi evocoyase Cosam rahir, Cosam evocoyase Elmadam rahir, Elmadam evocoyase Er rahir,

<sup>29</sup> ahe Er Jesús rahir, Jesús evocoyase Eliezer rahir, ahe Eliezer Jorim rahir, Jorim evocoyase Matat rahir,

<sup>30</sup> ahe Matat Leví rahir, Leví evocoyase Simeón rahir, ahe Simeón evocoyase Judá rahir, Judá evocoyase José rahir, ahe José Jonam rahir, Jonam evocoyase Eliaquim rahir,

<sup>31</sup> Eliaquim Melea rahir, ahe Melea Mena rahir, Mena evocoyase Matata rahir, ahe Matata evocoyase Natán rahir,

<sup>32</sup> Natán David rahir, ahe David evocoyase Isaí rahir, Isaí Obed rahir, ahe Obed evocoyase Booz rahir, Booz Sala rahir, ahe Sala evocoyase Naasón rahir,

<sup>33</sup> Naasón Aminadab rahir, ahe Aminadab evocoyase Admin rahir, Admin evocoyase Arni rahir, Arni evocoyase Esrom rahir, ahe Esrom evocoyase Fares rahir, Fares evocoyase Judá rahir,

<sup>34</sup> ahe Judá Jacob rahir, Jacob evocoyase Isaac rahir, ahe Isaac Abraham rahir, Abraham evocoyase Taré rahir, Taré evocoyase Nacor rahir,

<sup>35</sup> ahe Nacor Serug rahir, Serug evocoyase Ragau rahir, ahe Ragau evocoyase Peleg rahir, Peleg Heber rahir, ahe Heber evocoyase Sala rahir,

<sup>36</sup> Sala Cainán rahir, ahe Cainán evocoyase Arfaxad rahir, Arfaxad evocoyase Sem rahir, ahe Sem evocoyase Noé rahir, Noé evocoyase Lamec rahir,

<sup>37</sup> ahe Lamec Matusalén rahir, Matusalén evocoyase Enoc rahir, Enoc evocoyase Jared rahir, ahe Jared Mahalaleel rahir, Mahalaleel evocoyase Cainán rahir,

<sup>38</sup> ahe Cainán evocoyase Enós rahir, Enós evo-

coiyase Set rahır, ahe Set Adán rahır, Adán evocoyase Tũpa rahır.

## 4

### *Jesús recoãhasa*

<sup>1</sup> Jesús Espíritu Santo rese ité secoi. Ahe osẽ iai Jordán sui oso. Ipare Espíritu viroguata ivi iporupirẽhisa rupi.

<sup>2</sup> Aheve cuarenta ari secoise Caruguar osecoãha. Ndocarui avei oico. Sese ndasiepoi eté.

<sup>3</sup> Caruguar evocoyase aipo ehi chupe:

—Tũpa Rahır ité nde recose, co ita sui eyapo pan cũritei —ehi.

<sup>4</sup> Evocoyase Jesús omboyevi chupe:

—Che Ru ñehe rumo icuachiapri pipe aipo ehi: ‘Ndahei chira pan suiño ava yuvirecovera’ ehi —ehi Caruguar upe.

<sup>5</sup> Ipare Caruguar viraso ivate vahesave. Aheve ñepei reseve opacatu ava-ava tẽi mborerecuasa ivi pipendar omboyecua chupe.

<sup>6</sup> Ipare aipo ehi chupe:

—Che amondora opacatu ivi rupindar mborerecuar pĩratasa iyavei mbahe porañete vahe nde povrive. Esepia niha, co opacatu cheu imboupri; iya ité amondo vaherã ava upe che remimbotar rupi.

<sup>7</sup> Acoi ereñenopihase cheu che mboetei ãgua, ahese opacatu co mbahe ereipisira nde mahera —ehi tẽi Caruguar chupe.

<sup>8</sup> —Icuachiapri pipe rumo: ‘Emboetei nde Yar Tũpa, ahe güeraño tupri avei eremboyeroyara’ ehi —ehi Caruguar upe.

9 Ipare Caruguar viraso oyeupi tecua guasu Jerusalén ve. Aheve oviroyeupi tũparo apĩterve. Aheve Caruguar aipo ehi chupe:

—Tũpa Rahír ité nde recose, eviapi cohave sui.

10 Esepia niha, icuachiapri pĩpe:

‘Tũpa oyocuaire güembiguaí eta nde rãro ãgua.

11 Ahe nde mopuhara yuvireco que ñepei ita nde momara rãgüer sui’ ehi —ehi Caruguar chupe.

12 Evocoyase omboyevi Caruguar upe:

—¡Aní! Icuachiapri pĩpe niha aipo ehi avei: ‘Ndereseoãhai chira nde Yar Tũpa’ ehi —ehi chupe.

13 Ahese Caruguar ndoicatu iri eté Jesús recoãha ãgua oico. Ipare oyepepiño raimi tẽi oso ichui.

### *Jesús omboipi oporombohe Galilea rupi*

14 Jesús, Espíritu Santo reco pĩratasa pĩpe, oyevi oso Galilea ve. Ipare serãcua oguata opacatu tecua-tecuami rupi.

15 Esepia, ahe oporombohe judío tũparo pĩpe oico. Ahese opacatu ava omboetei yuvireco.

### *Jesús oyevi Nazaret ve*

16 Ichui Jesús oyevi Nazaret ve ocuacua agüerve. Aheve judío mbĩtuhusa arĩ pĩpe oi que tũparove inungar oyapo yepi. Ahese opũha ‘tayeroqui icuachiapri maranehi pĩpe’ oya.

17 Evocoyase tũparo rese ñangarecuar pĩtiviisar omondo Tũpa ñehe mombehusar Isaías rembicuachía chupe. Oyorase ahe cuachiar, oyeroye qui icuachiapri aipo ehi vahe pĩpe ohã:

18 —“Yar Espíritu secoi che rese.

Esepia niha, ahe ombou che cuaitarã cheu co ñehesa aviye vahe mombehu ãgua ava iparaisu vahe upe.

Che cuaita avei ava mbahe-mbahe tẽivriye yuvirecoi vahe senose ãgua ichui, iyavei ava ndasesapisoï vahe ambosarecora; iyavei che cuaita ava mbahe-mbahe tẽi rasicuer oiporara vahe sui senose ãgua,

<sup>19</sup> iyavei ‘cũritei Yar oyemoingatu oporovasasa mondo ãgua pẽu’ he ãgua” ehi icuachiapri pipe

—ehi oyerogui.

<sup>20</sup> Sese oyerogui pare, oyapoapipa cuachiar imondo tũparo rese ñangarecuar pitivisar upe. Ipare oguapi oĩ ava rembiepiave. Ahese opacatu tũparo pipendar omahe ati yuvireco sese.

<sup>21</sup> Evocoiyase ahe oñehe aipo ehi:

—Cũritei yaviye co icuachiapri pipendar opacatu pe rovaque —ehi.

<sup>22</sup> Opacatu ava oñehe tupriño ité yuvireco sese. Ndoyembovıhai tẽi iñehe tupri renduse yuvireco. Oporandu-randu rumo yuvireco oyeupe:

—¿Ndahei vo acoi co José rahır tẽi? —ehi yuvireco chupe.

<sup>23</sup> Ahe rumo aipo ehi ava upe:

—Pe aipo peyera cheu: ‘Oporombogüera vahe, eñeposano nde ae eico’ peyera. Ipare aipo peyera cheu: ‘Acoi orosendu vahe nde rembiapogüer Capernaum pipe, ãgüe ere avei eyapo cohawe nde recua pipe ité’ peyera cheu —ehi.

<sup>24</sup> —Supi eté, ndipoi eté niha que ñepeï yepe Tũpa ñehe mombehusar oipisi tupri vahe güecua pipe yuvireco yepi.

<sup>25</sup> Supi tupri ité Tũpa ñehe mombehusar Elías recose, iñehe rupi tupri ndoquii eté mbosapi araviter yemombitesa rupi oico. Sese oime tiavor opacatu Israel ivi rupi aracahe. Ahese setá etepri cuña imer mano vahecuer oime Israel recua rupi viña,

<sup>26</sup> Tũpa rumo nomondoi Elías cuña imer mano vahecuer Israel pendar upe ipĩtivii ãgua. Ëgüe ehi rumo omondo cuña ndahei vahe Israel pendar ipĩtivii ãgua. Ahe cuña tecua Sarepta pendar, ahe Sarepta Sidón ñipiimindar.

<sup>27</sup> Iyavei setá ava oime Israel recua pipendar imbaheasi vahe lepra rerecosar yuvireco evocoi Tũpa ñehe mombehusar Eliseo recose. Evocoi ava yuvirecoi vahe rumo ndipoi eté que ñepeu ocuera vahe yuvireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi —ehi ava upe.

<sup>28</sup> Ahese opacatu ava judío tũparo pipendar oñemoiró iteanga yuvireco sese aipo mbahe renduse.

<sup>29</sup> Sese opa voi eté opũha Jesús reraso ãgua tecua pipe sui ivitri ivi socuerve yuvireco, ahe iharive tecua yaposa. Ahe ichui oiti pota yuvireco viña.

<sup>30</sup> Jesús rumo ipãhu sui osẽ tupriño oso.

*Jesús ombogüera mbia carugar vireco vahe oyese*

<sup>31</sup> Ichui Jesús oso Capernaum ve, ahe tecua Galilea rupindar. Aheve ombohe ava oico mbituhusa ari pipe.

<sup>32</sup> Ipare opacatu ava, “¡Mara ehi rutei!” ehi tẽi iporombohesa renduse yuvireco. Esepia niha, ahe oñehe güeco pĩratasa pipe.

<sup>33</sup> Aheve judío tũparo pĩpe oime mbĩa vĩreco vahe carugar oyese, ahe oñehe pĩrata Jesús upe:

<sup>34</sup> —¡Ore mañeco tẽi eme eve! ¡Mahera ereyuño tẽi cohave oreu, nde, Jesús Nazaret pendar! ¿Ereyu vo ore mocañi ãgua tẽi? Che orocua ité. Nde niha seco maranehi vahe ereico Tũpa suindar —ehi chupe.

<sup>35</sup> Evocoyase,

—¡Quiriri, esẽ co mbĩa sui! —ehi oñehe pĩrata carugar upe.

Ahese carugar omboviapi ahe mbĩa ava rovai, osẽ ocua ichui; nomomarai eté rumo.

<sup>36</sup> Opacatu ava oyembosiquiye, iyavei oporandu-randu tẽi mbahe rese oyeupe yuvireco:

—¿Mara ehi vo aipo oñehe oico? ¡Esepia, co mbĩa opĩratasa pĩpe oyocuai carugar ava sui imose ãgua! —ehi yuvireco.

<sup>37</sup> Sese Jesús rerãcua oyandu opacatu tecua-tecuami ivirindar yuvireco.

### *Jesús ombogüera Simón Pedro rembireco si*

<sup>38</sup> Evocoyase Jesús osẽ judío tũparo pĩpe sui oso, oique Simón Pedro rõtave. Simón rembireco si sohi iteanga ou. Evocoyase oñehe ahe pendar sese Jesús upe ‘tombogüerami tẽi’ oyapave yuvireco.

<sup>39</sup> Evocoyase Jesús oyeaivi oso chupe sohi sui imbogüera ãgua. Ocuera pare voi ahe cuña oñarapuha; ohañeco ahe ava yuvirecoi vahe rese.

### *Jesús ombogüera setá ava imbaheasi vahe*

<sup>40</sup> Ari so ramomise opacatu ava imbaherasisa ambuae tẽi vahe güeru Jesús upe yuvireco. Ahe evocoyase opo omondo iyacatu iharive ñepeipei imbogüera.



41 Iyavei setá ava sui opa omose caruguar. Evo-coiyase caruguar osapucaí tēi aipo ehi yuvireco:  
—¡Nde acoi Tūpa Rahir ité ereico! —ehi.

Ahe rumo oñehe pĩrata caruguar upe, nomoñehe iri. Esepia niha, caruguar oicua ité ahe Tūpa Rembiporavo seco rese yuvireco.

*Jesús oporombohe judío tũparo rupi oico*

42 Ahere ayihive cõhe ramomise, Jesús osẽ tecua pĩpe sui, oso ivi iporupirẽhisave. Ava rumo oseca-secaño ité yuvireco; osupitiño ité secosave yuvireco. Oipota ahe oyesui ichoẽhi ãgua ité yuvireco vinã.

43 Ahe rumo aipo ehi ava eta upe:

—Tamombehu rane catu ambuae tecuave avei ñehesa aviye vahe Tūpa mborerecuasa resendar ava upe. Esepia, aherã niha che mbousa —ehi.

44 Ëgüe ehi Jesús oguata oporombohe Judea tũparo rupi oico.

## 5

*Pira mboha ati agüer*

1 Ñepei ari Jesús secoi ipa Genesaret popi rupi. Aheve ava rehii oyepota yuvireco chupe, oyere ati yuvireco sese. Esepia niha, ahe osendu pota ité Tūpa Ñhengagüer yuvireco.

2 Aheve oime ñuvirío carite imbehi popive. Ahe ava pira mbohasar opa yuvinose evocoi carite pĩpe sui yuvireco. Ipare opira mbohasa oyosei yuvinoi.

3 Evocoyase Jesús osepiase, oha Simón carite pĩpe iyavei aipo ehi chupe: “Tosiri catumi tēi chĩhi

coi coti ïai popi sui” ehi. Ipare oguapi oĩ carite pĩpe. Aheve ombohe ava cute.

<sup>4</sup> Oñehe pare aipo ehi Simón upe:

—Yaso ipa tip̃i catu vahesave. Aheve erembohara pira —ehi.

<sup>5</sup> Simón rumo omboyeṽi chupe:

—Porombohesar, orosãha t̃ei niha p̃ĩtu momba pira mboha oroico. Nde porocuita pĩpe rumo amondo irira pira mbohasa ïve —ehi.

<sup>6</sup> Ëgüe ehise, pira reh̃i omondoromi ombohasa yuṽireco.

<sup>7</sup> Ahese oyait̃i yuṽireco omboetasa evocoi ambuae carite pĩpe yuṽirecoi vahe upe ‘toyugüerumi yande p̃ĩtiṽi’ oyapave yuṽireco chupe. Ahe yugüeru chupe. Ipare opa ñuṽirío carite omboap̃ipo tupr̃i yuṽireco; seni iri rumo omondo ip̃ive.

<sup>8</sup> Co mbahe repiase, Simón Pedro oñenop̃iha oso sovai aipo ehi chupe:

—¡Eyep̃epimi t̃ei che sui, che Yar! ¡Esepia, che yangaipa vahe t̃ei aico! —ehi.

<sup>9</sup> Esepia, Simón iyavei opacatu ava yuṽirecoi vahe sup̃i osiquiyé iteanga co pira reh̃i repiase yuṽirecō.

<sup>10</sup> Iyavei Simón mboetasa ambuae carite pĩpendar ahe Santiago, Juan Zebedeo rah̃ir yuṽirecoi. Jesús rumo aipo ehiño Simón upe:

—Eresiquiye eme; co pĩpe suive inungar pira eremboha, ëgüe ere aveira ava reca cheu nara —ehi.

<sup>11</sup> Evocoiyase opa vinose carite ïṽi ãtasave yuṽireco, oseypañño opacatu mbahe. Ipare yuṽirasosup̃i.

*Jesús ombogüera ava lepra rerecosar*

<sup>12</sup> Ñepi ari Jesús secoise tecua pïpe, aheve oime mbïa lepra vïreco vahe opacatu güetecuer rese. Jesús repiase, oñenopiha oyeaivi oso chupe. Ipare oporandu aipo ehi:

—Che Yar, ereipotase, iya nde che mbogüerami eve —ehi chupe.

<sup>13</sup> Evocoyase, opocose sese,

—Aipota. ¡Erecuerara cūritei! —ehi chupe.

Aipo ihe ramoseve voi eté ocuera.

<sup>14</sup> Ipare oyocuai aipo ehi chupe:

—Eremombehu eme nde cuerasa ambuae ava upe; esoño, eyemboyecua judío pahi upe. Ipare eicuavêhe nde porrecosa nde cuerasa resendar Moisés porocuita rupi. Ipïpe sui toicua opacatu ava nde cuerasa yuvireco —ehi chupe.

<sup>15</sup> Jesús rerãcua rumo oyembouvicha catu-catu iri eté. Evocoyase setá ava oyemboya yuvireco sese iñehe rendu ãgua ‘tayande mbogüerami tēi yande mbaherasisa sui’ oyapave yuvireco.

<sup>16</sup> Ava rehi sui rumo amove Jesús oyepepiño ahe aemi oyerure ãgua yepi.

*Jesús ombogüera ava ndoguatai vahe*

<sup>17</sup> Ñepi ari Jesús oporombohe oico. Yar Tūpa pïratasa vïreco oyese ava mbogüera ãgua. Aheve avei oguapï yuvinoi fariseo, Moisés porocuita rese oporombohe vahe avei ipïri yuvireco. Ahe yugüeru opacatu Galilea tecua-tecuami rupi sui yuvireco. Ivi Judea rupi sui, tecua Jerusalén sui avei yugüeru no.

18 Ahese ava ndoguatai vahe güeru supa pipe yuvireco. Viroique pota oi pipe sovai eté seroyi água yuvireco viña;

19 ndoicatui eté rumo seroique yuvireco ava rehi pãhu rupi. Evocoyase viroyeupi yeupisa rupi ahe oi ipe vahe harive yuvireco. Aheve virocua teca ichui. Supi viroyi imbaheasi vahe supa pipe imondo yuvireco opacatu ava rembiepiave sovai.

20 Ahe oicuaase co mbia yuvirecoi vahe oyese yeroyasa, ahese aipo ehi imbaheasi vahe upe:

—Che mboripar, che ñero nde angaipa rese ndeu —ehi.

21 Ichui oporombohe vahe Moisés porocuita rese iyavei fariseo ipihañemoñeta ati voi tēi yuvireco: “Co mbia oyemboivate ai tēi vahe Tūpa ñehes nungar pipe tēi; Tūpañe ité niha oicatu ava angaipa upe oñero água” ehi tēi oyeupe yuvireco.

22 Ahe rumo oicuaño ité ahe ava pihañemoñetasa. Evocoyase aipo ehi chupe:

—¡Mahera vo pepihañemoñeta rai tēi che rese!

23 ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pñha, anise: ‘Epñha, eguata’ hesa tie?

24 Tapeicua ru che, Ava Riquehir, areco ité mborerecuasa co ivi pipe ava angaipa upe che ñero água —ehi.

Evocoyase,

—Eñarapuha, esupi nde rupa, eso nde rētave —ehi imbaheasi vahe upe.

25 Ahese opñha voi ava rovaque, osupi vupagüer. Ipare osapucaí oso güētave Tūpa upe.

26 Ahese opacatu tupri ité ava, “¡Too! ¿Mara ehi rutei pñha co?” ehi tñi imboeteisave yuvireco. Iyavei osiquiyepave aipo ehi yuvireco:

—Co pipe yasepia mbahe ndayasepiai vahe ité — ehi.

### *Jesús oñehe Leví upe*

27 Ichui osēse Jesús, osepia mbia Roma ve nara guarepochi rerocuasar Leví serer vahe, ahe guarepochi rerocuasave chini. Sepiase,

—Erio che rupi —ehi chupe.

28 Evocoyase Leví opñha. Oseyapa oporaviquisa, oso supi.

29 Ipare Leví oyapo pieta guasu chupe nara güētave. Aheve iyemborisave setá imboetasa ava guarepochi rerocuasar iyavei ambuae ava ocaru yuvinoi ipiri.

30 Pieta repiasar fariseo yuvirecoi vahe rumo iyavei ipñhu pendar Moisés porocuita rese oporombohe vahe avei, ahe omboipi semimbohe upe oñehe mara aipo ehi yuvireco chupe:

—¡Mahera ru pecaru iyavei pecahu guarepochi rerocuasar rese iyavei ambuae ava yangaipa guasu vahe rese tñi avei no! —ehi.

31 Jesús rumo aipo ehi chupe:

—Ava nimarai vahe ndosecai eté oporoposano vahe; imbaheasi vaheño rumo oseca yuvireco.

32 Esepia, che ndayui ava seco catupri vahe reca; che rumo ayu ava yangaipa vahe reca Tñpa uve iyevi ñgua yuvireco —ehi.

### *Yecuacusa rese ñehesa*

33 Ipare ava oporandu yuvireco chupe:

—¿Mahera vo oyecuacu serai iyavei oyerure Juan Oporoãpiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehi.

<sup>34</sup> Ahe rumo omboyeví chupe aipo ehi:

—Ndiyai eté ichohopri mboyecuacu mendasave imer oicove viteseve ipãhuve.

<sup>35</sup> Oimera rumo ari imer reraso ãgua ichui, ahese ramo oyecuacura yuvireco cute —ehi.

<sup>36</sup> Iyavei ambuae mbahe rese oporombohe imboyeví ãgua:

—Ndiyai eté ava upe virocua vaherã turucuar ipiasu vahe sui ambuae turucuar cuacuami vahe apete ãgua. Esepia niha, ãgüe ehise evocoyase turucuar ipiasu vahe omomara; iyavei turucuar ipiasu vahe apirer naporai chira turucuar cuacua vahe rese —ehi—.

<sup>37</sup> Iyavei no, ndiyai eté ñoñasa uva ricuer piasu mbahe pিরer cuacua pipe no. Esepia niha, ãgüe ehise, uva ricuer piasu evocoyase opara ombopu mbahe pিরer cuacua viña, ãgüe ehira oyepiyerepa, mbahe pিরer avei evocoyase ocañi tẽira viña.

<sup>38</sup> Uva ricuer piasu rumo yamondora mbahe pিরer piasu pipe.

<sup>39</sup> Iyavei ndipoi eté que ava oihu vahe uva ricuer ipiasu vahe yuvireco uva ricuer cuacua vahe yusei ai pare. Esepia niha, ava aipo, ‘Co uva ricuer cuacua vahe aviye catu vahe yepi’ ehi yuvireco —ehi ava upe.

## 6

*Jesús remimbohe oipoho trigo mbĩtuhusa ari pipe yuvireco*

<sup>1</sup> Ñepeí mbituhusa ari pipe Jesús viroguata güemimbohe mbahe miti pâhu rupi. Semimbohe evocoyase oipoho-poho yuviraso trigo rãhií. Ipare oyequií opo pipe sãhií yuvireco igua.

<sup>2</sup> Evocoyase fariseo osepiase, aipo ehi yuvireco semimbohe eta upe:

—¡Mahera peporaviquiño tẽi co mbituhusa ari pipe peico! —ehi.

<sup>3</sup> Jesús rumo omboyeví chupe:

—Peicua tẽi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiépoise yuvireco.

<sup>4</sup> Ahe niha oique ité Tũpa rẽta pipe, opoco pan imboeteipri Tũpa upendar rese evocoi pahi upe güeraño ipotasa vahe ihu ãgua yepi. Ahe rumo ohu, ondugüer tohu avei omondo —ehi.

<sup>5</sup> Iyavei aipo ehi chupe:

—Ava Riquehir mbituhusa ari rerecuar ité secoi —ehi fariseo upe.

### *Jesús ombogüera mbia ipo nomii vahe*

<sup>6</sup> Ambuae mbituhusa ari pipe, Jesús oique judío tũparo pipe oporombohe oico. Aheve mbia yasu coti ipo nomii vahe secoi.

<sup>7</sup> Moisés porocuita rese oporombohe vahe, fariseo avei omahengatu Jesús rese yuvireco ‘¿ombogüerara pãha co mbia mbituhusa ari pipe?’ oya; ‘yãñhengapo angahu’ oyapave tẽi yuvireco.

<sup>8</sup> Ahe rumo oicuaño ité ipihañemoñetasa oico. Ipare aipo ehi evocoi mbia ipo nomii vahe upe:

—Epũha cohava terehã ava pãhuve —ehi.

Ahe mbia evocoyase opũha, opita aheve ohã

<sup>9</sup> Ahese Jesús oporandu ahe ava upe:

—Aporandura mbahe rese pëu —ehi—. ¿Mbahe vo yaposara mbituhusa ari pipe yepi, mbahe tupri pïha, anise mbahe naporai vahe tie? ¿Yaipisiro pïha ava recocuer; yamocañi uca tēi tie? —ehi.

<sup>10</sup> Evocoiyase omahengatu oyese ava oyere tupri vahe rese. Ipore aipo ehi ava ipo nomi vahe upe:

—Eichoho nde yiva —ehi.

Ahe mbia evocoiyase oichoho oyiva; evocoiyase ipo ocuera tupri ité.

<sup>11</sup> Evocoiyase oñemoiro catuño ité yuvireco sese, iyavei oporandu-randu oyeupe yuvireco ‘¿mara yahera pïha imomara ãgua?’ oya.

### *Jesús oiporavo doce tupri güemimboherã*

<sup>12</sup> Ahe ari rupi Jesús oso ivitri ve, oyerure pïtu momba tupri Vu upe oico.

<sup>13</sup> Cõhese, “Perió” ehi güemimbohe eta upe. Ipãhu sui oiporavo doce tupri, ahe chupe, “Apóstol” ehi.

<sup>14</sup> Co ahe yuvirecoi: Simón, ahe acoi Pedro avei serer; Andrés Simón rivri; Santiago, Juan, Felipe, iyavei Bartolomé;

<sup>15</sup> Mateo, Tomás, Santiago Alfeo rahir; Simón, ava güecua rese secatēhí vahe pãhu pendarer;

<sup>16</sup> Judas Santiago rivri; iyavei Judas Iscariote, ahe omondo vahe Jesús yamotarēhimbar uve.

### *Jesús ombohe ava rehii*

<sup>17</sup> Ipore Jesús ogüeyi ivitri sui yugüeru co doce güemimbohe reseve. Ipore opita ivi yoya tuprisave. Aheve ambuae semimbohe eta oyemboya ati yuvireco sese iyavei setá ava yuvirecoi opacatu tecua Judea rupindar, Jerusalén rupindar iyavei



yemboyasa Tiro, Sidón cotindar, ahe oyemboya avei yuvireco sese. Ahe ava ãgüe ehi ñehe rendu potasave yuvireco ‘tayande mbogüerami tõi yande mbaherasisa sui’ oyapave yuvireco.

<sup>18</sup> Acoi espíritu naporai vahe remimombaraisu avei ocuera tupri yuvireco.

<sup>19</sup> Evocoyase opacatu ava opoco pota ité sese yuvireco. Esepia niha, ahe oporombogüera opacatu güeco pĩratasa pipe oico.

*Ava sorivete vahe iyavei ava ndoyembovihal vahe*

<sup>20</sup> Ipare omahe Jesús güemimbohe rese aipo ehi chupe:

“Perorivete catu pe iparaisu vahe. Esepia niha, Tũpa mborerecuasa pũu nara ité secoi.

<sup>21</sup> “Perorivete catu cũriteindar ndasiepoi vahe. Esepia niha, pehĩtarora peico curi.

“Perorivete catu pe acoi ava cũritei oyaseho vahe. Esepia niha, peviharetera coiye peico.

<sup>22</sup> “Perorivete catu pe acoi ava pe amotarẽhise, pe mboyepepiñose avei oyesui yuvireco, ñehe-ñehe tẽise yuvireco pũu pe amotarẽhisave, iyavei acoi viroĩrose pe rer mbahe tõi pipe che, Ava Riquehir, recocuer sui tõi yuvireco.

<sup>23</sup> Peyembovihalõo iyavei perorivete catuñora ahe ari pipe peico. Esepia niha, ipare peipisira porerecosa tuvichá vahe ivave. ãgüe ehi tupri avei evocoi ava ramoĩ aracahendar mara-mara tõi Tũpa ñehe mombehusar sereco yuvireco” ehi.

<sup>24</sup> “¡Peparaisu catu rumo cũritei mbahe yar peico vahe! ¡Esepia niha, pemboaviye pe rorivetesapeico!

25 “¡Peparaisu catu acoi pe ihĩtaro vahe cĩritei! ¡Esepia niha, ndaperiepoi chira peico coiye!

“¡Peparaisu catu acoi pevĩha vahe pe pietase cĩritei! ¡Esepia, peyasehora pe viharẽhisa pĩpe peico coiye!

26 “¡Peparaisu catu acoi peipisi vahe pe mboeteisa opacatu co ivi pĩpendar ava tẽi sui! ¡Esepia niha, ěgũe ehi tupri tamoi Tũpa ñehe mombehusar angahu tẽi vahe upe yuvireco aracahe!” ehi.

*Iyacatu yasaisu yande amotarẽhimbar*

27 “Pe che ñehe rese peyapisaca vahe upe rumo aipo ahe: Pesaisu ava pe amotarẽhimbar; peyapo tupri mbahe aviye vahe ava nape ambotai vahe upe.

28 Peporandu Tũpa porovasasa rese ava pẽu iñehe-ñehe tẽi vahe upe nara; peyerure Tũpa upe pẽu mbahe tẽi oyapo vahe recocuer rese.

29 Acoi que pe amotarẽhimbar pe rovapetese, co cotindar avei pemoporẽhiñora chupe. Iyavei acoi que ava virocuaño tẽise pe yeaosa pe sui, toviraso avei pe yemondesa gũemimbotar rupi” ehi.

30 “Acoi oporanduse que pe mbahe rese yuvireco pẽu, pemondoño avei chupe. Iyavei acoi que ava virocuaño tẽise pe mbahe pe sui, ndapeporandui chira pẽu imboyevi ãgua rese.

31 Acoi mbahe peipota vahe ambuae ava oyapo vaherã pẽu, ahe tupri avei peyapora chupe.

32 “Acoi ava pe raisupar gũeraño pesaisu catu tẽise, ndipoi eté mbahe aviye vahe ipĩpe. Esepia niha, ava naporai vahe ěgũe ehi yuvireco yepi.

33 Anise, acoi ava mbahe tupri ai oyapo vahe pẽu, chupe gũeraño mbahe tupri peyapose, ¿mbahe

vo evocoiyase oime aviye vahe ipipe? Esepia niha, ava angaipa viyar avei ěgüe ehi yuvireco yepi.

<sup>34</sup> Acoi pemondoño tēise mbahe ava upe ‘tomboyevī mbahe cheu’ pe hesave, ¿mbahe vo evocoiyase oime aviye vahe ipipe? Esepia niha, ava angaipa viyar ěgüe ehi avei yuvireco.

<sup>35</sup> Pe rumo pesaisu catura ava pe amotarēhisar, peyapoñora mbahe aviye vahe chupe. Iyavei pemondoño itera mbahe chupe, ‘Tasāroño rane mbahe cheu imboyevī āgua vichico’ ndapeyei chitera. Ahese oimera porerecosa aviye catu vahe pēu. Pe evocoiyase Tūpa seco ivate catu vahe rahir peicora. Esepia niha, ahe aviye etepri vahe ava ‘aviye ndeu’ ndehi vahe upe iyavei ava yangaipa guasu vahe upe avei.

<sup>36</sup> Pe peporoparaisuereco inungar pe Ru Tūpa oporoparaisuereco yepi” ehi.

### *Ndiyai ambuae ava seroïrosa*

<sup>37</sup> “Ndiyai, ‘Oyavi ité mbahe’ peye voiño tēi ambuae ava upe. Evocoiyase Tūpa, ‘Oyavi mbahe’ ndehi chira pēu. Pemocañi uca tēi eme ambuae ava. Evocoiyase Tūpa ndape mocañi tēi chira. Peñeroño catu ambuae ava upe, ahese Tūpa iñero itera pēu.

<sup>38</sup> Pemondose mbahe ava upe, evocoiyase Tūpa omondoño itera mbahe aviye vahe pēu inungarra omondo pe mbahe riru pipe pēu sãhambri tupri aviye vahe viña. ěgüe ehira mbahe imondo pēu. Tūpa oicua tupri itera pēu inungar pe mbahe pemondo ambuae ava upe” ehi.

39 Ipare Jesús omombehu co ambuae porombohesa: “¿Oicatu p̄iha ñepei ndasesap̄isoī vahe ambuae ndasesap̄isoī vahe reroguata? ¡Aní eté! Esepia, oyoya voi oviapira que ivicuar pipe yuvireco viña.

40 Ñepei yepe niha ava oyembohe vahe ndahei eté ivate catu ombohesar sui. Acoi omomba vahe rumo oyembohesa ahe osupitira ombohesar” ehi.

41 “¿Mahera ambuae ava rembiavimi rese t̄ei pemahe? Iya rumo peyese rane mbahe tuvicha catu vahe pesepiara.

42 Ndiyai p̄eu, ‘Che torop̄itiv̄i mbahe nde rembiavi rese’ peye vahe r̄a chupe. Esepia, pe peyavi guasu catu mbahe. ¡Pe T̄upa reroyasar angahu t̄ei peico vahe! Penose uca rane pe rembiavi tuvicha catu vahe peyesui, ahese ramo ambuae ava rembiavi tahimi vahe moingatu peicatura” ehi oporombohe.

### *Ava recocuer icuasa sembiapo rese*

43-44 “Ivira aviye vahe icuasa iha rese. Esepia, ivira aviye vahe, iha aviye avei; ivira naporai vahe, iha naporai avei no. Supi eté ndipohosai ivira s̄achi at̄i vahe sui higuera ha, iyavei ndahipohosai uva, yu p̄ahu sui.

45 Ēgüe ehi avei ava upe. Ava aviye vahe oyapo mbahe tupri. Esepia, ahe vireco mbahe tupri op̄iha pipe yepi. Iyavei acoi ava ndaseco p̄orai vahe oyapo mbahe t̄ei. Esepia niha, ahe vireco mbahe t̄ei eté op̄iha pipe yepi. Esepia niha, pe p̄iha pipe sui t̄ei os̄e pe ñehe āgua” ehi.

*Ava oyemoviracua vahe iyavei ndoyemoviracuai vahe Jesús reroyasave*

<sup>46</sup> “¿Mahera vo, ‘Che Yar, che Yar’ peye tēi peico cheu; ipare ndapeyapoi eté mbahe che remimombehu?

<sup>47</sup> Amombehura rumo mbahe pēu uma nungar tupri ité acoi ava ou vahe cheu che ñehe rese oyapisaca vahe, iyavei oyapo ité vahe mbahe che remimombehu:

<sup>48</sup> ahe inungar tupri ité acoi ava oyapo vahe güētara ita harive yepi. Yipindar rumo oyoho picucu rane ité ita harive imopuha ãgua. Yepe ahe oi upe oyepota tēi ivitu ai, amarusu reseve oinupa pĩrata tēi, nomboyerochai eté rumo. Esepia niha, vireco ité ovĩracuasa.

<sup>49</sup> Acoi ava che ñehengagüer rese ndoyapisacai vahe rumo, ahe ndoyavii acoi ava oyapo vahe güētara ivi cuhi harive tēi, ndovirecoi eté ovĩracuasa. Ipare amar, ivitu ai reseve oinupa pĩratá, opaño omonduru; ocañi tēi eté evocoiyase” ehi Jesús ava mbohe.

## 7

*Jesús ombogüera chĩhivahe sundao rereciar Roma iguar remimboacua*

<sup>1</sup> Jesús oñehepase ava upe oico, oso Capernaum ve.

<sup>2</sup> Ahe tecua pipe sundao rereciar ndahei vahe judío secoi vireco vahe güemimboacua güembiaisu. Ahe imbaheasi guasu ité ou; omano pota ité.

<sup>3</sup> Jesús rerãcua anduse rumo, oyocuai moviro tēi omboripar judío imboeteipri chupe iñehe ãgua ‘toumi tēi che remimboacua mbogüera’ oyapave.

4 Ahe judío evocoyase oyemboya Jesús rese yuvireco iyavei oporandu yuvireco chupe aipo ehi:

—Ore mboripar sundao rereciar oipota nde ereyapomi tēira mbahe icatupri vahe chupe viña.

5 Esepia niha, ore raisu iyavei ahe teieté oyapo uca tūparo oreu nara —ehi yuvireco chupe.

6 Evocoyase oso ahe yuvirecoi vahe rupi. Virovise rumo sēta yuvireco, ahese sundao rereciar omondo ambuae omboripar chupe. Imboripar evocoyase omombehu ñehe aipo ehi vahe: “‘Che Yar, ereyemañecoi rene. Esepia niha, ndiyai eté che rēta pipe nde reique āgua.

7 Sese niha che teieté ndasoi nde reca. Nde ñehe pipe tēi rumo che remimboacua erembogüerara.

8 Esepia, che avei niha areco che cuaita. Iyavei areco sundao che voya. Eso peve, ahese ñepei upe, ahe evocoyase oso voi eté; ambuae upe: Erio, ahese, ou voiño ité cheu. Ipare, Ereyapora co mbahe, ahese che rembiguai upe, ahe evocoyase che reroyaño voi’ ehi ore mboripar” ehi Jesús upe yuvireco.

9 Aipo oyeupe hese Jesús, “¡Too!” ehi. Ipare aipo ehi vupindareta upe:

—Supi eté ndasepiai vahe ité co mbia che reroya tupri vahe nungar judío eta pāhuve —ehi.

10 Yuviroyevipase sundao rereciar mboripar sētave yuvireco, aheve osepia evocoi semimboacua yuvireco ocuera tuprise.

*Jesús ombogüerayevi cuña imer mano vahecuer membri cuimbahe*

11 Ipare voi Jesús oso tecua Naín ve, iyavei semimbohe yuvirasoño ité supí ava rehi reseve avei no.

12 Virovise tecua oso, osepia tehögüer ava virocuase yuvireco ñoti água. Ahe cuña imer mano vahecuer membri ñepei vahe ité viña. Tecua pîendar setá iteanga ava yuviraso supí.

13 Cuña repiase rumo, oiparaisuereco. Ipare aipo ehi chupe:

—Ereyaseho eme —ehi.

14 Evocoyase oyemboya oso, opoco tehögüer riru rese. Sese ovosii vahe evocoyase viropitaño yuvireco chupe. Ipare aipo ehi tehögüer upe:

—Mbía chíhivahe, che aipo ahe ndeu: ¡Eñarapuha! —ehi.

15 Evocoyase omano vahecuer oñarapuha oĩ iyavei oñehe no. Ichui Jesús omondo ichi upe.

16 Opacatu tupri ité ava oyembosiquiye sepiase yuvireco:

—Cūrítei oyemboyecua Tūpa ñehe mombehusar seco ivate vahe yande pãhuvete —ehi yuvireco.

Iyavei,

—Tūpa niha ou güecua pĩtivii água oico —ehi avei yuvireco.

17 Ipare co Jesús rerãcua yandusa opacatu Judea rupi, yivirindar rupi avei no.

*Juan Oporoãpiramo vahe omondo vupindar Jesús recocuer cua uca água*

18 Juan avei oyandu opacatu co mbahe oico. Esepia niha, supindareta omombehupa co mbahe yuvireco chupe.

19 Evocoyase omondo ñuvirío vupindar Jesús upe mbahe rese porandu água ‘¿nde ité vo Tūpa

Rembiporavo aipo sãrombri ereico, anise oime tie ambuae orosãro vaheã?” oyapave.

<sup>20</sup> Evocoiyase oyepota yuviraso Jesús upe aipo ehi yuvireco chupe:

—Juan Oporoãpiramo vahe ore mbou ndeu co mbahe rese porandu ãgua: ¿Nde ité vo Tũpa Rembiporavo ereico imombehupri ereyu vaheã, anise ambuae pĩha orosãrora oroico? —ehi yuvireco chupe.

<sup>21</sup> Ahe ari pipeve voi Jesús ombogüera setá ava imbaherasisa sui oico, ava carugar rerecosar sui avei no. Iyavei ava ndasesapisoi vahe setá ombogüera.

<sup>22</sup> Ahese ramo aipo ehi chupe cute:

—Peso, pemombehupa Juan upe mbahe pe rembiepia iyavei pesendu vahe: “Ndasesapisoi vahe osareco tupri cũritei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pĩsirosa resendar ñehesa” peyera chupe.

<sup>23</sup> ¡Oviharetera acoi ava oyeroyaño vahe che rese! —ehi Juan rupindar upe.

<sup>24</sup> Juan rupindar yuviraso pare, Jesús omboipi imombehu ava upe Juan recocuer: “¿Pesepias Juan recocuer ava porẽhisave, capihiata ivitu ombova-mbova vahe nungar pĩha?”

<sup>25</sup> Anise, ¿pesepia tie iturucuar porañete ai vahe iyemboeteise? Ëgüe ehi vahe rumo secoi mborerecuar guasu guapisave yepi.



26 ¿‘Mara ehi secocuer’ peye vo chupe? ¿Tũpa ñehe mombehusar ité pĩha? Ahe ité, iyavei evocoi niha ivate catu vahe Tũpa ñehe mombehusar sui.

27 Ahe chupe ité Tũpa icuachiapri aracahendar pĩpe aipo ehi:

‘Amondora che ñehe mombehusar nde renondeve nde raperã moingatũ ãgua’ ehi.

28 Aracahe suive ndipoi eté ivate catu vahe Juan sui. Yepe ahe ivate catu vahe viña, Tũpa mborere-cuasave rumo ava seco mbegüemi catu vahe ivate catu ichui.

29 “Co iñehe renduse opacatu ava, opacatu guarepochi rerocuar yuvirecoi vahe avei oñeapiramo uca vahecuer Juan upe yuvireco: ‘Supi eté Tũpa aviye vahe ité’ ehi eté yuvireco cute.

30 Fariseo eta rumo iyavei Moisés porocuita rese oporombohe vahe ahe noñeapiramo uca potai vahe Juan upe yuvireco, ahe viroño Tũpa remimbotar oyeupendar yuvireco.

31 “¿Mbahe rese pĩha amboyara ava recocuer cĩriteindar? ¿Mara ehi pĩha secocuer?

32 Ahe inungar chĩhivahe iguayĩ tẽi vahe ocar rupi. Ipare oñehe pucu-pucu omboripar upe yuvireco aipo ehi: ‘Oromoñehe tẽi mimbĩ pẽu, ndapepivoi eté rumo; iyavei orosapucari tẽi sapucaisa viharẽhisa resendar pẽu, ndapeyasehoi avei’ ehi.

33 Esepia, ou Juan Oporoãpiramo vahe oico. Ahe ndohui vahe pan iyavei ndoihui vahe uva ricuer. Pe evocoyase, ‘Co mbia caruguar vireco vahe’ peye tupri tẽi chupe no.

34 Coiye che ayu, Ava Riquehĩr, acarũ iyavei aihu tupri avei. Ipare, ‘Co mbia icaru guasu ai vahe

secoi, iihu guasu ai vahe avei no' peye cheu; 'Ava angaipa viyar mboripar tēi iyavei ava guarepochi rerocuasar mboripar tēi' peye avei cheu.

<sup>35</sup> Ava Tūpa mbahecuasa vireco vahe rumo icuasara sembiapo rese" ehi.

*Fariseo Simón serer vahe rētave Jesús secoi*

<sup>36</sup> Fariseo Simón serer vahe oñehe Jesús upe: "Terecarumi che piri" ehi. Jesús evocoyase oso sētave oguapi oñ mesave.

<sup>37</sup> Ahese cuña angaipa viyar evocoi tecua pendar secoi vahe oyandu ichose Simón rētave icaru ãgua. Sese viroyepota aheve mbahe sñacua vahe siru pipe seraso sepirusu vahe chupe.

<sup>38</sup> Aheve oyasehó ite oñenopiha Jesús pive iyavei güesai pipe opa tupri omoaqui ipi. Ipare opaño omombiru oha apri pipe ichui, iyavei oipirupite, oipiyere avei mbahe sñacua vahe ipi rese.

<sup>39</sup> Sepiase fariseo, ipihañemoñeta tēi: "Co mbia Tūpa ñehe mombehusar itese, oicuaño itera co cuña opoco vahe oyese ndipihai vahe viña" ehi tēi fariseo chupe.

<sup>40</sup> Evocoyase aipo ehi fariseo upe:

—Simón, amombehu potami mbahe ndeu —ehi.

—Aviye Porombohesar, emombehu ru cheu —ehi.

<sup>41</sup> Evocoyase Jesús aipo ehi chupe:

—Ñuvirío mbia oime vırocua guarepochi mbia guarepochi mondosar sui yuvireco. Ñepei vırocua guarepochi quiniento tupri mboraviqui repirã ichui. Ambuae evocoyase cincuenta rupive vırocua.

42 Ipare ndoicatu irise ité imboyevi ãgua yuvireco chupe, evocoi mbia guarepochi mondosar iñeroño chupe yuvireco —ehi—. Esãha, emombehu cheu, ¿uma evocoyase osaisu catura mbia guarepochi mondosar? —ehi fariseo upe.

43 —Cheu ndoyavi guarepochi vırocua catu vahe ichui —ehi Simón.

—Taa, supı eté aipo ere —ehi Simón upe.

44 Evocoyase omahe cuña rese aipo ehi Simón upe:

—ıEmahe co cuña rese! Aiquesese acoi nde rēta pıpe, nde nderembouimi eté ı che pısei ãgua cheu; co cuña rumo güesaı pıpe oyosei che pı. Ipare omombiru oha aprı pıpe ae no.

45 İyavei nde ndache rovarupıtei eve; co cuña rumo, acoi nde rēta pıpe che reıque ramomiseve che pırupıte voi eté.

46 “Nde nderemondoı mbahe sãcua vahe che ãca rese; co cuña rumo opa tuprı voi oıpıchı mbahe sãcua vahe che pı rese.

47 Sese co cuña opa oıpısi ñerosa oangaıpa guasu rese. Esepıa, che raisú iteanga. Acoi ava upe nañerosa tuprıı vahe rumo, ahe ndoporoaisu tuprıı aveı” ehi.

48 Ahese aipo ehi cuña upe:

—Oıme nde angaıpa upe ñerosa ndeu —ehi.

49 Evocoyase ambuae ava ichohoprı oguapı vahe yuvınoi aheve, ahe aipo ehi oyeupe yuvireco:

—ıUma pıha co mbia iñero vahe ité angaıpa upe! —ehi.

50 Jesús rumo aipo ehiño cuña upe:

—Nde yeroyasa pıpe ereıpısi pısirosa. Sese eso tuprıño eıco —ehi.

## 8

*Cuña oipĩtivii vahe Jesús yuvireco*

<sup>1</sup> Ipare Jesús oguata opacatu tecua rupi, omombehu ñehesa aviye vahe Tũpa mborerecuasa resendar oico. Doce vahe apóstol supive yuvirecoi.

<sup>2</sup> Cuña avei yuviraso supi, ahe ombogüera vahecuer carugar rerecosa sui imbaherasisa sui avei no. Ahe ipãhuve avei María seci, Magdalena serer yoapisa vahe, ahe ichui osẽ vahecuer siete tupri carugar;

<sup>3</sup> iyavei Juana Cuza rembireco, ahe mbia Herodes mbahe rese ñangarecuar; Susana iyavei ambuae setá cuña oipĩtivii mbahe güembiereco pipe yuvireco.

*Yembohesa mbahe miti rese tecocuer mboyoyasa*

<sup>4</sup> Setá ava yuvinose tecua yacatu rupi pipe sui Jesús repia ãgua yuvireco. Ipare oñemonuha guasuse yuvireco, ahese Jesús setá mbahe rese omboyoya-yoya oporombohe aipo ehi:

<sup>5</sup> “Ñepei mbia osẽ omaheti oico. Ahe otiapi-apiise mbahe rãhii oso, moviro oiti peri rupi. Ahe opa tẽi oicambe yuvireco, iyavei vĩrai opa tẽi yuvirohu.

<sup>6</sup> Iyavei moviro tẽi oiti ivi nayanai vahesave ita pãhuve. Sese cũritei sorĩ; opaño rumo ipiru. Esepia niha, ivi nañaquii chupe.

<sup>7</sup> Iyavei ambuae oiti yu pãhuve. Ipare oyoya tupri sorĩ yuvireco; yu rumo opaño oyopi.

<sup>8</sup> Ambuae rumo oiti ivi aviye vahesave. Ipare sorise, iha vai eté yuvireco; ahe iha retacuer amove cien tupri ité ñepei-pei mbahe miti sui osẽ” ehi.

Aipo ohe pare, Jesús oñehe pĩratá iteanga aipo ehi: “¡Acoi ava osenducua pota vahe che ñehe, toyapisacaño sese!” ehi ava rehii upe.

*¿Mahera pĩha co yembohesa imboyoyasa ambuae mbahe rese?*

<sup>9</sup> Ipare semimbohe eta oporandu yuvireco chupe: “¿Mara oyapave vo aipo co yembohesa?” ehi.

<sup>10</sup> Evocoiyase omboyeví chupe: “Pëu Tũpa oicua uca ité mbahe ndicuasai vahe omborerecuasa resendar; ambuae ava rumo ambohe tẽi ambuae mbahe mboyoyasa pipe; yepe osepia mbahe viña ‘tomahecua eme iyavei yepe osenduño mbahe tosenducua eme yuvireco’ viya” ehi.

*Jesús omombehu tupri yembohesa mbahe tisa resendar*

<sup>11</sup> “Co yembohesa resendar aipo oyapave aipo ehi: Mbahe rãhii ahe inungar Tũpa Ñehengagüer;

<sup>12</sup> iyavei mbahe rãhii peri rupi seitipri, ahe inungar acoi ava osendu tẽi vahe Tũpa Ñehengagüer yuvireco oyapave. Ipare rumo ou vĩrai chupe, ahe inungar caruguar ou vahe chupe opaño oyaracua mocañi Tũpa Ñehengagüer sui ‘toviroya eme iyavei toñepisiro eme yuvireco’ oyapave tẽi.

<sup>13</sup> Acoi mbahe rãhii seitipri ita mahugüer rupi, ahe inungar acoi ava osendu tẽi vahe Tũpa Ñehengagüer yuvireco iyavei oipisi tupri oviharetesa pipe yuvireco viña no. Ahe rumo inungar co mbahe miti ndovirecoi vahe guapo oviracua ãgua; viroya raimi tẽi yuvireco. Oyepotase rumo mbahe tẽi chupe, oyepepi voiño yuvireco ichui.

14 Acoi mbahe rãhi seitipri yu pãhu rupi, ahe inungar acoi osendu tẽi vahe. Ipare rumo oyemboyepepi uca mbegüeño ambuae mbahe rese opihañemoñetá iteangasa pipe tẽi, ombahe eta rese iyavei güemimbotarai mbahe tẽi potasa pipe avei. Ëgüe ehi ahe ava inungar mbahe miti ndihai vahe ité.

15 Acoi mbahe rãhi seitipri rumo ivi aviye vahesave, ahe inungar ava vireco vahe opihañemoñetasa aviye vahe iyavei oyemoingatu voi Tũpa Ñehengagüer rese oyapisaca água yepi; viroya tupri ité no; yuvirecoiño ité sese. Ëgüe ehise, oyapo mbahe aviye vahe yuvireco” ehi.

### *Yembohesa tataendi resendar*

16 “Ndiyai eté ava upe guataendi omoendise omoha vahe que mbahe pipe, ‘Tamondo che rupavrive’ ndehi eté chupe; osupiño ivate imoi opacatu oi pipe yuviroique vahe resape água.

17 Esepia, ndipoi eté mbahe ñomipri, ndayasepiai vaherã curi. Iyavei yaposa vahe imombehupirẽhi, icuasaño itera curi.

18 “Sese peyapisaca tupri co ñehesa rese. Esepia, acoi oyapisaca tupri vahe, chupe imondosa catura; acoi nomombitai vahe rumo mbahe güembieroya oyese, ichui serocusaño itera” ehi oporombohe.

### *Jesús si, tivireta avei*

19 Ichui Jesús si iyavei tivireta oyepota secosave yuviraso. Ndiyai eté rumo chupe yuviraso vaherã yuvireco ava rehii sui.

20 Oime rumo ambuae ava imombehusar chupe,

—Nde si, nde rívíreta reseve nde repia pota tēi ocarve yuvireco —ehi chupe.

<sup>21</sup> Ahe rumo aipo ehi chupe:

—Acoi ava osendu vahe che Ru Ñehengagüer yuvireco, víroya tupri vahe avei, ahe che si, che rívrí yuvirecoi —ehiño Jesús chupe.

*Jesús omombituhu i ohitu vahe, ivitu ai reseve*

<sup>22</sup> Ñepi ari Jesús oha carite pípe güemimbohe eta reseve. Ipare aipo ehi:

—Yaso peve ípa rovai —ehi.

Evocoyase ahe yuviraso.

<sup>23</sup> Yuviroguata víteseve, oqueño Jesús ou. Ahese ípa pípe aviyeteramo tēi ivitu ai omboha guasuguasu carite pípe i, omondo pota ité ípive viña.

<sup>24</sup> Evocoyase semimbohe yuviraso imomba aipo ehi chupe:

—¡Porombohesar! ¡Porombohesar! ¡Yande rerasora moco carite ípive! —ehi yuvireco.

Ahese omahe. Ipare oñehe pírata ivitu ai upe iyavei i ohitu vahe upe: “¡Pepituhu!” ehi. Aheseve voi opituhu tupri.

<sup>25</sup> Evocoyase aipo ehi güemimbohe eta upe:

—¿Mahera vo ndapeyeroyai che rese? —ehi.

Ahe rumo osiquiyéño, ndoyembovihaiño iyavei oporandu-randu tēi oyeupe yuvireco:

—¡Mara ehi vahe píha co mbia! Esepia niha, ivitu ai, para guasu avei omboyeroya —ehi tēi oyeupe yuvireco.

*Mbia Gerasa iguar vireco vahe carugar oyese*

<sup>26</sup> Coiye oyepota yuviraso Gerasa ivi rese cute, ahe ambuae ípa coti ivi Galilea rovai.

27-29 Aheve mbia tecua iguar caruguar vireco vahe secoi. Aracahe suive nani tupri ité secoi iyavei ndopitai vahe ité oi pipe yepi; ěgüe ehi rumo ahe tehögüer ruvipa rupindar tēi secoi. Setá rupi caruguar ombohe ité sereco yepi. Yepe ava oipocuhacua-acua carena pipe sereco, ipi rupi avei no ‘toviraso iri eme caruguar’ oya-pave yuvireco chupe viña, ahe rumo ombosando-sandoño ité iyavei caruguar omoñemi ucaño ava porēhisa rupi sereco. Evocoyase Jesús osēse carite pipe sui, osovaichi ahe mbia. Sepiase rumo, ahe mbia oñenopiha voi oso sovai oñehe pĩrata chupe:

—¡Eyepipi che sui, Jesús, Tũpa seco ivate catu vahe Rahir! ¡Che mombaraisui rene eve! —ehi. Esepia, Jesús opa oyocuai caruguar sereco ‘tosē ichui’ oyapave.

30 —¿Mara vo nde rer? —ehi chupe.

—Che rer Legión —ehi.

Aipo ehi, esepia niha, setá etepri caruguar yuviroique yaviterve.

31-32 Oimese rumo cuchu setá ocaru vahe ivitri ruambesave, caruguar evocoyase oporandu chupe aipo ehi: “Toroiqueñomi tēi co cuchu aviterve” ehi yuvireco chupe ‘tayande mondo eme cañi tēisa apirēhi vahe pipe’ oyapave viña. “Peiqueño sese” ehi caruguar upe.

33 Ahese opa yuvinose mbia sui yuviroique cuchu aviterve cute. Aheseve voi cuchu opa yuvinoña yuviraso ivivate sui ipa pipe. Aheve ipive opa tēi eté ocañi yuvireco.

34 Cuchi rārosar osepiase ahe mbahe yuvireco, opa yuvinoña yuviraso co mbahe mombehu tecua pipe ava upe, cove rupi avei no.



35 Ipare setá ava yugüeru aipo mbahe oime vahecuer repia. Oyepotase rumo secosave yuviraso, aheve osepia ahe mbia carugar rerecosarer oguapî oĩ ñipîimi, oyemonde tupri, yaracua tupri avei oico. Ahese oyembosiquiye tēi yuvireco.

36 Acoi ava osepia vahecuer, ahe opa mbahe omombehu yuvireco co mbia carugar rerecosar cuera agüer.

37 Ahese opacatu ava Gerasa pendar, yivirindar avei Jesús upe, “Esiri cohava sui” ehi yuvireco. Esepia niha, osiquiyé iteanga yuvireco ichui. Evo-coiyase oha carite pipe. Ipare osoño.

38 Yipindar rumo evocoi mbia carugar vireco vahecuer, “Tasomi tēi nde rupi” ehi viña. Ahe rumo, “Epitaño” ehi.

39 —Eyevî nde rētave, emombehupa opacatu mbahe Tūpa oyapo vahecuer nde rese —ehî.

Ahe mbia evocoyase oso opacatu tecua rupi, Jesús oyeupe mbahe apo agüer mombehu.

*Jesús ombogüera Jairo rayri iyavei cuña iturucuar rese opoco vahe*

40 Oyevise Jesús ipa rovai oso, aheve ava rehî oviharetosa pipe oipîsi tupri yuvireco. Esepia niha, ava opacatu ité osãro yuvireco.

41 Ahese Jairo serer vahe oyepota oso Jesús upe, evocoi judío tūparo rese yangarecuar secoi vahe. Ahe mbia oñenopiha sovai oso, oporandu chupe ‘tosomi tēi che rētave che rayri mbogüera’ oyapave.

42 Esepia niha, vireco guayri ñepeimi vahe ité, doce araviter vireco vahe. Ahe omano potami eté ou.

Osose Jairo rētave, aheve perĩ rupi ava rehii yuvirasoño supĩ; oyembotĩ tuprĩ ité yuvireco.

<sup>43</sup> Ahe ipãhu rupi oime cuña doce araviter rupi suvĩ yepiyere-yere vahe. Opa-opa tēi omondo ombahe ocuera ãgua repirã yepĩ; ndocueraĩ eté rumo.

<sup>44</sup> Ahe cuña evocoyase oyemboya oso saquicuei cotĩ opoco iturucuar popĩ rese. Ipare ahe pĩpeve voi opituhu suvĩ ichuĩ.

<sup>45</sup> Evocoyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoyase aipo ehi chupe:

—Porombohesar, ava rehii mo oyemboya nde rese iyavei nde moañi-añii yuvireco opacatu rupi —ehi.

<sup>46</sup> —Che rumo aicua oime ava opoco vahe che turucuar rese. Esepia, ayandu che pĩratasa osēse che sui —ehi Pedro upe.

<sup>47</sup> Ahe cuña ndoicatuĩ oñemi. Sese orĩriĩ oñenopiha sovai. Oyemombehu chupe opacatu ava rovaque: “Che apoco nde turucuar rese. Esepia, ‘Acuera tuprira apocose iturucuar rese’ ahe ndeu” ehi.

<sup>48</sup> Ahese aipo ehi cuña upe:

—Che rayrĩ, erecuera tuprĩ ité. Esepia niha, che rese ereyeroya ité. Sese eso tuprĩño —ehi cuña upe.

<sup>49</sup> Jesús ñehe viteseve, ahese oyepota aheve mbia Jairo rēta sui aipo ehi Jairo upe oso:

—Omano nde rayrĩ cute. Eremañeco tēi iri rene Porombohesar —ehiño Jairo upe.

<sup>50</sup> Evocoyase iñehe renduse aipo ehi Jairo upe:

—Aní eresiquiye; nde che rese yeroyasa pipe ité nde rayri ocuerayevira —ehi.

<sup>51</sup> Oyepotase Jairo rētave oso, aheve ndomoingue uca potai eté ava oyeupi. Pedro, Santiago, Juan iyavei cuñatai yesupa upeño oipota seique ãgua.

<sup>52</sup> Aheseve opacatu ava oyaseho ati, ndoyembovihai tēi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tēi ou —ehi.

<sup>53</sup> Ava rumo opuca ete-eteño seroyaēhisave yuvireco. Esepia niha, ahe oicua ité imanose yuvireco viña.

<sup>54</sup> Evocoyase oipopisi cuñatai. Ipare aipo ehi chupe:

—¡Cuñatai, eñarapuha! —ehi.

<sup>55</sup> Ahe evocoyase oñarapuha voi eté ocuerayevi. Ipare Jesús, “Pembocarú” ehi iyesupa upe.

<sup>56</sup> Iyesupa evocoyase, “¿Mara ehi rutei pīha co?” ehi tēi yuvireco chupe. Jesús rumo omombehu chupe: “Ndapemombehui chietera que ñepeí ava upe” ehi.

## 9

*Jesús doce güemimbohe omondo Vu Tūpa mborere-cuasa resendar mombehu ãgua*

<sup>1</sup> Jesús opa omonuha güemimbohe doce vahe oyeupe. Ipare omondo opīratasa opacatu upe caruguar ambuae-ae tēi vahe imboyepepi ãgua ava sui iyavei ava mbogüera ãgua imbaherasisa sui.

<sup>2</sup> Opa omondo Vu Tūpa mborerecuasa resendar mombehu ãgua, ava imbaheasi vahe mbogüera ãgua avei.

<sup>3</sup> Yipindar rumo aipo ehi chupe:

—Ndaperasoi chira mbahe pe guatasa rupi: que mbococa, mbahe riru, tembihu, que guarepochi avei no. Perasora rumo ñepei güeraño pe turucuar; ndahei chira ñuvirío peraso.

<sup>4</sup> Pepitami ranera ñepei oi pipe güeraño tecua yacatu peico.

<sup>5</sup> Acoi ava ndape moingue uca potaise güëta pipe yuvireco, peyepipiñora ichui iyavei peipipetera pe pi sui ivi cuhi ‘toicua Tūpa ñemoirosa oyeupendar yuvireco’ pe hesave —ehi güemimbohe eta mondo.

<sup>6</sup> Evocoiyase opa yuvinose yuviraso, iyavei oñemosai opacatu tecua rupi omombehu Tūpa Ñhengagüer pĩsirosa resendar yuvireco iyavei ombogüera-güera ité ava imbaherasisa sui opacatu oguatasa rupi yuvireco.

*Herodes, “¿Mara ehi pĩha?” ehi Jesús upe*

<sup>7</sup> Co mborerecuar guasu Herodes oyandu opacatu mbahe Jesús rembiapo. Evocoiyase, “¿Mara ahera pĩha?” ehi tēi. Esepia niha, aipo, “Juan ocuerayevi” ehi yuvireco chupe.

<sup>8</sup> Ambuae aipo ehi: “Tūpa ñehe mombehusar Elías, ahe tēi oñemoporēhi iri” ehi yuvireco. Ambuae aipo ehi: “Que ñepei Tūpa ñehe mombehusar aracahendar revo, ahe tēi ocuerayevi” ehi yuvireco viña.

<sup>9</sup> Herodes rumo aipo ehi:

—Che niha ayasia uca Juan ãca —ehi—. ¿Uma rerãcua pïha evocoyase ayandu? —ehi tẽi.

Sese Herodes osepia pota ité Jesús.

*Jesús oyopoi cinco mil cuimbahe*

<sup>10</sup> Apóstol oyevipase Jesús upe, ahese opa tupri mbahe güembiapogüer omombehu yuvireco. Ahese opa viroyepipi ava rehi sui, viraso ivi iporupirêhisave tecua Betsaida cotive.

<sup>11</sup> Ahe ava rehi rumo oyanduse yuvireco, yuvirasoño saquicuei. Evocoyase, “Perioño” ehi chupe. Ipare oñehe Vu Tũpa mborerecuasa rese ava upe iyavei ombogüerapa ava imbaherasisa sui.

<sup>12</sup> Caharuse co doce semimbohe oyemboya yuvireco sese aipo ehi chupe:

—¿Ndiyai vo eremondopa ava, topituhu yuvireco iyavei toseca mbahe güemihura tecua-tecuami cõi vahesa rupi? Esepia niha, cohave ndipoi eté mbahe —ehi yuvireco chupe.

<sup>13</sup> Ahe rumo aipo ehi güemimbohe eta upe:

—Pe pemondora mbahe semihura yuvireco — ehi.

Semimbohe aipo ehi yuvireco chupe:

—Poyandepomi tẽi rumo pan orovireco, ñuviriomi tẽi avei pira, toroso ayase co ava opacatu remihura rerocua —ehi yuvireco chupe.

<sup>14</sup> Esepia niha, cuimbahe retacuer cinco mil tupri. Jesús rumo aipo ehi güemimbohe eta upe:

—Pemboyaho cincuenta rupi-rupi imboguapi — ehiño.

<sup>15</sup> Ëgüe ehi semimbohe yuvireco chupe. Ipare oguapi opacatu ava yuvireco.

<sup>16</sup> Evocoyase oipisi poyandepo pan iyavei ñuvirio pira. Ipare omahe iva rese, “Aviye ndeu,

che Ru” ehi. Imbohi-mbohi pare, opa omondo güemimbohe upe ava rehîi upe imondo ãgua yuvîreco.

<sup>17</sup> Evocoiyase opacatu ava ocaru vahe ihîtaropa tēi yuvîreco. Ipare semimbohe omboapîpopa doce tupri iruova sembihu rumbîrer yuvîreco.

*Pedro, “Jesús, Tũpa Rembiporavo Poropĩsîrosar secoi” ehi*

<sup>18</sup> Ñepi ari pîpe Jesús oyerokuî ahe ae güemimbohe pãhuve. Ahese oporandu güemimbohe upe:

—¿Mara ehi vo ava oñehe yuvîreco che rese? — ehi.

<sup>19</sup> —Amove ava, “Juan Oporoãpiramo vahe” ehi yuvîreco ndeu; ambuae, “Elías” ehi yuvîreco ndeu, iyavei ambuae, “Aviyeteramo que ambuae Tũpa ñehe mombehusar aracahendar ocuerayevî” ehi yuvîreco ndeu —ehi.

<sup>20</sup> Evocoiyase oporandu güemimbohe upe:

—Pe no, ¿“Ava co secoi” peye ru pe cheu no? — ehi.

—Nde niha Tũpa Rembiporavo Poropĩsîrosar ereico —ehi Pedro imboyevî chupe.

*Jesús omombehu omano ãgua*

<sup>21</sup> Ahe rumo aipo ehi güemimbohe eta upe: “Pe-mombehui rene Tũpa Rembiporavo che recosa ava upe” ehi.

<sup>22</sup> Iyavei aipo ehi chupe:

—Che, Ava Rîquehîr, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuita rese oporom-bohe vahe remiamotarēhî aicora. Ahe avei che

yuca ucara yuvireco; mbosapi ari rupi rumo acuerayevira —ehi.

<sup>23</sup> Ipare aipo ehi opacatu upe:

—Acoi uguata pota vahe che rupi, topoi mbahe güemimbotar tēi aposa sui iyavei inungar-ra curusu rese ovosira viña, toyemoingatu voi che recocuer rese oparaisu āgua ari yacatu rupi iyavei toguata tupri che rupi.

<sup>24</sup> Esepia, acoi ava güetecuer tēi raisupar ocañi tēi itera; acoi ava omocañi tēi vahe rumo güetecuer che recocuer rese, ahe oñepisirora.

<sup>25</sup> Esepia, ¿aviye ai angahu pīha ava upe opacatu mbahe co ivi pipendar pisi āgua tēi, ahe ae tēi omocañise güecocuer yuvireco viña?

<sup>26</sup> Esepia, acoi ava yuvinochi ai vahe che sui iyavei che ñehengagüer sui avei no, che avei, Ava Riquehir, ēgüe ahera ichui acoi ayevise che reco pīratasa pipe, che Ru reco pīrata porañetesa pipe avei sembiguai rehii iva pendar maranehi reseve curi.

<sup>27</sup> Supi eté, oimera amove cohava ava nomano vītei chivaherã, osepia rane itera ouse Tūpa mborerecuasa yuvireco curi —ehi.

### *Jesús ñecuñaro agüer*

<sup>28</sup> Ocho ari pare Jesús oyeupi ivitri rese oso oyerure āgua. Pedro, Santiago iyavei Juan ahe viraso oyeupi.

<sup>29</sup> Oyerure vīteseve, oñecuñaro sepiaca. Ituru-cuar evocoiyase sendi, morochí eteanga.

<sup>30</sup> Ahese ñuvirío ava oyemboyecua yivii imoñeta yuvinoha. Evocoi ava yuvirecoi vahe ahe Moisés, Elías avei.

<sup>31</sup> Oyere tupri sendigüer iporañetesa yuvireco sese, iyavei co ñuvirío mbia oñehe imano ãgua rese yuvireco chupe: “Nde niha ereyemomborarara nde mano ãgua Jerusalén pipe eico” ehi yuvireco chupe.

<sup>32</sup> Yepe Pedro, ondugüer reseve sopesí eteanga yuvireco viña. Aviyeteramo tēi opa sopesí yuvireco ichui. Ahese osepia Jesús porañetesa yuvireco iyavei co ñuvirío mbia yuvinoha vahe yivíi no.

<sup>33</sup> Evocoi mbia oyepépise ichui yuvireco, ahese Pedro aipo ehi chupe:

—Ore mbohesar, javiye ai eté cohava yaico! Toroyapo mbosapí teyupami: ñepei ndeu nara, ambuae Moisés upe, ambuae evocoiyase Elías upe nara —ehi.

Pedro rumo ndoicuai eté aipo ohesa.

<sup>34</sup> Iyavei iñehe viteseve, aviyeteramo tēi iporēhi iva quiha, oyopipa tupri ité. Evocoiyase osiquiye tēi yuvireco.

<sup>35</sup> Ipãhuve oyeendu ñehesa aipo ehi vahe: “Co che Rahír, che Rembiporavo ité; peyapisaca catu iñehe rese” ehi.

<sup>36</sup> Opase osendu co ñehesa yuvireco, ahese osepia Jesús, ahe ae ihãise yuvireco. Semimbohe rumo oyeupe tēi ovireco yuvireco; ndomombehu vitei eté ava upe mbahe osepia vahecuer yuvireco.

*Jesús ombogüera chñivahe caruguar rerecosar*

<sup>37</sup> Ahere ayihive, ogüeyise ivitri sui yuvireco, setá ava oyugüeru Jesús rovañchi yuvireco.

<sup>38</sup> Ahese mbia ava pãhuve aipo ehi pĩrata voi eté:



—Porombohesar, ereyapomira mbahe icatupri vahe cheu viña. Esepia, che rahir ñepeimí vahe ité;

<sup>39</sup> carugar rumo opoco sese, omoase pucupucu uca yepi iyavei omoeōha-ōha sereco iyavei iyuru rupi tiyui yusu-yusu. Mara-mara tēi vireco iyavei ndopoi potai eté ichui.

<sup>40</sup> Amombehu tēi niha nde remimbohe upe ‘tomboyepemí tēi carugar ichui’ che yapave viña; nomboyepemí eté rumo ichui yuvireco —ehi.

<sup>41</sup> Ahe omboyevi:

—¡Too, ndapeyeroya tupri vitei eté che rese, co coti tēi vite pe pihañemoñetasa! ¿Mbovi rupi rutei vo aico vitera pe pāhuve che ñemosasa pipe? Eru nde rahir cohava cheu —ehi ahe mbia upe.

<sup>42</sup> Chihivahe oyemboyase rumo sese, carugar omboviapi voi imondo ivive, imoeōha iri. Jesús rumo oñehe pīrata carugar upe imose āgua chihivahe sui. Ahese chihivahe ocuera tupri ité. Ipare omboyevi tu upe.

<sup>43</sup> Ahese opacatu ava, “¡Mara ehi rutei!” ehi tēi yuvireco Tūpa pīratasa rembiapo aviye vahe repiase.

### *Jesús omombehu iri omano āgua*

Opacatu ava ndoyembovīhai vīteseve yuvireco, ahese aipo ehi güemimbohe upe:

<sup>44</sup> —Pesendu tupri che ñehe; peresarai eme ichui: che, Ava Riquehir, imondopri aicora che amotarēhimbar povrive —ehi.

<sup>45</sup> Semimbohe rumo ndosenducuai eté oyeupe ñehesa yuvireco. Esepia niha, Tūpa ndoipotai eté senducua āgua chupe; osiquiye chupe oporandu āgua yuvireco yepi.

*¿Ava vo seco ivate catu vahe?*

<sup>46</sup> Coiye semimbohe eta omboipi oyecopi-copi yuvireco ‘¿ava ité pīha ivate catu vaherā curi?’ oyapave.

<sup>47</sup> Jesús rumo oicuaño ipihañemoñetasa yuvireco. Evocoyase oipisi chīhivahemi seru oipive imoha.

<sup>48</sup> Ipare aipo ehi güemimbohe eta upe:

—Acoi ava oipisi vahe co chīhivahemi nungar che rer pipe sereco, che ité che pisi yuvireco; iyavei acoi ava che pisi vahe, oipisi aveira che mbousar. Esepia, acoi ava seco mbegüemi catu vahe pe pāhu pendar, ahe aviye catu vahe —ehi.

*Acoi yande mboyoyasar, ahe ndahei yande amotarēhisar*

<sup>49</sup> Evocoyase Juan aipo ehi chupe:

—Ore mbohesar, orosepia niha mbia ombogüera vahe carugar pīratasa sui ava nde rer pipe oico; ore rumo ndoroipotai chupe evocoyase seco āgua. Esepia niha, ndahei yande rupindar secoi —ehi.

<sup>50</sup> Jesús rumo,

—¡Aní ndapeipotai chupe! —ehi—. Esepia niha, evocoi nungar ava ndahei yande amotarēhisar; ahe rumo yande mboyoyasar —ehi güemimbohe eta upe.

*Jesús oñehengata Santiago upe, Juan upe avei*

<sup>51</sup> Virovise rumo ari ivave Jesús so āgua, ahese ahe aipo ehi: “Yaso ru Jerusalén ve cūrtei” ehi.

<sup>52</sup> Evocoyase omondo ava güenonera. Ahe yuviraso tecua Samaria ivi rupi ipituhu āgua moingatu viña;

53 Samaria iguar rumo nomoingue potai eté güêtave yuvireco. Esepia, oicua Jerusalén ve ichose yuvireco.

54 Co mbahe naporai vahe repiase rumo, semimbohe Santiago iyavei Juan oporandu yuvireco chupe:

—Ore Yar, toromboumi tata iva sui co ava mo-  
cañi ãgua —ehi yuvireco chupe viña.

55 “¡Aní!” ehi oyemboyere chupe.

56 Ipare yuviraso ambuae tecuave.

### *Oguata pota vahe Jesús rupi*

57 Yuvirasose peri rupi aipo ehi mbia Jesús upe:

—Che Yar, che nde rupi aso pota opacatu nde  
guatasa rupi —ehi.

58 Ahe rumo aipo ehi:

—Aguara vireco güêtara, vîrai avei vireco guaiti;  
che rumo, Ava Riquehir, ndarecoi que che rêta che  
pituhu ãgua —ehi chupe.

59 Ipare ambuae upe aipo ehi:

—Erio che rupi —ehi.

—Che Yar, che ru manose voi, ñoti pare aguatara  
nde rupi —ehi.

60 —Aní —ehi—. Acoi omano vahe nungar ahe ae  
toñeñetiño yuvireco; nde rumo eso, emombehuño  
ñehesa Tûpa mborerecuasa resendar ava upe —ehi.

61 Evocoyase ambuae aipo ehi chupe no:

—Che Yar, che aguata pota nde rupi; yipindar  
rumo aso ranera che rêtave mbahe moingatú che  
so ãgua —ehi.

62 —¡Aní! —ehi ahe mbia upe—. Esepia, inungar  
acoi oipisi vahe ivi mboyeresa imohivi tupri ãgua,  
omahese rumo guaquicuei coti, evocoi nungar

naporai Tũpa mborerecuasave yuvĩroi que va herã  
—ehi.

## 10

### *Jesús oyocuai setenta y dos tupri güemimbohe*

<sup>1</sup> Ipare yande Yar oiporavo setenta y dos ava ñepei-peí tecua rupi ñuvirío-río güenonera.

<sup>2</sup> Yipĩndar rumo aipo ehi: “Supi eté mbahe imonuhapirã setá iteanga; sese oporaviqui vahe rumo movĩromi tẽi. Sese peporandu mbahe miti Yar upe, tombou ava imonuha ãgua” ehi.

<sup>3</sup> “Peso, opomondo ovesami nungar ava mbahe mĩmba oñaro vahe nungar pãhuve.

<sup>4</sup> Perasoí rene mbahe rĩru iyavei guarepochi siru reseve. Ndapemondugüei chiaveira pe pĩtaqui; iyavei aní pepĩta ‘avĩrave’ apo ava upe perĩ rupi.

<sup>5</sup> Acoi peiquese que oĩ pĩpe, yipĩndar rumo peyapo ranera: ‘Avĩrave. Tũpa tape rovasa’ peyera.

<sup>6</sup> Acoi aheve oimese ava avĩye vahe, ahe oipĩsira Tũpa porovasasa; anise evocoyase ndipoi chira porovasasa chupe nara.

<sup>7</sup> Acoi pe pĩsise, aheve ité pepĩtañora; pecarura iyavei peihura ahe sembierecõ. Esepia, ava poraviquise imboepisa chupe. Sese ndapeguatai chira ambuae ava rẽta rupi-rupi tẽi. Ñepei oĩ pĩpe güeraño pepĩtañora.

<sup>8</sup> Acoi que tecuave peyepotase, ahe pendar pe repia potañose yuvĩreco, acoi ahe ombouse mbahe yuvĩreco tapehu, pehuñora ichui.

<sup>9</sup> Ahe pendar imbaheasi vahe evocoyase pem-bogüerara, iyavei aipo peyera chupe: ‘Tūpa mborerecuasa namombrĩimi pe sui’ peyera.

<sup>10</sup> Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera:

<sup>11</sup> ‘¡Co pe recua pĩpendar ivi chimborer oya vahe ore pi rese oroipipete oreyesui, peicua catu, ore hesa pĩpe. Peicua tupri rumo Tūpa mborerecuasa namombrĩimi pe sui’ peyera chupe.

<sup>12</sup> Supi eté acoi ari cañi oyepotase, oimera Tūpa ñemoirosa ahe tecua pendar upe ivate catu vahe ava tecua Sodoma pendar sui” ehi güemimbohe eta upe.

### *Opacatu tecua ndiporeroyai vahe*

<sup>13</sup> “¡Peparaĩsu ava tecua Corazín pendar, pe avei peparaĩsu tecua Betsaida pendar! Esepia, acoi poromondiisa pe pãhuve yapopri yaposara yipive tecua Tiro, Sidón ve viña, ahe tecua pendar arac-aheve anga omondera turucuar viharẽhisa re-sendar, tanimbu avei omondora oãca rese oan-gaipa mboasisa pĩpe yuvireco viña no.

<sup>14</sup> Pe rumo peipisira ivate catu vahe Tūpa ñemoirosa ava Tiro, Sidón pendar sui ari cañi pĩpe coiye.

<sup>15</sup> Pe avei no tecua Capernaum pendar, ¡pemoha co ivave pe reco ãgua viña! ¡Pe mombosapara rumo ivicuar ipicucu catu vahesave!

<sup>16</sup> “Acoi ava oyapĩsaca vahe pe ñehe rese yuvireco, ahe evocoyase oyapĩsaca avei che ñehe rese. Iyavei acoi ava pe mboyepepiño vahe oyesui, ahe evocoyase che avei che mboyepepi

oyesui yuvireco. Acoi ava rumo che mboyepepiño vahe oyesui, ahe evocoyase che mbousar avei omboyepipiño oyesui” ehi güemimbohe upe.

*Oyevipa iri ava setenta y dos vahe*

<sup>17</sup> Oyevipase ava setenta y dos vahe, oviharetasave aipo ehi yuvireco chupe:

—¡Ore Yar, carugar avei eté niha ore mboyeroya etepri yuvireco nde rer pipe! —ehi.

<sup>18</sup> Evocoyase aipo ehi güemimbohe eta upe:

—Taa, asepia ité niha carugar rereciar oviapise iva sui overa vahe nungar.

<sup>19</sup> Che niha amondo pĩratasa pẽu peguata va-herã mboi iyavei mbahe rumbiquiãpe hari rupi opacatu pe amotarẽhisar pĩratasa reroyi ãgua, que mbahe pe momaraẽhi ãgua avei.

<sup>20</sup> Peyemboviharetei rene carugaretã pe mboyeroiyase. Iya rumo peyemboviha pe rer iva pendar icuachiapri rese —ehi güemimbohe eta upe.

*Jesús oviharete*

<sup>21</sup> Ahe pipeve voi Jesús, Espiritu Santo rese, vorivetesã pipe aipo ehi: “Che Ru, che oromboetei. Nde niha iva Yar, ivi Yar avei no. Esepia niha, ereñomi co mbahe ava oyesui tẽi mbahe oicua vahe sui iyavei co ivi pipendar ava imbahecua vai vahe sui avei no. Eremboyecua rumo co mbahe ava ndoyembohe tupri vahe upe nde rese oyeroyase. Ahe niha ereipota ité, che Ru” ehi.

<sup>22</sup> “Opacatu mbahe che Ru ombou cheu. Iyavei ndipoi ava che cua vahe tahir che recose; che Ru güeraño ité rumo che cua. Ndipoi avei che Ru oicua tupri vahe yuvireco no; che güeraño ité

aicua. Iyavei acoi que ava upe aicua uca potase, aicua uca tupri aveira” ehi ava eta upe.

<sup>23</sup> Evocoyase omahe güemimbohe eta rese, chupe güeraño aipo ehi: “Perorivete catu co mbahe pesepia vahe rese.

<sup>24</sup> Esepia niha, setá etepri ava Tũpa ñehe mombesar yuvirecoi vahe iyavei mborereciar guasu eta aracahendar osepia pota tẽi mbahe pe rembiepia; ndosepiai eté rumo yuvireco. Osendu pota tẽi co pe remiendu yuvireco; ahe rumo ndosendui avei yuvireco” ehi güemimbohe upe.

*Jesús porombohesa Samaria iguar recocuer sui*

<sup>25</sup> Iyavei no Tũpa porocuita rese oporombohe vahe oso Jesús upe secoãha ãgua, mbahe rese oporandu:

—Porombohesar, ¿mara ahera vo vichico teco apirẽhi vahe rereco ãgua? —ehi chupe.

<sup>26</sup> Ahe omboyevi:

—¿Mara ehi vo Moisés porocuita icuachiapri pipe? ¿Mara ehi vo ereyeroquise ipipe? —ehi oporombohe vahe upe.

<sup>27</sup> Evocoyase oporombohe vahe omboyevi:

—“Eresaisura nde Yar Tũpa opacatu nde pihá pipe, opacatu nde recocuer pipe, opacatu nde pĩratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar” ehi Moisés porocuita —ehi chupe.

<sup>28</sup> —Supi eté —ehi—. Eremboyevi tupri ndeyeupe porandusa cheu. Eremboaviyese evocoi, ahese ererecora tecovesa apirẽhi vahe —ehi co mbia upe.

<sup>29</sup> Co mbia rumo oyeepi pota. Sese aipo ehi chupe:

—¿Ava vo aipo che cotindar secoi? —ehi.

<sup>30</sup> Evocoyase omboyeví chupe:

—Oime mbía Jerusalén sui oso vahe Jericó ve. Ahe perí rupi yuvínose ava ndipíhai vahe yuvíreco chupe. Ahe vírocuapa imbahe yuvíreco ichui, iturucuar opacatu reseve; iyavei yuvírocu-rocu yuvíreco sese. Ipare oyuca seni seya perí rupi yuvíraso.

<sup>31</sup> Ahese judío pahi ou ahe perí rupi. Evocoi mbía repiase rumo, co cotí rupi oñacuasaño oso.

<sup>32</sup> Ëgüe ehi tuprí avei ambuae mbía pahi pĩtívĩsar levita, osepiase, oñacuasa tupríño avei oso no.

<sup>33</sup> Ipare rumo mbía sepia potapirēhi Samaria iguar oso ahe perí rupi avei. Ahe osepiase, oiparaisuereco.

<sup>34</sup> Evocoyase ahe mbía oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucuar pipe chupe. Ipare osupi güeimba harive oaprive, víraso ava quesave. Aheve ihañeco sese.

<sup>35</sup> Ahere ayihive Samaria iguar osose, omondo guarepochi ahe pendar oi yar upe. Ipare aipo ehi chupe: “Esãro tuprími tēi co ava cheu. Acoi ndehañeco catuse sese, amboepi catu irira che yevise ndeu” ehi sēta vahe upe.

<sup>36</sup> Indó, ¿uma vo co evocoyase mbosapi yuvírecoi vahe oyemboava acoi ava ndipíhai vahe remimombaraisu upe? —ehi.

<sup>37</sup> Evocoyase ahe mbía aipo ehi:

—Acoi mbía oiparaisuereco vahe iparaisu vahecuer —ehi.



—Supi eté —ehi chupe—. Eyapo tupri avei nde co nungar eico —ehi Jesús co Moisés porocuita rese oporombohe vahe upe.

*Jesús oso Marta iyavei María rēlave*

<sup>38</sup> Ipare Jesús güemimbohe eta reseve oguata vite oyepota cuña recosave yuviraso, ahe cuña rer Marta. Ahe omoingue tupri güēta pipe.

<sup>39</sup> Icupihir evocoyase María serer. Ahe uguapi Jesús pive ñehe rendu oĩ.

<sup>40</sup> Marta rumo oyembopihavĩracua opacatu mbahe rese oico. Ipare oyemboya oso Jesús rese opihavĩracuasa pipe aipo ehi chupe:

—Che Yar, ¿aviye ai vo evocoi che cupihir chini tēi nde piri che poraviqui viteseve? Emombehu chupe, tou, tache pĩtivii rane —ehi chupe.

<sup>41</sup> Omboyevi rumo Marta upe aipo ehi:

—Marta, Marta, ¿mahera vo ereyemañeco etepri tēi setá mbahe apo āgua eico?

<sup>42</sup> Iya rumo ñepe mbahe yaposa. Co nde cupihir oiporavo ahe mbahe aviye catu vahe oyeupe che ñehe renduse; ndipoi chietera que ava virocua vaheerā ichui —ehi Jesús Marta upe.

## 11

*Jesús ombohe güemimbohe eta yerure āgua rese*

<sup>1</sup> Ñepe ari Jesús oyerure. Iyerure pare semimbohe aipo ehi chupe:

—Ore Yar, ore mbohemi tēi ore yerure āgua rese eve inungar Juan ombohe güemimbohe eta sereco yepi —ehi chupe.

<sup>2</sup> —Aviye —ehi—. Peyeroquise, aipo peyera:

‘Ore Ru Tũpa, ìvave ereico vahe, imboeteiprì nde rer tasecoi.

Tou nde mborerecuasa oreu.

Tayaposa nde remimbotar co ìvì pipe, ìva pendar nungar.

<sup>3</sup> Embou ore rembihu arì yacatundar oreu.

<sup>4</sup> Iyavei ndeñero ore angaipa rese oreu.

Esepia niha, ore oreñero opacatu ore amotarêhimbar upe.

Ore mboangaipa ucai rene eve, ore renose catu mbahe tẽi sui eve’ peyera —ehi

<sup>5</sup> Iyavei aipo ehi no:

—Inungar co perecora pe mborìpar viña. Ipare pesora ahe sètave pĩtu mbìter rupi aipo peyera chupe: ‘Che mborìpar, emboumi tẽi mbosapì pan cheu tamboyevìre ndeu.

<sup>6</sup> Esepia, ambuae che mborìpar oyepota ou che rêtave; ndarecoi eté rumo mbahe amondomi va-herã chupe’ peyera chupe.

<sup>7</sup> Ipare ahe, ‘Che mañeco tẽi rene eve. Esepia, opa ayoquenda, iyavei co che rahìr opa aropìtuhu seru. Sese ndiyai apũha mbahe mondo ndeu’ ehiñora pẽu viña.

<sup>8</sup> Supi eté, yepe nopuhai chietera mbahe mondo pẽu pe mborìpar secose viña, opũhaño itera rumo ‘tache mañeco iri eme’ oyapave. Ipare omondoño itera opacatu mbahe pe porandusa pẽu.

<sup>9</sup> Sese aipo ahe pẽu: Peporandura mbahe rese Tũpa upe, ahese omboura pẽu; peseca ahe mbahe, ahese peyosura; inungar pemota oquenda, êgüe peyera peyeroquisa pipe Tũpa upe, ahese imbois-ara mbahe mbou ãgua pẽu.

<sup>10</sup> Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeriquisa pipe omota vahe oquenda Tūpa upe, chupe imboisara.

<sup>11</sup> “Oimese tahi vahe pe pãhuve, tahir oporanduse pira rese vu upe, ¿omondora pīha mboi tēi guahir upe viña?

<sup>12</sup> anise, ¿omondora pīha oporanduse mbahe rupiha rese, mbahe rumbiquiãpe tēi chupe viña?

<sup>13</sup> ¡Aní! Esepia, pe yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar omondo catura Espíritu Santo acoi ava oyeupe porandusar upe!” ehi güemimbohe eta upe.

*“Jesús vireco carugar pīratasa oyese” ehi tupri tēi ava yuvireco*

<sup>14</sup> Ambuae ari pipe, Jesús osepia mbia carugar nomoñehengatui vahe. Evocoyase omose carugar ichui. Aheseve voi iñehengatu. Ipare ava rehii sepiase, ndoyembovīhai tēi yuvireco.

<sup>15</sup> Amove rumo ava aipo ehi tēi yuvireco: “Beelzebú, carugar rerecuar pīratasa pipe revo omboyepipi carugar oico” ehi tēi yuvireco chupe.

<sup>16</sup> Ambuae ava secoãhasa pipe oporandu yuvireco chupe: “Eyapo ru mbahe nde rembiapo iva pendar nde recocuer cua ãgua” ehi tēi.

<sup>17</sup> Ahe rumo oicuaño ipihañemoñetasa. Evocoyase aipo ehi chupe:

“Que mborerecuar guasu povri pendar ovavavase oyeupe oyeamotarēhisave yuvireco, ahese evocoi mborerecuar pīratasa ocañi tēira. Iyavei

ava omu rese ae oyeamotarēhi vahe, oyemocañi aveira yuvireco no.

18 Ēgüe ehi avei niha carugar. Esepia, sereciar omboyepēpise opovri pendar, ovavara oyeupe yuvireco viña. Ahese oyemocañi tēira yuvireco. Co ñehesa aipo ahe pēu. Esepia pe, ‘Beelzebú pīratasa pīpe tēi opa omose carugar ava sui oico’ peye tēi cheu.

19 Ēgüe ahese rumo viña, ¿ava pīratasa pīpe ru evocoyase pe voya omboyepēpi carugar ava sui? Pe voya ae omboyecuarā pe ñehe pe rembiavi yuvireco pēu.

20 Che rumo Tūpa pīratasa pīpe carugar amboyepēpi ava sui. Sese cūrītei Tūpa mborerecuasa oyepota ité pēu.

21 “Inungar oime ava ipīrata etepri vahe, iyavei vireco oyeroyasa. Ipīpe osāro güēta opacatu mbahe ipīpendar avei icañiēhi āgua.

22 Acoi ouse rumo ambuae ipīrata catu vahe chupe, ahe osecoreroyise, opa vīrocua iyeroyasa ichui. Evocoyase güembierocua ahe opa vīraso oyeupe.

23 “Acoi ava ndache mboyoyai vahe, ahe che amotarēhimbar yuvirecoi; iyavei acoi ava ndosecai vahe ava cheu, ahe omosai tēi yuvireco che sui” ehi.

### *Carugar oyevi iri güeco agüerve*

24 “Acoi osēse carugar ava sui, uguata tēi ivi ipiru vahe rupi opituhu āgua reca. Ipare rumo ndoyosuise, ipihañemoñeta oyeupe, ‘Ayevi irira che reco agüerve vicho’ ehi.

25 Aheve oyevise, osepia iri secocuer inungar oi sahuvapri tupri.

26 Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui” ehi Jesús ava rehii upe.

*Tūpa Ñehengagüer viroya vahe sovasapri secoira*

27 Oñehe viteseve aipo mbahe rese, cuña ava rehii pāhu pendar oñehe pīrata aipo ehi:

—¡Evocoi mbia sui ereha vahe iyavei nde mboacua vahe, ahe sovasapri tasecoi! —ehi chupe.

28 Ahe rumo aipo ehi:

—¡Acoi osendu vahe ité che Ru Tūpa Ñehengagüer iyavei viroya vahe ité, ahe sovasapri secoira che Ru Tūpa rovaque! —ehi ahe cuña upe.

*Ava eta ndaseco pōrai vahe oporandu poromondiisa rese yuvireco*

29 Ava rehii oyere ati vitesé Jesús rese yuvireco, ahe aipo ehi: “Pe cūriteindar ava ndaseco pōrai vahe, peporandu tēi poromondiisa che recocuer cua āgua rese. Che rumo namboyecuai chira ambuae poromondiisa pēu. Jonás recocuer rese güeraño opomomahenduhara.

30 Inungar Jonás poromondiisa secoi ava Nínive pendar upe, ēgüe ehi aveira niha Ava Riquehir reco pipe oimera poromondiisa ava cūriteindar upe.

31 Acoi ari cañi pipe cuña mborerecuar guasu irohi coti secua vahe porandusave omombehura co ava cūriteindar cañipa āgua. Esepia, ahe ou amombri ivi sui Salomón mbahecuasa rendu āgua;

cũritei rumo oime ivate catu vahe cohave Salomón sui.

<sup>32</sup> Iyavei ari cañi pipe ava tecua Nínive pendar porandusave omombehura ava cũriteindar cañipa ãgua. Esepia niha, omboasise oangaipa, oyevĩ Tũpa upe yuvireco Jonás omombehuse Tũpa Ñhengagũer chupe; cũritei rumo oime ivate catu vahe Jonás sui pe pãhuve” ehi.

*Tesapesa yande retecuer resendar*

<sup>33</sup> “Ndayañomi chira tataendi que imoendi imoi; ndayamondoĩ chiaveira que mbahevriive. Iy-acatu rumo yamondora ivate tataendi rendave ‘tosesape opacatu ava oi que vahe oi pipe’ yande yapavẽ.

<sup>34</sup> Iyavei pe resa inungar tataendi pe retecuer upe. Esepia, aviyese pe resa, opacatu pe retecuer upe osesape. Acoi imarase rumo, pe retecuer pĩtumimbi vahe nungar tẽi.

<sup>35</sup> Sese peicua catu co poroesapesa pereco vahe, tape rereco eme pĩtumimbi vahe nungar.

<sup>36</sup> Co supi eté vahe osesape tuprise opacatu pe pihave, ndipoise que pĩtumimbisa nungar mbahe ipipe, evocoyase ahe inungar tataendi osesape vahe opacatu pe recocuer pipe. Ahese ndipoi que pĩtu vahe pẽu” ehi.

*Jesús omombehu fariseo iyavei Moisés porocuita rese oporombohe vahe recocuerai*

<sup>37</sup> Opase oñehe Jesús, fariseo viraso gũõtave im-bocarú. Oiquese sètave oso, oguapĩ mesave oĩ.

<sup>38</sup> Ocaru renondeve ndoyepoise rumo, ahese fariseo ndoyembovihai tẽi nomboaviyese judío porocuita.

39 Ahe rumo aipo ehi fariseo upe:

—Inungar igua riru iyavei tembihu riru icupe rupi tēi yoseipri, ipipe rumo iquihā opitaño ité, ěgüe ehi tupri avei pe recocuer pe monda raisave mbahe-mbahe tēi pe reco pipe.

40 ¡Pe ndayaracuai vahe peico! ¿Ndapeicuai vo pe rete aposar, pe piha aposar avei?

41 Sese pemondo porrecosa ava iparaisu vahe upe pe recatēhiēhisa pipe. Evocoyase ipipe sui opacatu imoatirombri peicora.

42 “¡Peparaisu pe fariseo! Esepia, yepe pe remiti sui pemondo peyacatu ñepe-pe diez vahe sui Tūpa upe viña, pe rumo ndaperoyai teco ĩvisa iyavei peseyaño tēi Tūpa poroaisusa. Iyacatu rumo peyapora evocoi mbahe pe porrecosa sui pe poiēhisa pipe viña.

43 “¡Peparaisu pe fariseo! Esepia, peipota pe renda porañete catu vahe pe guapi āgua tūparo pipe, iyavei peipota pēu opacatu ‘avirave’ oyapora ava pe mboeteisave ocar rupi yuvireco.

44 “¡Peparaisu! Esepia, pe recocuerai inungar tehōgüer ruvipa icuaēhise ava oguata ihari rupi yuvireco” ehi chupe.

45 Evocoyase Moisés porocuita rese oporombohe vahe,

—Porombohesar —ehi—, aipo eremombehu vahe pipe niha ava ore amotarēhiño yuvireco —ehi.

46 Ahe rumo aipo ehi:

—¡Peparaisu avei pe Moisés porocuita rese oporombohe vahe! Esepia, pemondo porocuita yavai vahe ava upe; pe rumo evocoyase

ndapeipĩtĩvĩimi eté ahe ava imboaviye ãgua rese yuvĩreco.

47 “¡Peparaisu! Esepia, pemoingatu Tũpa ñehe mombehusar ruvipagũer peico Tũpa mboeteisa angahu pipe tẽi. Pe ramoĩ teieté rumo oyuca yuvĩreco.

48 Evocoiyase pemboyecua co pe ramoĩ eta pihañemoñeta agũer secocuer moña pipe peico. Esepia, ahe oyuca Tũpa ñehe mombehusar yuvĩreco. Pe evocoiyase cũritei pemoingatu vite suvipagũer peico.

49 “Sese Tũpa ombahecuasa pipe aipo ehi: ‘Amondora che ñehe mombehusar, apóstol avei ndiporeroyai vahe upe. Ahe ipãhu pendar oyucara yuvĩreco. Iyavei ambuae mara-mara tẽi virecora yuvĩreco’ ehi.

50 Esepia, ava ndiporeroyai vahe cũriteindar upe ité omondora oñemoĩrosa opacatu oñehe mombehusar yucagũer rese aracahe suive, cũriteindar avei oyucase yuvĩreco.

51 Abel yuca agũer suive oyepotara Zacarías yuca agũerve oso. Ahe oyuca tũparo maranehi rocar mbahe reropovẽhesa rovai. Supi eté aipo ahe pẽu: Tũpa opara omondo oñemoĩrosa ahe yuca agũer rese ava ndiporeroyai vahe cũriteindar upe curi.

52 “¡Peparaisu pe Moisés porocuita rese oporombohe tẽi vahe! Esepia, pe mbahecuasa aviye soquendapri pereco ava sui. Pe niha ndaperoyai, iyavei ambuae ava upe ndapeipotai seroya ãgua” ehi chupe.

53 Ipare Jesús osẽ oso ichui. Ahese Moisés porocuita rese oporombohe vahe iyavei fariseo



eta oñemoiró iteanga yuvireco sese. Ahe omañeco tēi, oporandu-randu mbahe rese yuvireco chupe,  
<sup>54</sup> osecoañha-ñha tēi mbahe pipe ‘toyavi angahu oñehe yandeu’ ohesa pipe yuvireco.

## 12

### *Fariseo recocuer rese Jesús oñehe*

<sup>1</sup> Ahe pipeve avei ava oñemonuha atí iteanga oyemboti tupri oyemombo guasu-guasú yuvireco. Yipindar Jesús güemimbohe upe rane omboipi oñehe: “Peñearo tupri fariseo pan mboapeposa nungar sui. Esepia, ahe ndoyavi supi tupri vahe viña; ndahei eté rumo.

<sup>2</sup> Esepia, yaposá vahe imombehupirēhi cūrítei icuasaño itera curi. Iyavei mbahe ñomipri icuasaño aveira no.

<sup>3</sup> Supi eté opacatu mbahe pemombehu vahe pītumimbisave, ahe sendusa tupri ara ari pipe coiye; iyavei acoi mbahe pemombehu vahe peyeupeñomi ‘tosendu eme ambuae ava’ pe hesa pipe, serosapucáisara oi harive opacatú ava rovaque” ehi.

### *¿Uma sui pñha siquiyesara?*

<sup>4</sup> “Iyavei aipo ahe pēu, che mboripareta: ndapesiquiyei chira acoi ava pe yuca potasar sui. Esepia, ipare ndoicatu iri ambuae mbahe apo ãgua pēu.

<sup>5</sup> Che rumo amombehura pēu uma sui pesiquiyera: acoi oicatu vahe omborerecuasa pipe pe yuca pare pemondo tata guasuve. Ahe ichui eté pesiquiyera.

<sup>6</sup> “Pe pemondo poyandepo v̄irai ñuvirío guarepochi rupivemi t̄ei yepi. T̄upa rumo ndasesarai eté que ñepe sui.

<sup>7</sup> T̄upa niha oicua ñepepei-pe yande ha retacuer. Sese, pesiquiye eme; pe niha ivate catu vahe ité peico opacatu v̄irai sui” ehi.

*“Che aroya ité Jesucristo” ehi vahe opacatu ava rovaque*

<sup>8</sup> “Acoi ava ‘che aroya Jesús’ ehi vahe opacatu ava rovaque, che avei, Ava Riqueh̄ir, ‘Co che reroyasar secoi’ aipo ahera che Ru upe sembiguai rovaque.

<sup>9</sup> Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoyase, ‘Co ndahei che reroyasar secoi’ ahe aveira che Ru T̄upa upe sembiguai rovaque” ehi.

<sup>10</sup> “Iyavei opacatu oñehe-ñehe t̄ei vahe che, Ava Riqueh̄ir, rese, ahe chupe oimeño ñeroisa. Acoi que ava iñehe-ñehe t̄ei vahe rumo Espiritu Santo amotar̄hisave, ahe chupe ndipoi chietera ñeroisa” ehi.

<sup>11</sup> “Acoi pe amotar̄hisar che recocuer sui t̄ei pe rerasose porandusave pe recoãha ãgua yuvireco, anise mborerecuar mbahe moingatuser rovai, que ambuae mborerecuareta upe avei no, ‘¿Mbahe p̄iha amombehura?’ ndapeyei chira.

<sup>12</sup> Esepia niha, ahe p̄ipeve voi Espiritu Santo pe mbohera aviyeteramo t̄ei mbahe mombehu ãgua rese” ehi güemimbohe eta upe.

*Ñearosa mbahe pota raisa sui*

<sup>13</sup> Ñepe m̄bia ava reh̄i p̄ahu pendar aipo ehi Jesús upe:

—Porombohesar, emombehumi che rriquehir upe, tomboyahomi tēi mbahe che mombahesa cheu —ehi.

<sup>14</sup> Ahe rumo omboyevī chupe:

—Che mboripar, che ndachecuitai mbahe moingatu āgua, mbahe mboyaho-yaho āgua avei —ehi ahe mbīa upe.

<sup>15</sup> Ipare aipo ehi:

—Peñearo tupri opacatu mbahe pota raisa sui. Esepia niha, ndahei mbahe rereco atī āgua pe recocuer —ehi.

<sup>16</sup> Ipare omboyoya ambuae mbahe rese imbohe: “Oime mbīa mbahe yar, iha tupri ai eté semiti.

<sup>17</sup> Ahese ipihañemoñeta oico oyeupe: ‘¿Mara ahera pīha che rembipoho rereco?’ ehi tēi. ‘Ndareco iri eté yapocatu āgua’ ehi.

<sup>18</sup> Ipare ipihañemoñeta cute: ‘Aicua mbahe che rembiaporā. Opara aroyī tembihu rēta. Ichui ayapo irira ambuae tuvichá catu vahe. Aheve ayapocatura che remiti rāhiī opacatu mbahe areco vahe avei no.

<sup>19</sup> Evocoiyase aipo ahera cheyeupe: Che mboripar, oime setá mbahe cheu araviter mombamomba āgua; sese cūrītei apituhura vichico, acarura, acahura iyavei ayemboviharetera no, ahera’ ehi.

<sup>20</sup> Tūpa rumo aipo ehira chupe: ‘Mbīa, nandearacuai eté eico, co pītu pipeve voi eté eremanora. Co mbahe nde rembiapocatu, ¿ava mahera pīha evocoiyase?’ ehira chupe.

<sup>21</sup> Ēgüe ehi eté niha que ava oyeupeñomi tēi mbahe omonuha atī vahe, iparaisu rumo Tūpa rovaque” ehi ahe mbīa upe.

*Tũpa osãro opacatu guahĩr*

<sup>22</sup> Ipare aipo ehi Jesús güemimbohe upe: “Co amombehura pẽu: Ndapeyemomahenduha guasu ai chira pe remihura rese pe recove ãgua, pe turucuarã rese tẽi avei no.

<sup>23</sup> Yande recovesa rumo aviye catu vahe tembihi sui; yande retecuer avei aviye catu turucuar sui no.

<sup>24</sup> Pesepia vĩrai: nomaheti vahe, nomonuhai vahe avei, ndovirecoi vahe avei mbahe rãhi rẽta yuvireco. Tũpa rumo omoime mbahe itohu. ¡Pe rumo ivate catu vahe ité peico vĩrai sui!

<sup>25</sup> Ndipoi eté que ñepi pe pãhu pendar oicatu vahe opihãmoñetá iteangasa pipe tẽi güecocuer mbosasaviño ãgua.

<sup>26</sup> Supi eté ndapeicatuise yapo, ndiyai peyemomahenduha guasu ai mbahe rese.

<sup>27</sup> “Pemahecua ru mbahe potri caha pipendar rese: ndoporaviqui eté iyavei ndoipiai oturucuarã. Iyavei no yepe mborerecuar guasu Salomón vireco setá mbahe iporañete vahe aracache viña, iturucuar catuprigüer rumo ndahoyoyai mbahe potri catuprigüer rese.

<sup>28</sup> Tũpa niha omboporañete raimi tẽi mbahe potri caha pipendar. Ichui sapisapaño horno pipe. ¡Ahe rumo omondo catura turucuar pẽu, pe ava nimbahe reroya tuprii vahe!

<sup>29</sup> Sese, ‘¿Mbahe pĩha yahura, mbahe pĩha yamondera?’ ndapeyei chira pe yemomahenduha guasu aisa pipe.

<sup>30</sup> Esepia, ava Tũpa reroyasarẽhi co ivi pipendar aipo nungar mbahe reseño tẽi ipihãmoñeta

yuvireco yepi. Pe Ru Tũpa rumo oicua ité pẽu mbahe ipane vahe.

<sup>31</sup> Avıye catu rumo pesecara pe Yar Tũpa povrıve pe reco ãgua, ahese omboura que mbahe ipane vahe pẽu” ehi.

*Ivave mbahe eta oime vahe yandeu*

<sup>32</sup> “Anı pesiquiye, che ovesa nungar, yepe pe movıromi tẽi peico viña, pe Ru rumo oporoaisusa pipe oipota opovrıve pe rereco ãgua.

<sup>33</sup> Pemondopa mbahe pereco vahe ava oipota vahe upe. Ipare pemondo sepri avei iparaisu vahe upe. Ahe yapocatusa ivave mbahe riru ndituyui vahe nungar pipe. Aheve ava imonda rai vahe ndoiqei chira ñomi ãgua pe sui iyavei mbahe rasoi nomomaraı chiaveira.

<sup>34</sup> Esepia, pe mbahe pe rembiereco setá catu vahesa rupi-rupi pe pihañemoñeta yepi” ehi.

*Peyemoingatu Tũpa Rahir yevi ãgua*

<sup>35</sup> “Peyemoingatu tuprı che yevi ãgua. Inungar tataendi ndogüei vahe, pemboyecua tuprıño ité che recocuer pe recocuer pipe ava upe.

<sup>36</sup> Peico imboacuaprı güerecuar osãro vahe nungar mendasa sui iyevise, oquenda imotase, omboi voi vahe yuvireco chupe.

<sup>37</sup> Avıye itera serecuar upe osepiase iyemoin-gatu voi; evocoyase serecuar ae niha ihañecora sese, omboguapıra mesave imbocarı.

<sup>38</sup> Yepe serecuar oyepotara pıtu mbıter ou viña, anise añihiveive, ahe rumo osãroño itera chupe imboi ãgua yuvireco. Evocoyase serecuar avıye ai etera chupe.

<sup>39</sup> Peyapısaca tuprı co rese: acoi oi yar oicuaese mbahe hora imonda vahe yepota ãgua, ahese opıtara imonda vahe rãro güeta pıpe sui mbahe renoseẽhi ãgua.

<sup>40</sup> Ëgüe peye aveira peyemoingatu che yevi ãgua. Esepia niha, che, Ava Rıquehir, aporoesapıha tẽira vitu curi” ehi Jesús viroyasareta upe.

*Mbiguai omboaviye vahe ocuaita iyavei nomboaviyei vahe*

<sup>41</sup> Evocoiyase Pedro oporandu Jesús upe aipo ehi:

—Che Yar, ¿oreuñomi pıha eremombehu co porombohesa eremboyoya vahe ambuae mbahe rese, opacatu upe tie? —ehi.

<sup>42</sup> Evocoiyase omboyevi Pedro upe aipo ehi: “Acoi ava mbahe rese ñangarecuar omboaviye tuprı vahe ocuaita, yaracua vahe avei, ahe chupe serecuar oseya icuaitarã güeta pıpendar rese hañeco ãgua ‘tembihu tomondo che rêta pıpendar upe che porocuaita rupi’ ohesave.

<sup>43</sup> Acoi omboaviyese ocuaita, ahese ovıharetera güerecuar yevise.

<sup>44</sup> Supi eté niha, serecuar oyocuaıra opacatu ombahe rese hañeco ãgua.

<sup>45</sup> Ahe mbiguai rumo ‘ndoyepota vıtei chira revo che rerecuar’ oya omboetasa cuimbahe iyavei cuña omboıpi mara-mara tẽi sereco iyavei ocaru, oihu tẽi osavaıpo-ıpoño avei oico.

<sup>46</sup> İpare rumo serecuar oyepotara imahemohaẽhiseve; ahese omombaraisu catura inupa sereco, inungar acoi ndıporeroyai vahe rerecosa yepi” ehi.

47 “Acoi mbiguai oicua tēise mbahe güereciar remimbotar; noyemoingatuisse rumo iyavei ndoviroyaise oico, ahe evocoyase sereciar oinupara.

48 Acoi mbiguai nomboaviyei vahe ocuaita icua tupriēhisa pipe, nañemoirosa rutei chira chupe. Esepia niha, acoi imondosa catu vahe icuaitarã, porandusa catura chupe. Acoi oyeroya catu vahe, oporandu catu aveira sese” ehi.

*Jesús reroyasa pipe sui oimera yeamotarēhisa*

49 “Che ayu tata nungar yavai vahe reru ãgua co ivi pipendar upe ‘joyandu tarahu yuvireco cute viña!’ viya.

50 Aique ranera rumo mbahe tēi che recoãhasa pipe, jēgüe ahera che paraisú itera imboaviye ãgua!

51 ‘Mbahe tupri ai revo güeru co ivi pipe’ ndapeyei chira cheu. Ēgüe ehi rumo che ayu che sui ava yeamotarēhi ãgua.

52 Esepia niha, co pipe suive ité que poyandepo tupri revo oñemu yuvirecoi vahe amove oyeamotarēhira yuvireco che recocuer sui: mbosapi oyamotarēhira ñuvirío vahe, ñuvirío vahe evocoyase oyamotarēhira mbosapi vahe yuvireco.

53 Que ava oyamotarēhira guahir; anise tahir evocoyase oyamotarēhira vu; cuña oyamotarēhira omembri, imembri evocoyase oyamotarēhira osi; sovayar oyamotarēhira vovayar” ehi güemimbohe upe.

*Iva pendar poromondisa mboyecuasa*

<sup>54</sup> Ipare Jesús aipo ehi ava rehi upe: “Pe pesepiase mbahe pĩtu ari sosa coti sui opũhase, ahese, ‘Oquirá’ peye. Ëgũe ehi eté oqui.

<sup>55</sup> Iyavei acoi ivĩtu oipeyuse irohi coti sui, ahese, ‘Sacú iteangara’ peye. Ipare ëgũe ehi eté.

<sup>56</sup> ¡Pe Tũpa reroyasar angahu tẽi peico vahe! Pe niha peicua mbahe iva rese oyecua vahe tẽi iyavei ivi rese mbahe oyecua vahe tẽi mombehu, ¡mahera ru ndapeicuai peyeupe mbahe cũritei oime vaherã mombehu peico!” ehi.

### *Peñero pe amotarẽhimbar upe*

<sup>57</sup> “¿Mahera napesãha ranei pe ae ité co mbahe supi eté vahe?

<sup>58</sup> Acoi que ava nde amotarẽhisar nde soho ucase nde mondo ãgua mborerecuar rovai, emoin-gatu tupri voi mbahe eico chupe tenondeve nde rerasoẽhi ãgua sovai; anise, mborerecuar nde mondora ava naporai vahe rarõsar upe. Ahe evo-coiyase nde roquendara.

<sup>59</sup> Supi eté nderesẽi chietera acoi erem-boepipase voi eté eresẽra ichui” ehi ava rehi upe.

## 13

### *Aviye catu ité yañecuñaro*

<sup>1</sup> Ahe pipeve avei yuviraso ava Jesús repia. Ahese omombehu Pilato mbia Galilea pendar yuca uca agüer: Ahe mbia viropovẽhese mbahe mimba yucapri yuvireco chupe. Ahe suvi oyeseha mbahe mimba ruvi rese.

<sup>2</sup> Ipare Jesús aipo ehi chupe: “Pemoha co pe: Mbahe tẽi oime vahe evocoi mbia Galilea pendar



upe, yangaipa guasu catu rese ambuae güecua pendar sui êgüe ehi mbahe chupe viña.

<sup>3</sup> ¡Aní rumo! Acoi ndapemboasiise pe angaipa Tũpa upe pe yevi ãgua, pe avei opara pecañi tẽi.

<sup>4</sup> Peroya avei acoi ava dieciocho tupri yuvirecoi vahe omanopase Siloé torre oviapise iharive, ‘Ahe yangaipa catu yuvireco ambuae ava Jerusalén piendar sui’ peye viña no.

<sup>5</sup> Aní rumo; acoi ndapemboasiise pe angaipa Tũpa upe peyevi ãgua, pe avei opara pecañi tẽi” ehi.

### *Yembohesa ivira higuera ndihai vahe resendar*

<sup>6</sup> Evocoiyase Jesús omombehu mbahe omboyoya oporombohe ambuae mbahe rese aipo ehi: “Oime mbia vireco vahe ivira higuera oco pipe. Setá ari ahe oso sepia ‘¿iha pĩha?’ oyapave. Ndosecai eté rumo iha sese.

<sup>7</sup> Ahese aipo ehi mbia oco rãrosar upe: ‘Esendu, che ayu pihi tẽi higuera ha reca mbosapi araviter rupi. Ndasepiyai eté rumo que ñepe iha sese yepi’ ehi. ‘Eyasiapa; ndiyai ihã i tupri tẽi cohavẽ’ ehi.

<sup>8</sup> Ico rarõsar rumo omboyevi chupe aipo ehi: ‘Che rerecuar, êgüe tehiño vite tẽi rane co araviter; amonguhira ivi chupe. Ipare amondora ivi sũ vahe mbahe repochi resendar sese.

<sup>9</sup> Ahese revo ambuae araviter ihara cute; anise ité rumo, ereyasia ucaño itera’ ehi ico rãrosar güerecuar upe” ehi Jesús ava mbohe.

### *Jesús ombogüera cuña oyecuhapami vahe mbituhusa ari pipe*

<sup>10</sup> Ñepe mbituhusa ari pipe Jesús oporombohe judío tũparo pipe.

<sup>11</sup> Aheve oime cuña imbaheasi vahe, dieciocho araviter rupi ahe mbaherasisa vireco, carugar tēi omboyeapami uca sereco. Sese ndoicatu opūha tupri uguata.

<sup>12</sup> Osepiase rumo Jesús, “Erio” ehi chupe.

—Cuña, cūritei nanembaheasi iri eico cute —ehi.

<sup>13</sup> Evocoyase omondose opo sese, aheseve voi cuña oyemohivi. Ipare omboetei Tūpa oico.

<sup>14</sup> Judío tūparo rerecuar rumo oñemoiro ahe cuña mbogüerasa rese mbituhusa ari pipe. Sese aipo ehi ava eta upe:

—Oime niha seis ari mboraviqui āgua; ahe ari pipe peyura peposano āgua, ndahei chira mbituhusa ari pipe —ehi.

<sup>15</sup> Evocoyase ahe mbia upe omboyevi aipo ehi:

—Pe Tūpa reroyasar angahu tēi peico vahe, ¿nombohūi vo pe pāhu pendar acoi güeimba tivi iyavei guaricu mbituhusa ari pipe yuvireco yepi no?

<sup>16</sup> Co rumo cuña, Abraham suindar Carugar omombaheasi vahe dieciocho araviter suive sereco, ¿ndiyai eté pīha evocoyase imbogüerasa mbituhusa ari pipe? —ehi tūparo pendar rerecuar upe.

<sup>17</sup> Aipo ehise, opacatu yamotarēhisar yuvinochi tēi yuvireco ichui. Ambuae ava rumo oyembovīhaño opacatu Jesús rembiapo osepiase yuvireco.

### *Yembohesa mostaza rāhi suindar*

<sup>18</sup> Evocoyase Jesús aipo ehi avei: “¿Mbahe nungar pīha Tūpa povri pendar, iyavei mbahe rese vo amboyoyara?”

19 Oyoya tupri ité mostaza rãhi rese, inungar acoi mbia oñoti vahe oco pipe. Ichui ocuacua, tuvichá iteanga. Ahe sãca rese vĩrai rehii oyapo guaitirã” ehi oporombohe.

*Yembohesa pan mboapeposa sui*

20 Evocoyase Jesús aipo ehi iri: “¿Mbahe rese pĩha amboyoyara Tũpa povri pendar?”

21 Oyoya tupri co pan mboapeposa rese, acoi cuña omboyeseha tupri vahe mbosapi sãhambri trigo cuhi rese opacatu imboapepo ãgua yepi” ehi oporombohe.

*Jesús peri icãhimi vahe nungar*

22 Ipare Jesús osoño Jerusalén ve, opita-pita tecua yacatu rupi oporombohe oico.

23 Ahe supi ichose, ñepi mbia oporandu chupe aipo ehi:

—Che Yar, ¿supi eté pĩha moviromi tẽi ava oñepisirora yuvienco? —ehi.

Ahe evocoyase omboyevi chupe:

24 —Peyemoviracua tupri catu peique ãgua oquendipi cãhimi rupi. Esepia niha, supi eté setá ava osãha tẽira yuviroique vaherã ahe oquenda rupi yuvienco viña, ndoyuviroique catui chira rumo yuvienco.

25 Supi eté ahe inungar oi yar ouse oquenda mboya viña. Amove ava evocoyase ocarve yuvienco vite vahe omota tẽira oquenda, ‘Ore yar, emboimi tẽi oreu’ ehi tẽira yuvienco. Ahe rumo aipo ehiñora chupe: ‘Aní, ndopocuai vahe rumo pe’ ehiñora chupe.

26 Evocoyase ahe aipo ehi tẽira yuvienco: ‘Ore niha orocarua vahe, oroihu vahe nde piri, iyavei

ore mbohe ore rocar rupi eve yepi' ehi tēira yuvireco chupe.

<sup>27</sup> Ahe rumo aipo ehira: 'Ñepeí reseve niha acoi, Ndopocuai vahe, ahe pēu. ¡Pesiri che sui, pe opacatu mbahe-mbahe tēi aposar!' ehiñora chupe.

<sup>28</sup> Pe rumo imomboprira pe recocuer Tūpa povri sui, sese peyaseho tēira, peyemoaitere tēira peico pesepiase Abraham, Isaac, Jacob iyavei opacatu Tūpa ñehe mombehusareta yuvirecoise Tūpa povri ve ivave.

<sup>29</sup> Iyavei ava yugüerura añihivei coti sui, caharu coti sui, norte coti sui iyavei irohi coti sui, ahe evocoyase yuviroguapira ocaru Tūpa mborere-cuasave ipiri yuvireco.

<sup>30</sup> Supi eté amove ava ndoyavi ipa tēi vahe seique ãgua ivave Tūpa piri viña, ahe ranengatu rumo yuviroiqueño itera ipipe iyavei amove ava tenonde catu vahe ndoyavi ahe rane oique va-herã ivave viña. Ahe rumo ipa tēi yuviroiquera — ehi Jesús ava rehí upe.

### *Jesús oyaseho Jerusalén pendar rese*

<sup>31</sup> Ahe ari pipe oyepota moviro fariseo aipo ehi tēi Jesús upe yuvireco:

—Eyepepiño ave sui. Esepia, Herodes niha nde yuca pota oico — ehi tēi yuvireco chupe.

<sup>32</sup> Ahe rumo,

—Peso, tapemombehu aipo mbia aguara nungar tēi upe: 'Esepia, co pipe iyavei ayihive amboyepepiñora ava sui caruguareta vichico, ambogüerañora ava imbaherasisa sui, curi ayihive evocoyase amombara che cuaita' peyera.

<sup>33</sup> Che rumo aporaviquiño itera co pipe, ayihive iyavei curi ayihive vichico. Ipare asora Jerusalén ve. Esepia niha, ndiyai Tūpa ñehe mombehúsar omano co coti tēi Jerusalén sui yuvireco —ehi.

<sup>34</sup> “¡Too rutei pe Jerusalén pendar, peyuca vahe Tūpa ñehe mombehúsar, iyavei ita pipe peyapiyapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrive, êgüe ahe pota tēi pe rereco viña, pe rumo ndapeipotai eté!

<sup>35</sup> Sese seyapirã tēi peicora. Iyavei ndache repiai chiaveira peye acoi, ‘Imboetepri Yar remimbou tasecoi’ peyese voi che repia irira peye” ehi Jerusalén pendar upe.

## 14

### *Jesús ombogüera mbia iruru sui*

<sup>1</sup> Ñepeí mbítuhusa arí pipe Jesús oso ocaru mborerecuar fariseo rētave. Aheve ambuae fariseo eta oiviro yuvireco.

<sup>2</sup> Aheve avei mbia iruru vahe secói.

<sup>3</sup> Evocoyase Jesús oporandu Moisés porocuita rese oporombohe vahe upe iyavei fariseo eta upe avei aipo ehi:

—¿Ipotasa vo mbítuhusa arí pipe imbaheasi vahe mbogüera ägua; aní tie? —ehi.

<sup>4</sup> Ahe rumo noñeheiño yuvireco chupe. Aheve ahe opoco imbaheasi vahe rese, ombogüera. Ipare, “Eso tupriño” ehi chupe.

<sup>5</sup> Fariseo eta upe evocoyase aipo ehi:

—¿Ava pñha pe pñhu pendar novinose voi chira güeimba guaricu, anise tñvi ovñapise ivicuar pipe mbítuhusa arí pipe viña? —ehi.

6 Ahese nomboyevî catui eté ñehe yuvîreco chupe.

*Jesús ombohe mendasave ichohopri yuvîreco*

7 Ava ichohopri oiporavo-ravo güenara imboyeroyapri catu vahe mesave oyeupe nara yuvîreco. Ahe sepiase aipo ehi Jesús imboaracua:

8 —Acoi que yande soho ucase mendasa pietasave yuvîreco, ndayaguapî chira ava imboeteipri catu vahe renda harive. Esepia, aviyeteramo que ambuae ava ichohopri oyepotara yande sui imboeteipri catu vahe yuvîreco.

9 Ipare yande soho ucasar aipo ehira yandeu: ‘Epûha evocoi sui, co mbia toguapî eipeve’ ehira yandeu. Evocoiyase yande yachî tēira yaso ipami tēi yaguapî.

10 Yande soho ucase rumo yuvîreco, yaguapîra evocoiyase ipa; yande soho ucasar ouse, aipo ehira yandeu: ‘Mborî, erio cohava tenda imboeteipri catu vahesave ore pîri’ ehira. Ëgüe yahera imboeteipri yaico acoi ava yuvîroguapî vahe rovaque yande pîri.

11 Esepia niha, acoi ava oyemboivate ai vahe opara seco reroyisa; acoi ava seco mbegüe vahe rumo, ahe seco mboivate catusara curi —ehi.

12 Ipare aipo ehi avei ichohosar upe:

—Ereyapo potase pieta, ndereichoho ucai chira nde mborîpar, que nde rivri, que nde mu iyavei que nde rêta cotindar imbahe eta vahe. Esepia niha, ahe omboyevîra ndeu, nde soho ucara oyepîri yuvîreco; Ëgüe ehira evocoiyase mbahe imboyevîpa yuvîreco ndeu.

<sup>13</sup> Ereyapose rumo pieta, ereichoho ucara ava iparaisu vahe, ava ipo ichutu vahe, anise ipi chutu vahe, ipãri-pãri vahe, ndasesapisoi vahe avei.

<sup>14</sup> Esepia niha, ahe ndoicatui mbahe mboyeve i yuvireco ndeu. Opase rumo ocuerayevi ava seco catupri vahe yuvireco, ahese ereviharetera eico. Esepia, ereipisira mbahe aviye vahe Tũpa suindar —ehi.

*Jesús oporombohe carusa rese*

<sup>15</sup> Iñehe renduse rumo, ñepe i mbia yuviroguapi vahe mesave, ahe aipo ehi Jesús upe:

—¡Sovasapri catu ava Tũpa piri ocaru vahe imborerecuasave! —ehi.

<sup>16</sup> Evocoyase aipo ehi ahe mbia upe:

—Oime mbia oyapo vahe carusa guasu, oichoho uca ava setá oyepiri.

<sup>17</sup> Ipare oyepotase ari caru ãgua, ahese aipo ehi güembiguai mondo: ‘Toyugüerupa che piri ichohopri. Esepia niha, mbahe opa oingatu cute’ ehi.

<sup>18</sup> Opacatu rumo ava, ‘Eñemosañomi tẽi cheu’ ehi pãve yuvireco. Yipindar mbia aipo ehi: ‘Che rumo arocuai i vi; iya ite aso sepia. Sese eñemosañ cheu’ ehi chupe.

<sup>19</sup> Ambuae mbia aipo ehi: ‘Che arocuai ramo diez tupri tivi, ahe asãha ranera. Sese eñemosañ cheu’ ehi chupe.

<sup>20</sup> Ambuae aipo ehi no: ‘Che amenda ramomi vichico. Sese tẽi ndasoi chira’ ehi.

<sup>21</sup> Oyeveise mbiguai, opa tupri omombehu mbahe güerecuar upe. Ahese serecuar aipo ehi oñemoirosa pipe güembiguai upe: ‘Eso voi evocoyase opacatu ocar rupi. Supi sui eru ava

ipara:sumi vahe, que ava ipo chutu vahe, anise ipi chutu vahe, que ndasesapiso: vahe, anise que ava ipãri-pãri vahe avei no' ehi.

22 Coiye ava reru pare aipo ehi mbiguai güerecuar upe: 'Che rerecuar, aroya ité nde che cuaita; ipane vite rumo ava' ehi.

23 Evocoyase aipo ehi güembiguai upe: 'Eguata iri ambuae peri tecua ivirindar rupi avei toyugüerumi che rêtave yuvireco che piri, tomboapipopa ité che rêta yuvireco' ehi.

24 'Esepia niha, acoi yipindar ava aichoho uca vahe ndipoi chietera que ñepe: ocaru vaheerã che piri' ehi güembiguai upe —ehi Jesús ahe mbiã mbohe.

### *Yavai Cristo rupi guata ãgua*

25 Ava rehi Jesús raquicuei uguata yuvireco. Sese ahe oyemboyere aipo ehi ava upe:

26 "Acoi oimese que ava oipota vahe che rupi uguata ãgua, tache raisu catu que ambuae ava sui, que oyesupa, osi, güembireco, guahireta, vivireta iyavei güeindireta sui, oyesui avei. Ëgüe ndehise, evocoyase ndiyai chupe che remimbohe seco ãgua.

27 Iyavei que ava noñemosañoi vahe mbahe-mbahe tẽi upe oiporarase ari yacatu rupi inungarra ocurusu rese ovosii vahe viña che rupi uguata ãgua, ahe chupe ndiyai che remimbohe seco ãgua" ehi.

28 "Que ava pe pãhu pendar omopuha potase oi, ¿ndoyapisaca ranei chira '¿amomba angara pãha?' oyapave?"



<sup>29</sup> Esepia niha, omondose oi renara yipindar. Ipare rumo nomboaviye catuise, ahese opacatu ava sepiase viroĩrora

<sup>30</sup> aipo ehira yuvireco: ‘Aye evocoi mbia omopuha pota tēi oi viña, ndoicatui eté rumo imboaviye’ ehira yuvireco chupe.

<sup>31</sup> Iyavei que mborerecuar guasu diez mil sundao vireco vahe oyeepi potase ambuae mborerecuar veinte mil ava vireco vahe sui, oyapisaca ranera yipindar icua tupri ãgua ‘¿yaicatura pĩha setá catu vahe rese yavava?’ ohesave.

<sup>32</sup> Esepia, ndoicatuise, evocoyase ambuae mborerecuar guasu amombri vite secoise, omondora mbahe mombehusar mbahe tupri rese porandu ãgua chupe.

<sup>33</sup> Ēgüe ehi avei pe recocuer ndapeseya potaise pe mbahe opacatu, ěgüe ehi vahe ndahei eté che remimbohe” ehi.

### *Yande recocuer inungar yucri*

<sup>34</sup> “Yucri aviye vahe ité yandeu; nasehe irise rumo, ndayaicatui chietera imoehe iri ãgua.

<sup>35</sup> Naporai eté ivi upe nara; ndiyai avei ivi mbahe repochi resendar rese oyeseha vaherã. Evocoyase ahe imombopri tēi vaherã. Sese aipo ahe acoi ava oyapisaca pota vahe, toyapisacaño” ehi.

## 15

### *Porombohesa ovesa ocañi tēi vahe resendar*

<sup>1</sup> Opacatu ava sui guarepochi rerocuasar yuvirecoi vahe iyavei ava eta yangaipa guasu

vahe, oyemboya Jesús rese iñehe rendu ãgua yuvireco.

<sup>2</sup> Sese fariseo yuvirecoi vahe iyavei Moisés porocuita rese oporombohe vahe yuvireco, ahe oviroĩro tẽi yuvireco aipo ehi:

—Co mbia ombori pota rai ava yangaipa guasu vahe tẽi oico yepi, ocaru avei ipãhuve no —ehi.

<sup>3</sup> Evocoyase Jesús omombehu ovesa resendar yembohesa:

<sup>4</sup> “Que ñepeï pe pãhuve virecose cien ovesa güeimba, ipare co ocañira ñepeï ichui viña, oseyá ranera evocoyase evocoi noventa y nueve tẽi aviye vahesave seco ãgua. Ipare oyevira ocañi vahe reca oso, oyosu rane itera viña.

<sup>5</sup> Oyosuse, osupira oachihive vorivetesá pipe.

<sup>6</sup> Ipare oyepotase güetave, omonuhara omboripareta, ocotindareta avei no. Ipare aipo ehira chupe: ‘Yayembovihara che piri. Esepia niha, ayosu ité ovesa ocañi vahecuer cute’ ehira.

<sup>7</sup> Supi eté ãgüe ehi aveira oime torivetesá guasu catu ivave acoi ñepeï ava yangaipa guasu vahe oñecuñarose güecocuerai sui noventa y nueve yuvirecoi tupri vahe sui yuvireco” ehi.

### *Yembohesa guarepochi ocañi vahe resendar*

<sup>8</sup> “Acoi que cuña omocañise ñepeï guarepochi diez tupri vireco vahe sui, omoendira tataendi. Ipare osahuvara oi, oseca mbegüera, oyosu rane itera.

<sup>9</sup> Evocoyase oyosuse, omonuhara omboripareta, ocotindareta avei no chupe aipo ehira: ‘Yayembovihara che piri. Esepia niha,

ayosu guarepochi che sui ocañi vahecuer cute' ehira.

<sup>10</sup> Supi eté ãgüe ehi aveira oime torivetesá Tũpa rembiguai iva pendar rehi upe que ñepeí ava yangaipa guasu vahe oñecuñarose güecocuerai sui" ehi.

*Yembohesa mbia rahir ocañi vahe resendar*

<sup>11</sup> Aipo ehi avei oporombohe: "Oime mbia vireco vahe ñuvirío guahir.

<sup>12</sup> Chĩhivahe catu vahe aipo ehi oyesupa upe: 'Che ru, embou mbahe che mombahe che' ehi. Iyesupa evocoyase omboyaho ombahe imondo chupe.

<sup>13</sup> Ipare coiye catumi, omonuhapa opacatu ombahe. Ichui oso amombri ambuae tecuave. Aheve oguarepochi oiporupa tẽi ombahe pota raisa pipe.

<sup>14</sup> Acoi oiporupa tẽise rumo opacatu ombahe, ahese oime tiavor ahe ivi rupi. Ahe evocoyase ndasiepoi tẽi oico.

<sup>15</sup> Evocoyase oso mboraviqui reca mbia piri aheve. Ahe mbia evocoyase omondo ocove güeimba cuchi rãro ãgua.

<sup>16</sup> Aheve oyemohitaro pota tẽi cuchi rembihi pipe oico viña. Ndipoi eté rumo omondo vahe chupe.

<sup>17</sup> Evocoyase oyemomahenduha tẽi güeta pendar oporaviqui vahe rese: '¡Che ru rõtave oporaviqui vahe rumo co omoumbire guasu-guasú tẽi güembihu yuvireco! ¡Che rumo che yuca pota tẽi che rieporẽhi che rereco cohavel

<sup>18</sup> Sese ayevira che ru rõtave. Aipo ahera chupe: Ayemboangaipa Tũpa rese, nde rese avei no.

19 Ahese che ndahe iri chira nde rahir nungar aico; iyacatu revo ndeu, oporaviqui vahe nungar tēi che rerecoñora eve, ahera' ehi.

20 Evocoyase oyevi iri oso vu rētave cute.

“Amombri vitemi tahir recose rumo iparaisu catu chupe, oña voi oso guahir rovaichi, oyaco osovaupite avei.

21 Ahese tahir aipo ehi chupe: ‘Che ru, ayemboangaipa Tupa rese, nde rese avei; ndiya iri nde rahir che reco āgua’ ehi.

22 Tu rumo aipo ehi güembiguai upe: ‘Peso, tape-rumi aviye catu vahe turucuar pemboyemonde, pemonde avei cuã penda sese, pitaqui avei.

23 Iyavei guaca iquira catu vahe peyuca. ¡Yayapora pieta guasu!’ ehi.

24 ‘Esepiá, co che rahir aviye omano vahe secoi viña, cūrítei rumo oyevi iri cheu’ ehi. Ēgüe ehi opacatu sorivete yuvireco pieta apo.

25 “Tahir cuacua catu vahe rumo ocove vite secoi. Oyevisé ou güéta rerovicave, osendu voi ipieta guasu vahe yuvireco.

26 Evocoyase oporandu mbiguai upe mbahe oime vahe rese.

27 ‘Nde rivri mo co oyevi tupri iri ou. Sese nde ru oyuca uca guaca iquira vahe iyevisa resendar’ ehiño.

28 Evocoyase tiqehir oñemoirosa pipe, ndoique potai oyesupa uve oi pipe; tu rumo osēño ité ocarve ‘eique’ oya chupe.

29 Evocoyase tahir omboyevi chupe aipo ehi: ‘Che niha setá araviter rupi oropitivi vichico nde mboyeroyasave viña, nderemboumi eté rumo que

mbahe cheu, que mbahe mimba angara viña che mboripar rese ore pieta ãgua' ehi vu upe.

<sup>30</sup> 'Indó, cūritei oyepota ndeu nde rahir, omocañi tēi vahe nde guarepochi cuña ndipihai vahe rese tēi. Ahe eremboetei catú che sui; ereyuca uca rutei guaca iquira vahe chupe' ehi.

<sup>31</sup> "Evocoyase tu: 'Eyapisacaño, che rahir, nde niha nderesiri vahe che sui. Opacatu che areco vahe rumo nde mbahe ité yepi.

<sup>32</sup> Cūritei rumo iyacatu ité yande rorivetesave yayapora pieta. Esepia, co nde rivri ocañi tēi vahecuer rese yamahe iri' ehi guahir upe" ehi Jesús ava eta mbohe.

## 16

*Mbahe yar mbahe rese ñangarecuar ndoyemboaracuai vahe resendar yembohesa*

<sup>1</sup> Jesús aipo ehi avei güemimbohe eta upe: "Oime mbia imbahe eta vahe. Ahe vireco mbia ombahe eta rese ñangarecuar. Ahe chupe ava yugüeru mbahe mocañi tēi agüer mombehu.

<sup>2</sup> Evocoyase serecuar ñepeí opitiviisar omondo seca, ahe güeruse, '¿Mbahe vo aipo ereyapo eico; ayandu cūritei nde rerãcua? Emoingatupa tupri voiño nde poraviquisa resendar cheu' ehi, 'Nandehañeco iri chira cohava mbahe rese cheu' ehi, 'Nandehañeco iri chira cohava mbahe rese cheu' ehi chupe.

<sup>3</sup> Evocoyase mbahe rese ñangarecuar: '¿Mara ahera pīha co evocoyase vichico imombopri che recose che poraviquisa sui? Ndareco iri rumo pīratasa cheyese ivi rese che poraviqui ãgua. Achĩ

eteanga aveira rumo mbahe rese che porandu ãgua' ehi tẽi.

<sup>4</sup> 'Aicua rumo cute mara ahera vichico: che poraviquisa sui opa che momboise, oimera che pisi tupri vaherã oyepiri' ehi.

<sup>5</sup> Evocoiyase õnehe ñepei-pei güerecuar sui mbahe vinose tẽi vahe rese chupe. Yipindar vahe upe oporandu: '¿Mbovi mbahe erenose tẽi yande rerecuar sui?' ehi.

<sup>6</sup> 'Cien tupri chereve aceite siru tuvichagüe vahe rese' ehi. Evocoiyase, 'Eguapi ru, co oime cuachiar sesendar nde yecuachía agüer. Emondoro, eyapo iri ambuae cincuenta rupindar año' ehi chupe.

<sup>7</sup> Ichui ambuae mbahe vinose tẽi vahe upe oporandu no: '¿Mbovi mbahe vo erenose tẽi yande rerecuar sui?' 'Cuatro ciento quintar rupindar' ehi. Evocoiyase, 'Co oime cuachiar sesendar. Yaicuachiar rumo tresciento veinte quintar rupindar' ehi.

<sup>8</sup> Evocoiyase serecuar oyanduse, 'Too, oicua ité mbahe apo' ehi ombopasa rese ombahe rese ñangarecuarer ndipihai vahe upe. Esepia, ahe oye-moingatu voi oyeupe mbahe moingatu ãgua. Supi eté ava ndoicuai vahe Tũpa oicua catu mbahe moingatu ãgua oyeupe Tũpa reroyasar sui.

<sup>9</sup> "Sese che aipo ahe pẽu: peiporu pe guarepochi pereco vahe co ivi pipe pe mboripar reime ãgua. Ichui opa tẽise pe guarepochi, oimera pe pisi va-herã teco apirẽhisave.

<sup>10</sup> "Acoi ava mbahe tupri chĩhi oyapo vahe, ahe oyapo tupri catura mbahe tuvichá vahe. Iyavei acoi ãgüe ndehi vahe chĩhi vahe rese, ãgüe ndehi chiaveira mbahe tuvichá vahe rese.

11 Evocoyase ndapemboaviyeise co ivi pipendar pe cuaita guarepochi rese, ahese ndaperecoi chira ivave mbahe rese hañeco ãgua.

12 Iyavei acoi ndapemboaviye tupriise pe cuaita ambuae ava mbahe rãro pipe, ¿ava pĩha evocoyase omondora pe mbahe ité pẽu viña?

13 “Iyavei ndipoi chietera ñepei mbiguai omboyeroya vahe ñuvirio güerecuar. Esepia, ñepei osaisu catura imboyeroysa pipe, ambuae evocoyase ndoyambotai chira imboyeroya potaẽhisa pipe. Ëgüe peye avei ndapeicatui Tũpa mboyeroya guarepochi pota raisa pipe” ehi güemimbohe eta upe.

14 Aipo ñehesa renduse, fariseo yuvirecoi vahe oguarepochi raisusa pipe oviroiro yuvireco.

15 Evocoyase aipo ehi fariseo eta upe: “Pe co ava rembiepiave pe recocuer aviye angahu pe reco viña. Tũpa rumo oicua opacatu pe pihañemoñetasa. Esepia, yepe ava rovaque ndoyavii aviye ai vahe pe recocuer viña, Tũpa uve rumo mbahe tẽi eté” ehi.

*Mborocuaita iyavei Tũpa mborerecuasa rese ñehesa*

16 “Yipisuive Moisés porocuaita iyavei Tũpa ñehese mombehusar porombohesa Juan recosa rupive opa. Ichuive tupri ité rumo imombehusa ñehesa aviye vahe Tũpa mborerecuasa resendar, sese ava iquerẽhi catu cũritei aheve yuviroique vaherã.

17 “Yavai catura que ñepei Tũpa porocuaita mboaviyeẽhi ãgua co iva, ivi opa vaherã sui” ehi.

*Jesús oporombohe mendasa sui poiẽhi ãgua*

18 “Acoi opoi vahe güembireco sui, omendase ambuae cuña rese, ahe oyemboaguasa tēi vahe. Iyavei acoi omendase cuña omenda vahecuer rese tēi, oyemboaguasa tēi vahe avei” ehi Jesús.

*Ava mbahe yar iyavei Lázaro*

19 “Iyavei oime mbia mbahe yar, ahe oyemonde turucuar aviye vahe pipe oyemboetei eteanga, iyavei ari yacatu oyapo pieta opacatu mbahe rese oyemboetei aisa pipe.

20 Oime avei mbia iparaisu ité vahe Lázaro serer vahe. Ahe mbia icaracha ati vahe imboguapisa ivive imoi mbahe yar roquendipive.

21 Co mbia iparaisu catu vahe aipo ehi oyeupe, ‘Tomboumi tēi que güembihu rahicuer oviapi vahe mesa sui’ ehi mbahe yar upe viña. Aheve mbahe yar reimba cave oyemboya sese, icaracha osere yuvireco.

22 Omanose co mbia iparaisu vahe, ahese Tūpa rembiguai eta oviraso yuvireco Abraham piri ivave. Mbahe yar avei omano, opa oñoti yuvireco.

23 “Ahese oso Tūpa ñemoirosave. Aheve oparaisuse, omahe ivate coti, osepia amombri aracahendar Abraham Lázaro reseve.

24 Evocoiyase osapucaí pĩrata: ‘¡Che ramoí Abraham, che paraisuerecomi tēi eve! Emboumi tēi Lázaro che ãpecu morohisa ãgua ive ocuã pipe. Esepia, che paraisu etepri co tata pĩratagüer pipe vitu’ ehi.

25 Evocoiyase Abraham omboyeví aipo ehi chupe: ‘Che rumino, ndemahenduha eipeve nde reco agüer rese nipaneise mbahe ndeu nde recove pipe. Lázaro rumo iparaisumi tēi oico’ ehi.



‘Cũritei rumo Lázaro oviharete oico cohave, nde evocoiyase nde paraísu eipeve eico.

<sup>26</sup> Iyavei oime co ivicuar ipícucu vahe rasaēhi ãgua oreu iyavei pēu no’ ehi.

<sup>27</sup> “Ahe mbia aipo ehi: ‘Che ramoi Abraham, emondomi tēi Lázaro

<sup>28</sup> che rivri poyandepo vahe upe, chupe ñehe ãgua. Ahe tosecuñaro güecocuer yugüeruēhi ãgua co tecocuer mbahe tēisave’ ehi.

<sup>29</sup> Abraham rumo, ‘Vireco niha Moisés porocuaíta iyavei Tũpa ñehe mombehusar rembicuachiagüer yuvireco. ¡Ahe toviroya yuvireco!’ ehiño chupe.

<sup>30</sup> Evocoiyase, ‘Taa, che ramoi Abraham, que omano vahecuer pãhu pendar rumo yuvirasose chupe, ahe evocoiyase omoingatura güecocuer yuvireco viña’ ehi.

<sup>31</sup> Abraham rumo aipo ehi chupe: ‘Acoi ndoyapisaca potaise Moisés porocuaíta rese iyavei ambuae Tũpa ñehe mombehusar remimombehu rese no, ndoviroyai chiaveira que ava omano vahecuer ocuerayevise yuvireco’ ehi Abraham ava mbahe yar upe” ehi.

## 17

### *Iparaísu itera ava oporomboangaipa uca vahe*

<sup>1</sup> Jesús aipo ehi güemimbohe eta upe: “Oimeño itera poroãtoisa che reroyasar reiti ãgua. ¡Ahe imboangaipa ucasar rumo iparaísu itera!

<sup>2</sup> Iyacatu evocoi nungar ava ñapichisa ita mbahe mbocuhisa iyesho rese para guasu pipe imombo ãgua chihivahemi nungar mboangaipa uca rãgüer sui.

<sup>3</sup> ¡Sese peñearo tupri!

“Acoi nde mboetasa Tũpa reroyasar oyemboangaipase, pemboaracuara. Omboasi pare oyevise güecocuer tupri pipe, ahese peñerora chupe.

<sup>4</sup> Supi eté acoi que ambuae ava pe amotarēhi vitesse rumo siete yupagüer ñepei ari pipe, acoi ouse pēu siete yupagüer avei, ‘Ēgüe ndahe iri chira’ ehise, peñero chupe” ehi Jesús güemimbohe upe.

*Yayeroyase Tũpa rese oime pĩratasa*

<sup>5</sup> Co doce tupri apóstol aipo ehi chupe:

—Emboumi oreu Tũpa rese ore yeroya catu āgua —ehi yuvireco chupe.

<sup>6</sup> Evocoiyase yande Yar omboyevi chupe:

—Supi eté, Tũpa rese pe yeroyasa, yepe ndoyavii chira mostaza rāhi tahimi vahe viña, co ivira tuvicha vahe upe rumo, ‘Eyeapoho ave sui. Eso eñeñeti para guasu aviterve’ peyese Tũpa rese pe yeroyasa pipe, ahe evocoiyase pe mboyeroya itera —ehi.

*Ambuae ava rese hañecasar cuaita*

<sup>7</sup> “Inungar que pe pāhu pendar virecora güembiguai oporaviqui vahe ivi mboyere cove, anise que guaca rāro yuvi rupi viña; ichui iyevise, ¿‘Eique, eguapi terecaru’ ehira pĩha sereciar chupe?

<sup>8</sup> Aní eté, ahe rumo aipo ehiñora chupe: ‘Emoin-gatu voi mbahe che tohu, che toihurā avei. Ipare nde erecarura, ereihura’ ehira chupe.

<sup>9</sup> ‘Aviye ndeu’ ndehi chietera icuai pare chupe.

<sup>10</sup> Ēgüe peye avei mbiguai nungar pe opacatu Tũpa pe cuaitarā ombou vahe mboaviyere, ‘Yande

niha mbiguai tēi yaico. Esepia, yande cuaita mboavīyesar tēi yaico' peyeñora" ehi.

*Jesús ombogüera diez tupri ava lepra pipe imbaheasi vahe*

<sup>11</sup> Osose Jesús Jerusalén ve, oguata ivi Samaria iyavei ivi Galilea rupi.

<sup>12</sup> Oyepotase tecuamive oso, ahese yuvinose diez ava lepra pipe imbaheasi vahe yuvireco chupe. Amombrive rumo opitaño yuvireco ichui.

<sup>13</sup> Osapucái yuvireco chupe aipo ehi:

—¡Jesús, Porombohesar, ore parañuerecomi tēi eve! —ehi.

<sup>14</sup> Sepiase aipo ehi lepra vireco vahe upe:

—Peyevi, peso, tapeyemboyecua pahi eta yuvirecoi vahe —ehi.

Oyevise rumo yuviraso, opa ocuera tupri omba-herasisa sui yuvireco.

<sup>15-16</sup> Evocoyase ñepeí ipãhu pendar, Samaria pendar, osepiase ocuerasa, oyevi chupe osapucái pĩrata Tũpa upe imboeteisave. Oñenopiha oso so-vai, oyaivi, "Aviye ndeu" ehi Jesús upe.

<sup>17</sup> Evocoyase ahe aipo ehi:

—¿Ndahei vo acoi diez tupri opa ocuera omba-herasisa sui yuvireco? ¿Aique que ru ambuae nueve yuvirecoi vahe?

<sup>18</sup> ¡Co mbia ambuae ivi pendar güeraño rumo oyevi 'aviye ndeu' ohesave Tũpa uve! —ehi.

<sup>19</sup> Evocoyase aipo ehi ahe mbia upe:

—Eñarapuha, eso tupriño. Nde poreroyasa pipe niha erecuera eico —ehi Jesús chupe.

*Tũpa mborerecuasa yande pãhuve secoi*

<sup>20</sup> Ñepeí arí pipe fariseo eta, “¿Marase vo aipo oura Tũpa omborerecuasa pipe mbahe moingatu ãgua?” ehi Jesús upe yuvireco. Ahe omboyeví chupe:

—Tũpa mborerecuasa ndahei acoi yasepia vahe.

<sup>21</sup> ‘Co secoi, aheve secoi’ ndapeyei chira chupe. Esepia, ahe oicove ité pe pãhuve —ehi fariseo eta upe.

<sup>22</sup> Ipare aipo ehi güemimbohe eta upe:

—Oimera arí pe peipota tẽira aico vaherã pe piri que ñepeí arí rupí che, Ava Riquehir, che recosa pipe; ndache repiai chira rumo peye.

<sup>23</sup> Iyavei ava, ‘Co secoi, aheve aipo secoi’ ehi tẽira yuvireco cheu. Ndapesaquicue moñai chira rumo.

<sup>24</sup> Esepia, inungar acoi overa vahe osesape guasu íva rese ocua yepi, ãgüe ahera che, Ava Riquehir, vitu arí osupitise che yevi ãgua curi.

<sup>25</sup> Yipindar rumo co ívi pipe che paraisu ranera ava cũriteindar mara-mara tẽi che rerecose yuvireco che repia potaẽhisave.

<sup>26</sup> Inungar ava Noé recose yuvirecoi aracahe, ãgüe ehi tupri aveira che, Ava Riquehir, yevi ãgua renonde.

<sup>27</sup> Esepia, ocaru, oi hu, omendaño avei yuvireco. Oyepotase rumo arí ipapari amarusu viapi ãgua, ahese Noé yuviroique arca pipe. Ambuae ava rumo opa ocañi tẽi yuvireco.

<sup>28</sup> ãgüe ehi avei aracahe Lot recose, ava ocaru tẽi, oi hu tẽi, virocua tẽi mbahe omahera yuvireco iyavei mbahe mondosar tẽi, mbahe tĩsar tẽi, oi aposar tẽi avei yuvirecoi oyapisacaẽhisa pipe.

<sup>29</sup> Osẽse rumo Lot tecua Sodoma sui, aviyeteramo tẽi oviapi tata amar nungar íva sui.

Opa tupri oyuca ava rehi aracahe.

<sup>30</sup> Ëgüe ahe aveira aviyeteramo tēi che, Ava Riquehir, ayemboyecuar curi.

<sup>31</sup> “Ahe ari pipe acoi ava güeta harive secoi vahe, ahe toi que iri eme güeta pipe ombahe renose. Iyavei ava que rupi tēi secoi vahe, toyevi iri eme güetave.

<sup>32</sup> Sese peyemomahenduha co aracadendar Lot rembireco rese.

<sup>33</sup> Opacatu güecocuer osaisu vahe, ahe ocañi tēira. Iyavei setecuer tēi ocañi vahe, ahe rumo oñepisirora” ehi.

<sup>34</sup> “Ahe pĩtu pipe oimera que ñuvirio ava vupave yuviroque vahe yugüeru: ñepi acoi che reroyasar serasosara, ambuae rumo opitara.

<sup>35</sup> Ahese avei ñuvirio cuña ohichora yuvireco: ñepi serasosara, indugüer rumo opitara.

<sup>36</sup> Ëgüe ehi aveira ñuvirio ava amombri güecua sui yuvirecoi vahe: ñepi serasosara, indugüer rumo opitara” ehi.

<sup>37</sup> Aipo ñehesa renduse, oporandu yuvireco chupe:

—Ore Yar, ¿que vo aipo Ëgüe ehira mbahe curi? —ehi.

Ahe evocoyase,

—Mbahe rehögüer reimesave uruvu oñemonuha atira yuvireco —ehi güemimbohe eta upe.

## 18

*Jesús omboyoya yeruresa cuña imer mano vahecuer iyavei mborerecuar mbahe moingatusar recocuer rese*

1 Jesús omboyoya ambuae ava recocuer sui querêhisa pipe yerureño ãgua ari yacatu rupi

2 aipo ehi: “Ñepei tecuave oime mbia mborerecuar mbahe moingatusar ndosiquiyei vahe Tũpa sui, ambuae ava sui avei.

3 Ahe tecuave avei oime cuña imer mano vahecuer. Ahe oso co mborerecuar rêtave, ‘Oime ava oyapo mbahe tẽi eté cheu, tomboepi cheu’ ehi chupe.

4 Yipindar rumo noipitivii potai. Coiye catu rumo cuña ombopihavĩracua tẽise, ipihañemoñeta iri: ‘Yepe che ndasiquiyei vahe Tũpa sui, ava sui avei ndasiquiyei vahe ité,

5 amoingatuñora rumo mbahe co cuña che mañeco tẽisar upe. Ayapoñora semimbotar cheu iyu pihĩehi ãgua’ ehi opihañemoñetasave” ehi.

6 Ipare yande Yar aipo ehi: “Peyapisaca aipo mborerecuar naporai vahe ñehe rese.

7 Tũpa avei niha omoingatura mbahe güembiporavo oyeupe yeruresar ari, pĩtu rupindar upe yepi. Nosaro tẽi chiranera opitivii ãgua yuvireco.

8 Supi eté Tũpa omoingatu voira mbahe aviye vahe yande porandusa pipe yandeu. Co rumo che, Ava Riquehir, ayevise co ivi pipe vitu, oimera ava moviromi tẽi oyeroya vite vahe che rese yuvireco” ehi Jesús.

*Yembohesa fariseo sui iyavei guarepochi re-rocuasar sui*

9 Ichui Jesús oporombohe iri ambuae ava recocuer rese. Esepia, oime amove ava aviye ai

angahu secoi oyeupe viña, iharive rumo viroĩro ambuae ava.

<sup>10</sup> “Ñuvirío ava yuviraso tũparove oyerokuĩ. Ñepei ava fariseo, ambuae evocoiyase ava sui guarepochi rerocuasar.

<sup>11</sup> Evocoiyase fariseo oso tenonde ava rembiepiave oyerokuĩ aipo ehi: ‘Tũpa, aviye ndeu, che ndahei ambuae ava nungar che recocuer; ndachemondai vahe, ndachereco rai vahe, ndacheaguasa-guasa tẽi vahe. Iyavei ndahei eté che recocuer co mbia ava sui guarepochi rerocuasar nungar tẽi aico no.

<sup>12</sup> Iyavei ñuvirío yupagüer ñepei semana pipe ayecuacu ité nde recocuer rese, iyavei ñepei-peicien guarepochi che poraviquĩ repri aipisi vahe sui amboyaho diez che porerecosa ndeu’ ehi.

<sup>13</sup> Ava sui guarepochi rerocuasar rumo opitaño amombri ichui. Aheve nomahei iva rese oyerokuĩ ãgua oangaipa mboasisa pipe. Oyepochihanupanupa aipo ehi: ‘¡Tũpa, che paraisuerecomi eve, che angaipa viyar aico!’ ehi oyerokuĩ” ehi.

<sup>14</sup> “Sese aipo ahe pẽu: co mbia ava sui guarepochi rerocuasar opa oipisi ñerosa Tũpa suindar güëtave oso. Fariseo rumo aní eté. Esepia niha, opacatu acoi oyemboivate ai vahe, opara seco reroyisa. Acoi ava seco mbegüe vahe rumo seco mboivate catusara curi” ehi.

### *Jesús osovasa chĩhivahe eta*

<sup>15</sup> Iyavei chĩhivahe güeru Jesús uve yuvireco sovasapirã. Evocoiyase semimbohe osepiase yuvireco, “¿Mahera vo peruño tẽi chĩhivahe?” ehi opihavĩracuasa pipe serusar upe yuvireco.

16 Jesús rumo aipo ehi:

—¡Mahera ndapeipotai iyu ãgua! Toyugüeruño chĩhivahe cheu. Esepia, co chĩhivahe nungar ava yuvĩroiquera che Ru Tũpa povĩve.

17 Supĩ eté acoi ndoipĩsĩi vahe che Ru Tũpa mborerecuasa chĩhivahe nungar yuvireco, ahe evocoyase ndoyuvĩroi quei chietera ipĩpe —ehi.

*Ñepi mbia mborerecuar imbahe eta vahe omoñeta Jesús*

18 Ñepi mbia mborerecuar oporandu Jesús upe:

—Porombohesar avĩye vahe, ¿mbahe vo ayapora tecovesa apirẽhi vahe rereco ãgua? —ehi.

19 Jesús evocoyase aipo ehi ahe mbia upe:

—¿Mahera vo, “Avĩye vahe” ere cheu? Oime rumo ñepi avĩye vahe ité, ahe Tũpa secoi.

20 Ereicua niha co porocuita aipo ehi vahe: ‘Nandeaguasai chira, ndereporoyucaí chira, nandemondai chira, nanderemirai chira ambuae ava rese, eremboyoyara nde ru, nde si avei’ ehi vahe —ehi chupe.

21 Ahe mbia rumo,

—Che aipo nungar opacatu amboavĩye ité che chĩhivahemi suive —ehiño chupe

22 Aipo ihese rumo,

—Ipane vite mbahe ndeu —ehi—. Emondopa rane nde mbahe, ahe seprĩ evocoyase eremondora ava iparaisu vahe upe. Ichui ererecora mbahe avĩye vahe ivave cute. Ipare ereguatara che rupi —ehi chupe.

23 Aipo oyeupe hese rumo, ahe mbia ndoyembovihai tẽi. Esepia niha, mbahe yar ité secoi.

24 Sese omahe aipo ehi:



—¡Yavai eté rumo ava mbahe yar reique ãgua che Ru Tũpa mborerecuasave! —ehi—.

<sup>25</sup> Yavai rai camello upe yucuar rupi seique ãgua; ava imbahe eta vahe upe rumo yavai catu che Ru mborerecuasave seique ãgua —ehi.

<sup>26</sup> —¿Ava angahu pĩha evocoyase oñepisĩrora yuvireco viña? —ehi sendusar chupe.

<sup>27</sup> Evocoyase ahe chupe aipo ehi:

—Ava tẽi upe mbahe yavai eté, Tũpa upe rumo ndayavaimi eté —ehi.

<sup>28</sup> Evocoyase Pedro aipo ehi:

—Che Yar, ore rumo opa oroseya ore mbahe nde rupi ore guata ãgua —ehi chupe.

<sup>29</sup> Evocoyase aipo ehi güemimbohe upe:

—Supi eté acoi oseya vahe que güêta, güembireco, viquehĩr, vivri, oyesupa, que guahĩr Tũpa mborerecuasa rese,

<sup>30</sup> ahe setá iteanga catu oipisĩra mbahe aviye catu vahe co ivi pipe oseya vahe sui. Ipare rumo tecua ambuaeve oipisĩ aveira tecovesa apirẽhi vahe curi —ehi.

### *Jesús omombehu iri omano ãgua*

<sup>31</sup> Evocoyase yande Yar opa viraso co cotimi doce güemimbohe. Aheve aipo ehi: “Cũritei yasora tecua Jerusalén ve yaico, aheve omboaviyera co Tũpa ñehe mombehusar rembicuachiagüer co che, Ava Riquehĩr, resendar ñehesa.

<sup>32</sup> Che imondopri aicora ndahei vahe yande mu upe mara-mara tẽi che rereco ãgua. Che reroĩro-ĩrora iyavei ondivi-ndivira yuvireco che rese” ehi.

33 “Iyavei che nupa-nupara. Ipare che yucara yuvireco. Imombosapisa ari pipe rumo acuer-ayevira omano vahe pãhu sui” ehi.

34 Semimbohe rumo ndosenducuai eté iñehe yuvireco. Esepia niha, yavai eté senducua ãgua yuvireco chupe.

*Jesús ombogüera ñepe mbia ndasesapiso vahe*

35 Evocoyase Jesús ovirovise tecua Jericó oso, aheve mbia ndasesapiso vahe oguapi oĩ peri popive porerecosa oyeupe mondo ãgua rese.

36 Osenduse ahe ndasesapiso vahe ava rehi piambu, ahese, “¿Mbahe vo pẽu?” ehi ava upe.

37 Ahe evocoyase, “Jesús, Nazaret pendar, ocuara co rupi” ehi yuvireco chupe.

38 Evocoyase ahe güendapeve oñehe pĩrata:

—¡Jesús, David suindar, che paraisuerecomi tẽi eve! —ehi chupe.

39 Evocoyase ava tenonde oguata vahe oyacayacaño, “Quiriri” ehi yuvireco chupe. Ahe rumo,

—¡David suindar, che paraisuerecomi tẽi eve! —ehi pĩrataño ité chupe.

40 Evocoyase Jesús opitase aheve, oyocuai ava seru ãgua. Ovirovise seru yuvireco, aipo ehi ndasesapiso vahe upe:

41 —¿Mbahe vo ereipota ayapo vaherã ndeu? —ehi.

—Che Yar, che mbosarecomi tẽira eve viña —ehi chupe.

42 —¡Esareco, erecuera niha! Esepia, ereyeroya ité che rese —ehi chupe.

43 Ahe ramoseve ndasesapiso vahe, osareco tupri ité; osoño ité Jesús rupi imboeteisave.

Opacatu ava osepia vahe avei omboetei Tūpa yuvireco.

## 19

### *Zaqueo osepia pota Jesús*

<sup>1</sup> Ichui Jesús oi que tecua Jericó pipe oguata oico.

<sup>2</sup> Aheve mbia mbahe yar Zaqueo serer vahe secoi. Ahe ava sui guarepochi rerocuasar rerecuar.

<sup>3</sup> Osepia pota tēi Jesús ‘taicua ité’ oya viña. Ndoicatui rumo opucuehise ava rehii pãhuve sepia ãgua.

<sup>4</sup> Evocoyase ahe oña tenonde oso ‘tasepia ité’ oyapave, oyeupi ivira rese ivate oĩ senonera.

<sup>5</sup> Evocoyase oyepotase, omahe Zaqueo rese ivate chinise, aipo ehi chupe:

—Zaqueo, egüeyi poyava. Esepia, asora nde rêtave nde piri —ehi.

<sup>6</sup> Aipo oyeupe he ramoseve, Zaqueo ogüeyi voi vorivetesu pipe oipisi.

<sup>7</sup> Sepiase rumo opacatu ava, “Yangaipa guasu vahe rêtave tēi oso” ehi yuvireco chupe.

<sup>8</sup> Evocoyase Zaqueo opũha aipo ehi chupe:

—Che Yar, esendu rane, amboyaho tuprira che mbahe eta ava iparaisu vahe upe; mbahe añomi vahecuer avei, ayapirasa catu-catura irungatu rupi imboyevã ãgua —ehi chupe.

<sup>9</sup> —Co pipe Tūpa oipisiro ité co mbia. Esepia, ahe niha Abraham suindar avei secoi.

<sup>10</sup> Esepia, che, Ava Riquehir, ayu co ivi pipe ava ocañi tēi vahe pĩsiro ãgua —ehi Jesús Zaqueo upe.

### *Guarepochi sui yembohesa*

11 Aipo ñehesa rendu viteseve, Jesús oporombohe ambuae tecocuer resendar rese. Esepia, viroví Jerusalén, “Oyepota voi etera revo Tūpa mborerecuasa” ehi ava yuvireco viña.

12 Ahe rumo aipo ehi ava upe imbohe: “Oime mbia imboyeroyapri, ahe senoipri oso vaheṛā amombri oivi pendareta rerecuarā oyevisē.

13 Oso ãgua renonde oichohopa uca diez tupri güembiguai. Ahese opa omondo ñepeipei upe guarepochi sepirusu vahe, aipo ehi chupe: ‘Pe-poraviqui co guarepochi rese imboeta ãgua che yevise nara’ ehi. Ipare oso.

14 Setá ava rumo secua pendar saquicuei tēi viroiro yuvireco. Sese omondo moviro ava ‘tomombehu: Ore rumo ndoroipotai ore rerecuarā secui ãgua, tehi yuvireco’ oya viña.

15 “Ahe rumo mborerecuar guasu güecosa pipe oyevi ou cute. Opa uca oichoho oguarepochi pisisarer ‘¿mbovi-mbovi pñha oipisi oyacatu yuvireco?’ oya.

16 Evocoiyase yipindar mbia guarepochi oipisi vahe ou voi chupe, ‘Che rerecuar, nde guarepochi oyemboeta diez rupi cheu’ ehi.

17 Evocoiyase mborerecuar guasu omboyevi chupe: ‘Mbiguai aviye vahe ereico, nde cuaita co nde poraviquisa chñhimi vahe eremboaviye ité. Sese ereicora diez tecua guasu pendar rese hañeco ãgua’ ehi chupe.

18 Ipare voi ambuae ou chupe, ‘Che rerecuar, nde guarepochi oyemboeta cinco rupi cheu’ ehi chupe.

19 Aipo ehi tupri avei ahe chupe: ‘Nde evo-

coiyase ereicora cinco tecua pendar rese hañeco ãgua' ehi.

<sup>20</sup> “Ipare voi ambuae ou chupe, ‘Che rerecuar, ndo cõ nde guarepochi aipoqueño turucuar mi pipe sereco.

<sup>21</sup> Esepia, che asiquiye nde sui. Nderecatêhi mete ai vahe mbahe rese. Ambuae ava poraviqui sui tõi iyavei acoi ndahei vahe mbahe nde remiti, ichui tõi avei ereipisi mbahe ndeyeupe nara yepi' ehi chupe.

<sup>22</sup> Evocoiyase mborerecuar guasu aipo ehi chupe: ‘Nde mbiguai ndaseco põrai vahe ereico. Nde ñehe sui aicuara nde recocuer. Ereicuase êgüe che hesa viña,

<sup>23</sup> evocoiyase, ¿mahera ru ndereyapocatu che guarepochi guarepochi apocatusave che yevise voi senose ãgua cheu imboyevi catumi ãgua viña?’ ehi.

<sup>24</sup> Evocoiyase, ‘Perocua guarepochi ichui. Pe-mondora acoi diez rupi guarepochi omboeta vahe upe’ ehi vupindar upe.

<sup>25</sup> Supindar rumo aipo ehi: ‘Ore rerecuar, ovireco rumo evocoi diez tupri avei iharive guarepochi’ ehi tõi yuvireco chupe.

<sup>26</sup> Evocoiyase mborerecuar, ‘Co rumo supi eté vahe: acoi ovireco vahe, imondosara setá catu chupe; acoi ndovirecoi vahe setá mbahe, ichui serocuasara’ ehi.

<sup>27</sup> ‘Acoi ava che amotarêhimbar, ndache potai vahe mborerecuarã yuvireco, ahe opara peru co-have che rovai yucapa ãgua’ ehi” ehi Jesús ava eta upe.

*Jesús oique Jerusalén pipe*

<sup>28</sup> Jesús aipo ohe pare, oguata vite oso Jerusalén coti.

<sup>29</sup> Evocoiyase coiye catu tecua Betfagé iyavei Betania rerovicave, ivitri Olivo ñpimi, aheve omondo ñuvirío güemimbohe

<sup>30</sup> aipo ehi chupe:

—Peso co tecuamive, yande rovaindarve. Peyepotase aheve, pesepiara guaricu ñapichimbri imoha ava ndoyeupi vitei vahe yuvireco sese. Ahe peyorañora seru.

<sup>31</sup> Acoi, ‘¿Mahera vo peyora?’ ehise que ava pëu, ‘Yar oiporu pota’ peyeñora chupe —ehi güemimbohe upe.

<sup>32</sup> Evocoiyase semimbohe yuviraso, semimombehu rupi tupri ité osepia mbahe yuvireco.

<sup>33</sup> Evocoiyase oyorase guaricu,

—¿Mahera vo peyora ore reimba? —ehi iyar yuvireco.

<sup>34</sup> —Yar oiporu pota —ehiño yuvireco chupe.

<sup>35</sup> Ipare viraso Jesús upe yuvireco, oicupeao oyeaosa pipe guaricu yuvireco chupe. Ipare omboyepi sese oso ñgua.

<sup>36</sup> Oyeupise oso guaricu harive, oipipira ava oturucuar peri rupi senonera imboetei guasusave yuvireco.

<sup>37</sup> Ovirovise ivitri Olivo sui ogüeyi ñgua oso, opacatu ava seroyasar supi oguata vahe omboipi osapucaí yuvireco vorivetesave mbahe poromondiisa sembiapogüer rese Tüpa upe

<sup>38</sup> aipo ehi yuvireco:

—¡Sovasapri seci mborerecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tũpa tasecoi! —ehi.

<sup>39</sup> Evocoyase amove fariseo yuvirecoi vahe supi aipo ehi chupe:

—Porombohesar, eñehe nde rupi uguata vahe upe imonguiriri ãgua —ehi tẽi yuvireco.

<sup>40</sup> Evocoyase aipo ehi:

—Supi eté amombehu pẽu: co ava iquiririse yuvireco, ita rumo evocoyase osapucai pĩratara che mboeteisave —ehi.

<sup>41</sup> Oyepota senimise tecua Jerusalén ve, ahe tecua repiase, oyaseho sese

<sup>42</sup> aipo ehi: “¡Pesenducara tarahu co co ari pipe teco tupri sa amondo pota vahe pẽu viña, cũritei rumo ocañi tupriño pe sui, ndapeicatui eté sepia!” ehi oyaseho.

<sup>43</sup> “Oimera rumo ari imombehupri naporai vahe pẽu curi. Pe amotarẽhimbar oñachi irira pe recua. Ìpare oyere tupri ra yuvireco pe rese pẽu ovava ãgua.

<sup>44</sup> Iyavei yuviroiquera pe recua pipe, opara pe rẽta omonduru yuvireco, pe yuca aveira yuvireco. Ndipoi chietera ita que ñepei oya vahe ambuae rese. Esepia, ndapeicuai eté Tũpa ouse pẽu pe pĩsiro ãgua” ehi Jerusalén pendar rese oyaseho.

*Jesús omombopa ava mbahe rerecosar tũparo pipe sui*

<sup>45</sup> Ichui Jesús oi que judío tũparo guasu pipe. Aheve omboipi ava mbahe mondosar mombopa tupri ocarve oico

<sup>46</sup> aipo ehi:

—Icuachiapri aracahendar pipe aipo ehi: ‘Che rēta yeruresa rētarã’ ehi. Pe rumo, imonda rai vahe rēta nungar tēi pereco —ehi.

<sup>47</sup> Ichui ahe tūparo guasu pipe ari yacatu oporombohe oico. Aheve avei rumo pahi eta rerecuar yuvirecoi vahe, Moisés porocuita rese oporombohe vahe iyavei tecua rerecuar guasu yuvirecoi vahe, ‘¿Mara yahera pīha yuca uca āgua viña?’ ehi yuvireco chupe.

<sup>48</sup> Ndoicatu rumo yuvireco. Esepia, ava rehii oyapisaca iporombohesa rese yuvireco.

## 20

### *Jesús mborerecuasa*

<sup>1</sup> Ñepeí ari Jesús judío tūparo guasu pipe güecose, ombohe ava eta, omombehu ñehesa písírosa re-sendar oico. Ahese yugüeru pahi eta rerecuar guasu yuvireco iyavei Moisés porocuita rese oporombohe vahe, ava rerecuar guasu yuvirecoi vahe avei

<sup>2</sup> aipo ehi:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã? —ehi ahe ava yuvireco chupe.

<sup>3</sup> Ahe omboyeví chupe:

—Che avei aporandura mbahe rese pēu. Pem-boyevíra cheu —ehi—.

<sup>4</sup> ¿Ava vo Juan ombou ava āpiramo āgua: Tūpa pīha, ava tēi tie? —ehi ahe ava yuvirecoi vahe upe.

<sup>5</sup> Ahese, “¿Mara yahera pīha?” ehi-ehi tēi oyeupe yuvireco. “‘Tūpa’ yahese chupe, ‘¿Mahera ru ndap-eroyai?’ ehira yandeu.



<sup>6</sup> Anise, ‘Ava tēi remimbou’ yahese chupe, opacatu seroyasar evocoyase yande api-apira ita pipe yuvireco. Esepia, ava, ‘Juan omombehu vahe ñehesa Tūpa suindar’ ehi eté yuvireco chupe” ehi tēi oyeupe yuvireco.

<sup>7</sup> Evocoyase ahe ava, “Nodoroicuai rumo Juan mbousar, que sui oporoãpiramo oico” ehiño yuvireco chupe.

<sup>8</sup> Sese aipo ehi ahe ava upe:

—Sese che avei, ‘Ahe iporocuaita pipe co mbahe ayapo’ ndahei chietera pēu —ehi mborerecuar guasu upe.

*Ava mbahe tēi oporaviqui vahe recocuer sui yembohesa*

<sup>9</sup> Ipare Jesús oñehe ava eta upe ambuae ava recocuer rese aipo ehi: “Oime mbia oñoti vahe uva oivi pipe. Ipare oseya oivi ava oporaviqui vahe upe iporu ãgua. Ichui oso pucu que amombri vahesa rupi.

<sup>10</sup> Evocoyase oyepotase ari uva pohosa, ahese omondo ñepi güembiguai oporaviqui vahe upe imboporandu ‘tomboumi uva pohopri cheundar cheu cute’ oyapave viña. Ahe rumo oinupa-nupaño imboyevi tupri tēi yuvireco serecuar upe.

<sup>11</sup> Ipare ambuae güembiguai omondo iri no. Ahe oinupa-nupaño, iñehe mara-mara tēi avei ipogüer tēi imboyevi imondo yuvireco.

<sup>12</sup> Ichui omondo iri tēi imombosapisa rese ambuae güembiguai no. Ahe oyapicha-pichaño imosē imondo yuvireco.

<sup>13</sup> “Coiye miti yar aipo ehi: ‘¿Mara ahera pñha? Amondora revo che rahir, che rembiaisu. Ahe tie revo, osepiase, omboyeroyara yuvireco’ ehi.

14 Evocoiyase ahe ava tahir repiase, ‘Co aipo oipisira vu mbahe. Yayaucãño. Yandeu nara pãve topita co ivi’ ehi oyeupe yuvireco.

15 Evocoiyase ovinose miti pãhu sui, oyuca ité yuvireco.

“¿Mbahe vo evocoiyase oyapora ivi yar ahe ava naporai vahe upe?

16 Oura evocoiyase ahe ava mocañipa ãgua, omondora ambuae ava upe oivi rese oporaviqui vaherã” ehi.

Aipo renduse,

—¿Egüe tehi eme! —ehi ava yuvireco chupe.

17 Omahese rumo ahe ava rese aipo ehi:

—¿Mara oya vo co aipo ehi icuachiapri aracahendar pipe?:

‘Co ita oi aposar opaño omombo yuvireco, ahe ita rumo aviye catu vahe oi moviracua tupri ãgua’ ehi.

18 Acoi que oviapi vahe evocoi ita harive, opa tẽira ahe ae oyemomara. Iyavei oviapise que ava harive, opa tupri aveira omocañi —ehi Jesús judío rerecuareta upe.

19 Pahi eta rerecuar guasu iyavei oporombohe vahe Moisés porocuita rese, iñehe viteseve, oipisi pota tẽi Jesús yuvireco. Esepia, osenducua ité oyesendar iporombohesa yuvireco. Osiquiyeño rumo ava rehi sui yuvireco.

*Judío rerecuar osecoãha iri tẽi Jesús guarepochi rese yuvireco*

20 Ahe judío rerecuar evocoiyase omondo ava ndaseco asimi angahu vahe iviro, chupe iñehe ãgua ‘toyavi angahu oñehe’ oya viraso vaherã mborerecuar Pilato rovai.

21 Ahe evocoyase,

—Porombohesar, ore oroicua nde ñehe iyavei nde porombohesa supi eté vahe. Iyavei nderemboyoaviratii vahe nde ñehe yepi. Nde rumo eroporombohe mbahe supi tupri vahe Tûpa recocuer rese.

22 ¿Aviyera pîha yamondo guarepochi Roma pendar mborerecuar ivate catu vahe upe viña? ¿Aní tie? —ehi yuvireco chupe.

23 Opa rumo oicua iñehe porombopasa tõi. Sese,

24 —Pemboyecua ru ñepei guarepochi cheu. ¿Ava rahanga vo vireco; ava rer icuachiapri vo co sese? —ehi ahe ava upe.

—Roma pendar mborerecuar guasu —ehiño yuvireco chupe.

25 —Taa, pemondo ru mborerecuar uve chupendar, iyavei Tûpa upendar pemondoño ité Tûpa upe —ehi ahe ava upe.

26 Ndoyavi uca catui eté iñehe ava rovaque ipisi ãgua yuvireco. Ahe rumo oyeupe imboveyise, iquiriripa tupriño oyepihamondiisa pipe yuvireco.

### *Porandusa cuerayevisa rese*

27 Ipare saduceo, ahe “ndipoi eté cuerayevisa” ehi vahe, yugüeru Jesús upe. Oporandu tõi angahu yuvireco chupe:

28 —Porombohesar, Moisés niha oseyagüembicuachiagüer yandeu aipo ehi: ‘Que cuimbahe omenda vahe omanose guahiẽhiseve, tivri evocoyase omendara sembirecocuer rese. Ahe viquehir omano vahecuer upe nara tahira oico’ ehi.

29 Evocoiyase oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiẽhiseve.

30 Ichui tivri omenda sese. Ahe omanoño avei guahiẽhiseve.

31 Ipare imombosapisa tivri omenda iri tẽi sese. Ëgüe ehi tupriño avei chupe. Ambuae ichuindar ëgüe ehi tupri avei omanopa yuvireco guahiẽhiseve.

32 Coiye cuña avei omano cute.

33 Evocoiyase opase ocuerayevi yuvireco, ¿uma rembireco itera pĩha omendase opacatu siete yuvirecoi vahe rese? —ehi saduceo yuvireco chupe.

34 Ahe rumo omboyevi chupe:

—Co ivi pipe cuimbahe iyavei cuña omenda vahe yuvireco yepi.

35 Ocuerayevi pare oicatu vahe ivave yuviroique vaheerã, chupe ndipo iri chira mendasa.

36 Iyavei nomanoi chietera aheve. Esepia, yuvirecoira Tũpa rahir, Tũpa rembiguai eta iva pendar nungar yuvireco.

37 Moisés rembicuachía agüer pipe niha caha pãhu sendi vahe resendar oicua uca cuerayevisa yandeu. Aheve aipo ehi: “Ahe niha yande ramoi aracahendar Abraham, Isaac, Jacob Tũpa” ehi.

38 ¡Tũpa ndahei omano vahe Tũpa! ¡Ahe rumo oicove vahe ité Tũpa secoi! Esepia, chupe opacatu yuvirecove vahe —ehi saduceo upe.

39 Evocoiyase moviro Moisés porocuita rese oporombohe vahe aipo ehi:

—Supi eté aipo ere, Porombohesar —ehi yuvireco chupe.

<sup>40</sup> Sese niquerēhi iri eté mbahe rese oporandu ãgua yuvireco chupe.

*¿Ava suindar p̃iha Porop̃is̃irosar?*

<sup>41</sup> Evocoiyase Jesús aipo ehi ahe ava upe:

—¿Mahera ru, “Porop̃is̃irosar David suindar ité” ehi yuvireco?

<sup>42</sup> David teieté niha aipo ehi güembicuachía pipe: ‘Yar aipo ehi che Yar upe:

Eguapi che acato coti

<sup>43</sup> acoi che amondose voi eté nde amotarēhimbar ñenopiha ãgua nde povrive yuvireco’ ehi David aracahe.

<sup>44</sup> ¿Mahera ru, “Porop̃is̃irosar David suindar sec-oira” peye? David teieté, “Che Yar” ehise chupe — ehi Jesús ahe ava upe.

*Jesús oicua uca Moisés porocuita rese oporombohe vahe recocuerai*

<sup>45</sup> Opacatu ava oñehe rendu vitesese, Jesús aipo ehi güemimbohe upe:

<sup>46</sup> “Peicua catu co Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo ãgua ocar rupi omboeteisa pipe yuvireco. Oseca avei tenda porañete catu vahe güenara otũparo pipe, carusave avei oseca tenda aviye catu vahe yuvireco.

<sup>47</sup> Iyavei virocua-rocuano tēi cuña imer mano vahecuer rēta ichui. Oarondaguã tēi avei oyeroqui pucu-pucu yuvireco. Ahe rumo oipisira Tũpa

ñemoirosa ipĩrata catu vahe yuvireco curi” ehi güemimbohe eta upe.

## 21

*Cuña imer mano vahecuer iparaisu vahe porerecosa*

<sup>1</sup> Ipare Jesús osepia ava imbahe eta vahe omondose oporerecosa guarepochi rĩru pipe yuvireco.

<sup>2</sup> Aheve avei cuña imer mano vahecuer iparaisu vahe, omondo ñuviriomi guarepochi oporerecosa.

<sup>3</sup> Evocoyase Jesús aipo ehi:

—Supi eté co cuña iparaisu vahe omondo catu oporerecosa opacatu mbahe yar sui.

<sup>4</sup> Esepia, ava imbahe eta vahe, oguarepochi rumbĩrer tēi omondo oporerecosa Tũpa upe yuvireco. Co cuña rumo oparaisusa pipe virecomi vahe guarepochi oyeupe, opacatu ité omondo oporereco ãgua Tũpa upe —ehi.

*Jesús omombehu tũparo guasu monduru ãgua*

<sup>5</sup> Evocoyase amove semimbohe oñehe yuvireco tũparo guasu recocuer rese: “Co tũparo niha icatupri vahe, ita mopuhapri, porerecosa sui opacatu mbahe icatupri ipipe” ehi yuvireco. Jesús rumo aipo ehi:

<sup>6</sup> —Oimera ari opacatu co mbahe cũritei pesepia vahe pipe ndipoĩ chietera que ñepeĩ ita oyeha vite vahe; opacatu ité imondurusara curi —ehi güemimbohe eta upe.

*Cañi renonde sepiasara setá mbahe poromondiisa iva rese*

<sup>7</sup> Evocoyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondiisa rese rane vo icuasara curi? —ehi yuvireco.

<sup>8</sup> Evocoyase aipo ehi güemimbohe eta upe: “Pe-icua catu, peyembopa ucai rene catu. Esepia, setá ava yugüerura, ‘Che niha Poropĩsĩrosar aico, cũritei osupitĩ ari imombehupri yandeu’ ehi tẽira yuvireco. Ndaperoyai chira rumo ava aipo ehi vahe.

<sup>9</sup> Acoi peyanduse vavasa iyavei tecua pipendar oyeupe vavase, ndapeyembosiquiyei chira rumo serãcua anduse ichui. Evocoi nungar rane ité niha oimera. Ndehi vitei chira rumo ari cañi” ehi.

<sup>10</sup> “Ñepei ivi pipendar ovavara ambuae ivi pipendar rese oyeupe yuvireco.

<sup>11</sup> Ahese avei oimera ivi ririñi tuvichá vahe, tiavor, mbaherasisa opacatu-catu tẽi tecua rupi. Iyavei pesepiara iva rese mbahe pe mbosiquiye vahe, poromondiisa tuvichá vahe avei curi.

<sup>12</sup> “Co mbahe-mbahe tẽi reime renondeve rumo pe pisira yuvireco che recocuer sui mara-mara tẽi pe rereco ãgua. Pe reraso aveira pẽu porandu ãgua tũparove, pe roquenda aveira, iyavei pe rerasora mborerecuar rovai, mborerecuar ivate catu vahe rovai avei yuvireco che recocuer sui tẽi.

<sup>13</sup> Ipipe pemombehura che recocuer chupe yuvireco.

<sup>14</sup> ‘Aipo ahera añehe’ ndapeyei chira pepihañemoñeta rereco pe yeepi ãgua.

<sup>15</sup> Esepia, che amondora che mbahecuasa pe ñehe ãgua. Ndoicatui chietera evocoyase pe amotarẽhimbar imboyevi yuvireco pẽu.

16 Pe amotarēhira rumo pe yesupa, pe mu, pe rivri, pe riqehir, pe mboripar avei. Iyavei oyucara amove pe pāhu pendar yuvireco.

17 Opacatu ava ndape ambotai chira che recocuer sui tēi yuvireco.

18 Nocañi chietera rumo que ñepei pe ha pe āca sui.

19 ¡Peyemoviracua evocoi nungar mbahe upe pe ñepisiro āgua!

20 “Iyavei pesepiase ava Jerusalén rese sundao oyere tuprise, peicua evocoyase mbahe-mbahe tēi reime āgua yuvireco chupe.

21 Evocoyase Judea ve yuvirecoi vahe toñemipa poyava voi ivitri rese yuvireco ichui; tecua Jerusalén pipe yuvirecoi vahe, ahe toyuvinose poyava avei ichui. Iyavei acoi que rupi yuvirecoi vahe, ahe toyevi iri eme yuvireco.

22 Esepia, ahe ari oimera Tūpa ñemoirosa. Ahe omboaviyera icuachiapri aracahendar pipe imombehupri.

23 ¡Iparaisu itera ahe ari pipe cuña ipuruha vahe, imembi pītani vahe avei! Esepia, oimera tecoasisa co ivi pipendar upe, ñemoirosa tuvichá vahe ahe ava recocuer rese.

24 Iyavei quise pucu pipe setá ava omanora yuvireco iyavei ambuae setá ava ipisipri serasosara ambuae ivi rese amombrisave. Iyavei ambuae ivi pipendar ava ndahei vahe judío yuvirecoi vahe oiporu itera tecua Jerusalén acoi osupitise voi eté ari imombehupri yuvireco chupe” ehi.

### *Ava Ri qehir yevisa*

25 “Iva rese iporēhira poromondiisa, ari rese, yasi rese, yasitata rese; iyavei ivi pipe, opacatú tecua



rupi ava ndayaracua iri chira yuvireco. Oyembosiquiye guasu-guasu tēi aveira yuvireco para guasu riapugüer renduse.

<sup>26</sup> Ahese ava setá yaracua cañi tēira osiquiyepave yuvireco opihañemoñeta guasu aise co ivi pipe mbahe oime vaheñã sui. Ahese avei iva resendar opacatu mbahe oririira.

<sup>27</sup> Ahese ramo opacatu ava che, Ava Riquehir, che repiara yuvireco, agüeyise iva quiha rese che pĩratasa rendigüer porañetesa pipe.

<sup>28</sup> Omboipise evocoi nungar mbahe, peyemonguerēhi catura, peyemopoase pe querēhisa pipe. Esepia, pe renosesa pihavira mbahe tēi sui” ehi.

<sup>29</sup> Iyavei oporombohe ambuae mbahe rese: “Peicua tupri higuera ivira recocuer, anise que ambuae ivira avei.

<sup>30</sup> Co ivira soqui ramose, yaicua cõimi ari sacu vahe yepota ãgua yandeu yepi.

<sup>31</sup> Na ehi aveira pēu che ñehe rupi tupri mbahe pesepiase. Sese peicua Tũpa mborerecuasa cõimi eté secoise.

<sup>32</sup> “Supi eté yuvirecove vitera ava osepia vahe co mbahe opase yaviye.

<sup>33</sup> Iva, ivi opara ocañi, che ñehengagüer rumo imboaviyesa rane itera” ehi güemimbohe upe.

<sup>34</sup> “Peicua catu, aní pemboavai etepri pe mbahe reroya ãgua mbahe tēi aposa pipe, pe caguar tēisa pipe, co ivi pipendar tecocuer rese pe pihañemoñeta tēisa pipe avei. Evocoiyase toposesapiha eme

<sup>35</sup> inungar ivonde oviapi vahe ahe ari pipe. Esepia, opacatu ava eta upe oimera evocoi nungar

mbahe.

<sup>36</sup> Sese peyemoingatu, peyeroqui ari rupi co mbahe tēi sui pe yepepi āgua, pe yemboyecua tupri āgua che, Ava Riquehir, rovai” ehi güemimbohe eta upe.

<sup>37</sup> Ēgüe ehi Jesús oporombohe ari rupi tūparo guasu pipe. Pītu pipe evocoyase opīta ivitri Olivo rese.

<sup>38</sup> Iyavei opacatu ava yuviraso añihiveive tūparo guasu pipe iñehe rendu āgua yepi.

## 22

### *Yemomborandusa Jesús yuca āgua*

<sup>1</sup> Ovirovise Pascua pieta pan ndayapepoi vahe hu āgua,

<sup>2</sup> ahese pahi rerecuareta, Moisés porocuita rese oporombohe vahe avei ava sui osiquiyepave, oseca-seca tēi Jesús yuca āgua yuvireco.

<sup>3</sup> Evocoyase Carugar oique Judas piha pipe, ahe acoi doce tupri semimbohe pāhu pendar Iscariote serer vahe.

<sup>4</sup> Ahe oso pahi eta rerecuar yuvirecoi vahe upe, tūparo rārosar yuvirecoi vahe upe avei imoñeta āgua, “Tamondo Jesús pe povrive” ehi.

<sup>5</sup> Ahe evocoyase oyemboviharere yuvireco. “Yamondo guarepochi chupe” ehi voi eté yuvireco.

<sup>6</sup> Judas evocoyase, “Aviye” ehi. Oseca voi ava porēhiseve Jesús mondo āgua yamotarēhimbar upe.

### *Yande Yar caru agüer ipa vahe*

<sup>7</sup> Oyepota ari yipindar vahe pan ndayapepoi vahe hu ãgua. Ahe pipeve avei ovesa Pascua pieta resendar yucapri seropovêhesa yepi.

<sup>8</sup> Evocoiyase Jesús omondo güemimbohe Pedro, Juan reseve aipo ehi:

—Peso, tapemoingatu yande caru ãgua Pascua pieta resendar —ehi.

<sup>9</sup> Semimbohe rumo,

—¿Que vo ereipota oromoingatura? —ehi yuvireco chupe.

<sup>10</sup> Evocoiyase aipo ehi:

—Peyepotase tecua pipe, aheve pesepiara mbia vireco vahe cambuchi pipe i. Pesora sêtave supi.

<sup>11</sup> Aipo peyera peñehe oi yar upe: “Ore mbohesar oporandu: ‘¿Uma oi pipe vo Pascua pieta resendar orohura che remimbohe rese?’ ehi” peyera.

<sup>12</sup> Evocoiyase ahe omboyecuara oi guasu, ivatendar pẽu. Aheve pemoingatura yande caru ãgua —ehi güemimbohe upe.

<sup>13</sup> Ipare ahe yuviraso, semimombehu rupi tupri ité osepia mbahe. Aheve omoingatu carusa Pascua pieta resendar yuvireco.

<sup>14</sup> Osupitise icaru ãgua apóstol reseve yuviroguapi mesave.

<sup>15</sup> Evocoiyase aipo ehi:

—¡Cueseve tẽi eté niha aipota acarú vaheerã pe piri Pascua pieta resendar rese che mano ãgua renonde!

<sup>16</sup> Esepia niha, ndayapo iri chira pieta Pascua resendar acoi yaviyese voi eté Tũpa mborerecuasa pipe —ehi.

17 Evocoiyase oipisi igua riru, “Aviye ndeu” ehi Vu upe, iyavei aipo ehi:

—Co amondora pẽu, perova-rova peyacatu.

18 Esepia, co pipe suive ndaihu iri chira uva ricuer acoi ouse voi Tũpa mborerecuasa —ehi.

19 Ipare oipisi pan, “Aviye ndeu” ehi Vu upe. Aipo ohe pare ombohi-mbohi imondo güemimbohe upe.

—Co che rete, omboyecua imondopirã pe recocuer rese. Na peyera pe mahenduhasa pipe che rese yepi —ehi.

20 Ëgüe ehi avei carusa pare yapo igua riru rese aipo ehi:

—Co igua riru pipendar omboyecua che Ru remimbotar ipiasu vahe pẽu nara, ahe che ruvi ipiyerepirã pe recocuer rese nara.

21 Cũritei rumo oime mbia mesave yande piri che mondo vaheerã che amotarẽhimbar upe.

22 Supi eté imboaviyesa itera che, Ava Riquehir, rese ñehesa yipive imombehupri. ¡Iparaisu catura rumo acoi mbia che mondosar! —ehi.

23 Evocoiyase aipo ehise, semimbohe oporandurandu tẽi oyeupe: “¿Ava pĩha ãgüe ehi?” ehi tẽi yuvireco.

*¿Ava vo ivate catu vahe?*

24 Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ ohesave yuvireco.

25 Evocoiyase Jesús aipo ehi: “Ava mborerecuar co ivi pipendar oyocuai pĩrata ava yuvireco yepi. Ahe chupe rumo, ‘Mbahe tupri aposar’ ehi yuvireco.

26 Pe rumo ãgüe ndapeyei chira. Acoi oyemboivate pota vahe, toyemochihivaheño güeco mbegüesa pipe. Acoi ava cuaisar, tihañeco catu ambuae ava rese.

27 ¿Uma pñha ivate catu vahe: co mesave oguapí vahe ocaru yuvireco? ¿Sese ihañeco vahe tie? Acoi mesave oguapí vahe niha. Che rumo co aico pe pñhuve inungar pe rese ihañeco vahe.

28 “Pe rumo peico vahe che rupi yepi opacatú che recoãhasa pipe.

29 Sese che amondo pñu pe mborerecuasa inungar che Ru ombou cheu che mborerecuã ãgua.

30 Esepia, pecarura iyavei peihura che mborerecuasave che pñri. Iyavei peguapira opacatu judío recocuer rese porandu ãgua” ehi güemimbohe upe.

*Jesús, “Ndaicuai vahe evocoi mbia’ erera cheu” ehi Pedro upe*

31 Aipo ehi avei yande Yar:

—Simón, Simón, esendu: Carugar oporandu pe recoãha ãgua rese.

32 Che rumo ayeroqui nde rese nde yeroyasa paneñhi ãgua. Ereyevise cheu, emonguerñhi catu ambuae nde rivireta imoviracua uca ãgua yuvireco oyese —ehi Pedro upe.

33 —Che Yar, che rumo ayemoingatú voi eté nde rupi che so ãgua nde roquendasave iyavei che mano ãgua nde rupi —ehi Pedro chupe.

34 —Pedro, supi eté amombehu ndeu: co pipe, tacura ñehe renondeve, nde, “Ndaicuai eté evocoi mbia” erera mbosapí oyupagüer rupi cheu —ehi.

*Virovi ité Jesús recoãha ãgua*

35 Evocoiyase Jesús oporandu güemimbohe eta upe:

—Opomondose acoi mbahe riru porēhi, guarepochi riru porēhi, ambuae pe pitaqui ndugüer rerasoēhise, ¿ipane vo acoi mbahe ahese pēu? — ehi.

—Aní eté —ehi yuvireco chupe.

36 Evocoiyase,

—Cūritei, acoi mbahe riru vireco vahe, tovirecoveño, guarepochi riru vireco vahe, tovirecoveño avei; acoi ndovirecoi vahe quise pucu, tomondo oyeaosa quise repirã.

37 Supi eté amombehu pēu: iyacatu ité imboaviye tupri ãgua co che rese ñehesa imombehupri aipo ehi vahe: ‘Ava vireco ndaseco pōrai vahe nungar yuvireco’ ehi vahe. Supi eté yaviyera co icuachiapirer che resendar —ehi.

38 Evocoiyase semimbohe aipo ehi yuvireco:

—Ore Yar, cohave oime ñuvirío quise pucu —ehi.

—Ahe güeraño ité aviye —ehi güemimbohe eta upe.

### *Jesús oyeroku Getsemaní ve*

39 Ipare Jesús osē oso ivitri Olivo ve. Ahe ivitrive oso yepi, aheve semimbohe yuviraso yuvireco supi.

40 Oyepotase aheve yuvireco, Jesús aipo ehi güemimbohe upe:

—Peyeroqui angaipa pe yapoēhi ãgua —ehi.

41 Ipare oyepipi güemimbohe sui, inungar ita imombosa vahe amombrimi, aheve oñenopiha, oyeroku

<sup>42</sup> aipo ehi: “Che Ru, ereipotase, che renose eve co mbahe tēi sui; tayapo eme che remimbotar tēi, nde remimbotar rupira rumo” ehi.

<sup>43</sup> Evocoyase oyemboyecua Tūpa rembiguai chupe, seco momirata āgua.

<sup>44</sup> Mbahe-mbahe tēi porarasa pipe oyeriqui catu. Ahese sacuvor inungar tuvi osē ichui otiqui ivive.

<sup>45</sup> Oñarapuhase oyeriquisa sui, oyevi oso güemimbohe uve. Ahe rumo opaño yuviroque yuvirocua oviharēhisa pipe.

<sup>46</sup> Evocoyase,  
—¡Mahera opaño peque! Peñarapuha, peyeroqui catu pe viapiēhi āgua mbahe tēi pipe —ehi güemimbohe upe.

### *Jesús oipisi yuvireco*

<sup>47</sup> Jesús ñehe viteseve, oyepota ati ava yuvireco chupe. Judas doce semimbohe pāhu pendar tenonde secoi. Ahe oyemboya oso sese sovaupite āgua.

<sup>48</sup> Evocoyase aipo ehi Judas upe:  
—Judas, ¿mahera vo che, Ava Riquehir, rovaupitesa pipe che mondo eve che amotarēhimbar upe? —ehi.

<sup>49</sup> Semimbohe eta rumo, mbahe-mbahe tēi repiase, oporandu yuvireco:

—Ore Yar, ¿yavavara yande quise pucu pipe? —ehi yuvireco chupe.

<sup>50</sup> Ñepe rumo supindar, pahi rerecuar ivate catu vahe rembiguai nambi yasu cotindar oyasia.

<sup>51</sup> Ahe rumo,  
—Teheni, evocoi rupive —ehi güemimbohe eta upe.

Ipare opoco inambi rese ombogüera voi.

<sup>52</sup> Ichuí aipo ehi güecasar opacatu pahi eta rerecuar upe, tũparo rãrosar upe, tecua pipendar rerecuar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco peye?

<sup>53</sup> Aicose tũparo pipe pe pãhuve ari yacatu rupi, na ndapeyapoi eté co nungar cheu. Aviyeño rumo, oyepota ité niha pẽu imombehupri Carugar pĩratasa pipe mbahe-mbahe tẽi apo ãgua —ehi.

*Pedro, “Ndaicuai vahe evocoi mbia” ehi Jesús upe*

<sup>54</sup> Evocoiyase Jesús oipisi yuvireco, oviraso pahi eta rerecuar ivate catu vahe rõtave yuvireco. Pedro rumo amombri rupive tẽi osaquicue moñaño oso.

<sup>55</sup> Aheve ñachimbri pipe oyatapi yuvireco, oyere tupri tata rese oyepehe yuvinoi. Aheve avei Pedro ipãhuve chini.

<sup>56</sup> Evocoiyase cuña mbiguai, osepiase Pedro, omahe tupri iri sese aipo ehi:

—Co ava avei niha acoi Jesús rupindar —ehi.

<sup>57</sup> Ahe rumo aipo ehiño:

—Cuña, ndaicuai vahe ité ahe mbia —ehi.

<sup>58</sup> Iparemi tẽi ambuae osepiase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tẽi, ndahei eté rumo che supindar aico —ehi.

<sup>59</sup> Ñepei hora paremi tẽi, ambuae aipo ehi chupe:

—Supi eté rumo co ité supi secoi vahe. Esepia, Galilea iguar ité niha —ehi.

<sup>60</sup> Sese aipo ehi:



—¿Mbahe vo catu aipo nde ñehesa? Ndasendu-  
cuai eté —ehi.

Aipo ihe viteseve, oñehe tacura.

<sup>61</sup> Evocoiyase yande Yar oyemboyere sese. Ahe  
ramoseve oyemomahenduha: “Co pīpe tacura  
ñehe renondeve, ‘Ndaicuai vahe’ erera mbosapi  
oyupagüer rupi cheu” ihe agüer rese.

<sup>62</sup> Ahese osê, oyasehó iteanga oso.

*Sãrosar mara-mara tẽi Jesús vireco yuvireco*

<sup>63</sup> Evocoiyase ava Jesús rãrosar iguayĩ tẽi  
yuvirocua-rocua yuvireco sese.

<sup>64</sup> Osesacua yuvireco. Ipare oporandu yuvireco  
chupe:

—¡Eicua ité ru, ava evocoi ocua nde rese! —ehi  
yuvireco chupe.

<sup>65</sup> Iyavei setá mbahe rese oñehe-ñehe tẽi  
yuvireco chupe.

*Jesús serasosa ava ñemonuhasa ivate catu vahe-  
save*

<sup>66</sup> Ahe ari pīpe, cõhese, oñemonuha ava judío  
rerecuar, pahĩ eta rerecuar iyavei opacatu Moisés  
porocuaite rese oporombohe vahe yuvireco Jesús  
reraso uca ãgua ava ñemonuhasa ivate catu vahe-  
save, oporandu mbahe rese yuvireco chupe:

<sup>67</sup> —¿Supi eté vo nde Poropĩsirosar ereico?  
Emombehu ru oreu —ehi yuvireco chupe.

—Amombehuse rumo pẽu, ndache reroyai chi-  
etera peye —ehi judío rerecuar upe—.

<sup>68</sup> Inungar che aporanduse mbahe rese pẽu, pe  
avei ndapemboveyĩ chietera cheu viña no.

<sup>69</sup> Co pipe suive rumo che, Ava Riquehir, aguapira Tūpa mbahe mboavaisarēhi acato coti —ehi.

<sup>70</sup> Ichui opacatu ava oporandu yuvireco chupe:  
—Evocoyase, ¿nde ité ereico Tūpa Rahir? —ehi.  
—Supi eté niha aipo aipo peye cheu —ehi mborerecuāreta upe.

<sup>71</sup> Evocoyase ahe aipo ehi yuvireco:  
—¡Indó! ¿Ava iri vo evocoyase mbahe omombehura yandeu? Yasendu niha iñehe ité cute —ehi mborerecuar oyeupe yuvireco.

## 23

### *Jesús serasosa mborerecuar Pilato rovai*

<sup>1</sup> Evocoyase opacatu ava opūha yuvireco Jesús reraso āgua mborerecuar Pilato rovai.

<sup>2</sup> Aheve oiñhengapo aipo ehi yuvireco:  
—Orosepia co mbia oipihañemoñeta rerova ati uca ava yande recua rupindar aipo ehi: “Pemondoi rene Roma pendar mborerecuar ivate catu vahe upe guarepochi” ehi. Iyavei, “Che Poropĩsirosar mborerecuar ivate catu vahe aico” ehi oico —ehi yuvireco Pilato upe.

<sup>3</sup> Evocoyase Pilato oporandu chupe:  
—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboyevi Pilato upe.

<sup>4</sup> Evocoyase Pilato aipo ehi pahi eta rerecuar upe opacatu ava upe avei:

—Che rumo namohai eté co mbia que mbahe oyapo vaherã —ehi

<sup>5</sup> Ahe ava eta rumo,

—Supi eté opacatu ava oipihañemoñeta mboyeaviratí uca opacatu tecua rupindar. Yipindar omboipi Galilea rupi oico. Cûritei co Judea ve ãgüe ehiño ité —ehi ava eta Pilato upe yuvireco.

*Jesús imondosa mborerecuar Herodes rovai*

<sup>6</sup> Pilato osenduse aipo ñehesa oporandu, “¿Supi eté pñha co mbia Galilea iguar?” ehi.

<sup>7</sup> “Ahe pendar ité” ehise yuvireco chupe, ahese omondo Herodes upe, ahe acoi mborerecuar Galilea rupindar. Ahese avei secoi Jerusalén ve.

<sup>8</sup> Herodes sorivete Jesús repiase. Esepia, setá ari osepia pota tñi serãcua anduse yepi. Evocoyase oipota ité poromondiisa oyapo vaherã oyeovaque viña.

<sup>9</sup> Sese oporandu ati mbahe rese chupe. Nomboyeví eté rumo Herodes upe.

<sup>10</sup> Aheve opacatú pahi eta rerecuar iyavei Moisés porocuita rese oporombohe vahe eta seroĩrosave oñemoñeta-ñeta tñi sese Herodes rovaque yuvireco.

<sup>11</sup> Evocoyase Herodes osundao eta reseve iñehe mara-mara tñi Jesús upe sese oguayí tñisa pipe yuvireco. Omboyemonde avei turucuar iporañete vahe pipe yuvireco. ãgüe ehi imboyeví Herodes Pilato upe.

<sup>12</sup> Ahe ari pipe suive oyembori Pilato Herodes rese. Ndoyeambotai vahe tie yipindar yuvireco viña.

*“¡Tayaticasa!” ehi Jesús upe yuvireco*

13 Evocoiyase Pilato opa uca omonuha opacatu pahi eta rerecuar, judío rerecuareta, opacatu ava eta avei.

14 Ipare aipo ehi chupe:

—Pe niha peru co mbía cohawe cheu, ‘Omañeco tẽi ava secua rupi’ peye. Che rumo aporandu tẽi pe rovaque mbahe rese chupe. Ndipoi eté rumo mbahe sembiapo naporai vahe pe remimombehu rupi.

15 Herodes avei, ‘Ndipoi mbahe sembiapo naporai vahe imano ãgua’ ehi. Sese omboyeviño Jesús imbou cheu.

16 Ainupa ucara rumo. Ipare amoseñora —ehi Pilato.

17 Pascua pieta pipe iya ité Pilato ava upe ñepeí soquendapri mose ãgua.

18 Opacatú guasu rumo ava oñehe pĩrata yuvireco aipo ehi:

—¡Co topitaño oreu! ¡Barrabás emoseño! —ehi ava eta Pilato upe.

19 Co mbía Barrabás tecua pipe mbahe tẽi mopuhasa sui iyavei oporapichisa sui oyeoquenda uca vahe.

20 Pilato rumo omose pota Jesús viña. Sese oporandu iri ava upe imose ãgua.

21 Ahe rumo osapucaí pĩrata catu yuvireco:

—¡Aní, tayaticasa! ¡Tayaticasa curusu rese! —ehi ati-atiño yuvireco.

22 Imombosapisa rese Pilato oñehe iri:

—¿Mbahe ité vo oyapo naporai vahe? Ndipoi eté niha que mbahe sembiapo yuca ãgua, ainupa uca tẽira rumo. Ipare amoseñora —ehi.

23-24 Ava rehii rumo osapucaí pĩratá catu yuvireco, “Tayaticasa ité” ehi-ehiño yuvireco. Sese chupe, “Tayaposa evocoyase semimbotar yuvireco” ehiño Pilato ava eta upe.

25 Ëgüe ehi imose co mbia Barrabás, acoi soquendapri mbahe-mbahe tẽi mopuhasa sui, iporapichisa sui avei ava remimbotar rupi. Ipare omondo Jesús sãrosar upe ava remimbotar apo ãgua sese.

### *Jesús yaticasa curusu rese*

26 Oime mbia Simón serer vahe Cirene iguar ou vahe que co coti rupi sui. Ovirasose Jesús yuvireco yatica ãguave, ahe mbia upe, “Nde terevosii curusu rese Jesús raquicuei” ehi voiño tẽi yuvireco.

27 Ava rehii yuviraso saquicuei. Cuña avei setá oyaseho oviharẽhisave yuvireco sese.

28 Omahese rumo cuña rese aipo ehiño chupe:

—Cuña Jerusalén iguar, peyasehoi rene che rese. Peyese ae peyaseho, pe membri rese avei.

29 Esepia, oura ari naporai vahe. Ahese aipo peye tẽira: ‘Aviye catu acoi cuña nimembii vahe iyavei ndoicuai vahe imocambu omembri’ peye tẽira.

30 Ahese avei ava ivitri uve aipo ehira yuvireco: ‘¡Toviapi ore harive!’ ehira osiquiyepave. Iyavei ivivate vahe upe: ‘¡Tore mi!’ ehi tẽira yuvireco.

31 Esepia, ãgüe ehise ivira yivive vitesse, ¿mara ehira vo catu oipise? —ehi cuña eta upe.

32 Iyavei viraso ñuvirio mbia ndaseco põrai vahe supive yaticapirã yuvireco.

33 Oyepotase Ava Ñca Cangüer serer vahesave, aheve oyatica curusu rese yuvireco. Iyavei oyatica

ñuvirío mbia, ñepi mbahe rese ipocosa coti, ambuae evocoyase mbahe rese ipocoëhisa coti.

<sup>34</sup> Ahese Jesús aipo ehi:

—Che Ru, ndeñero co ava upe sembiapo rai rese. Esepia, ndoicuai co mbahe güembaliapo yuvireco — ehi.

Sundao evocoyase iguayíño Jesús turucuar rese oyeupe imbohahoyaho ãgua yuvireco.

<sup>35</sup> Ava rehi osepia yuvireco; mborerecuareta avei seroïrosave aipo ehi yuvireco chupe:

—Oipísiro ambuae ava, toñepísiro ru ahe ae ité cute Tüpa Rembiporavo Poropísirosar güecosa pipe — ehi yuvireco.

<sup>36</sup> Iyavei sundao seroïropare omondo vinagre itoihu yuvireco,

<sup>37</sup> iyavei aipo ehi yuvireco chupe:

—¡Nde niha aipo ava judío eta rerecuar guasu ereico! ¡Eñepísiro ru nde ae ité! — ehi sundao eta yuvireco chupe.

<sup>38</sup> Curusu rese ñaca harive icuachiapri aipo ehi oï: “Co judío rerecuar guasu” ehi.

<sup>39</sup> Evocoyase ndaseco pōrai vahe yaticapri iñehe mara tēi chupe aipo ehi:

—¡Nde Poropísirosar ereicose, eñepísiro ru nde ae, ore avei ru ore písiro eve! — ehi chupe.

<sup>40</sup> Ambuae evocoyase aipo ehi voi ondugüer uve:

—¿Nderesiquiyeimi rutei vo Tüpa sui? Nde avei niha ocañi tēi vaheerã.

<sup>41</sup> Yande rumo co yande rembiapo sui tēi mara mara tēi yande rereco yuvireco; co mbia rumo mbahe sembiapoëhi pipe sui tēi na ehi serecosa — ehi ondugüer upe.

42 Evocoyase aipo ehi iri:

—Jesús, che paraisuerecomi tēi eve nde eremboipise nde mborerecuasa —ehi.

43 Evocoyase omboyevī chupe:

—Supi eté co pīpe ereicora tecua apirēhi vahe-save che rupi —ehi Jesús ahe mbīa upe.

### *Jesús mano agüer*

44 Osupitise rumo mbīter ari, opa tupri pītu ivi rupi; las tres pīpe rumo opa icatu.

45 Ari avei ogüe tupri, turucuar guasu tūparo asiāsa avei mbīter rupi tupri ovo.

46 Evocoyase Jesús oñehe pīrata:

—¡Che Ru, amondo che espīritu ndeu! —ehi.

Aipo ohe pare voi omano.

47 Evocoyase Roma iguar sundao rerecuar osepiase co mbahe poromondiisa Tūpa mboeteisa pīpe aipo ehi:

—Supi eté co mbīa ndaseco marai vahe —ehi.

48 Iyavei opacatu ava supindar yuvirecoi vahe osepiase co nungar mbahe, oyepochiha nupana tēi oyepīhamondiisa pīpe yuvireco.

49 Opacatu avei ava oicua vahe Jesús, ipāhuve cuña Galilea sui yugüeru vahe, osepiāño tēi amombrive co nungar mbahe yuvireco.

### *Jesús apocatu agüer tuvīpa pīpe*

50-51 Oime mbīa aviye etepri vahe, ahe serer José, tecua Arimatea pendar. Ahe tecua ivi Judea pīpendar, judío rerecuar ñemonuhasa ivate catu vahe pendar secoi. Ahe mbīa vīroya vahe ité Tūpa ombou vaherā omborerecuasa pīpe mbahe moingatu āgua. Sese ndahei ipīhañemoñeta rupi

co mborerecuar oyapo vahe mbahe Jesús upe yuvireco.

<sup>52</sup> Evocoyase ahe oso Pilato rêtave oporandu ãgua Jesús rehõgüer rese.

<sup>53</sup> Curusu sui seroyi pare voi, oimama turucuar secose vahe pipe, ipoyava imondo tuvipa pipe ita guasu yohopri ndiporusa vitei vaheve yuvireco.

<sup>54</sup> Esepia, ahe ari omoingatu mbahe mbituhusa ari upe nara, ahe mbituhusa rumo osupiti pota ité.

<sup>55</sup> Cuña yugüeru vahe Jesús rupi Galilea sui, yuvirasoño ité suvipave, osepia sehõgüer apocatusé yuvireco.

<sup>56</sup> Oyevise güètave yuvireco omoingatu mbahe sãacua vahe tehõgüer resendar ipichi ãgua.

## 24

### *Jesús ocuerayevi*

Ahe cuña opituhu mbituhusa ari pipe judío porocuaíta reroyasave yuvireco. <sup>1</sup> Cõhe ramomise domingu pipe, oyevi yuviraso tuvipave mbahe sãacua vahe reseve.

<sup>2</sup> Oyepotase yuvireco tuvipave, osepia soquendasa ita guasu ndipo irise güendagüerve.

<sup>3</sup> Evocoyase yuviroique voi tuvipa pipe. Ndoyosui rumo yande Yar rehõgüer yuvireco.

<sup>4</sup> Ndoyembovıhai tēi; ndoicatu iri. Ahese aviyeteramo tēi osepia ñuvirío mbıa iturucuar sendı vahe oıpıve yuvireco.

<sup>5</sup> Opaño ñaca ivıso ivı cotı yuvireco osıquıyepave. Evocoyase co mbıa aıpo ehi yuvireco chupe:

—¡Mahera peseca tuvipa pãhu rupi ava oıcove vahe!



6 Ndipoi mo cohave; ocuerayevi mo ahe. Peyemahenduha ñehengagüer ivi Galilea rupi omombehu vahecuer rese,

7 “Che, Ava Riquehir, imondopirira ava angaipa viyar povrive, iyavei che aticara curusu rese yuvireco. Mbosapi ari pare rumo acuerayevira” ehi acoi —ehi cuña upe yuvireco.

8 Evocoyase cuña oyemomahenduha voi Jesús ñehengagüer rese yuvireco.

9 Oyevise tuvipa sui yuvireco, omombehu opacatu co once apóstol yuvirecoi vahe upe, opacatu ambuae upe avei.

10 Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago si María iyavei ambuae cuña eta no.

11 Apóstol upe rumo oyeupe mombehuse aviye aipo ehi tēi vahe; ndoviroyai eté yuvireco.

12 Pedro rumo yandu ramoseve voi, osē, oña oso tuvipave. Omahese tuvipa pipe, turucuar güeraño osepia co cotimi tuisse. Evocoyase oyepihamondii tēi ‘¿mara ehi rutei pīha?’ oya oyevi oive oso.

*Jesús oyemboyecua ñuvirío güemimbohe upe tecua Emaús piar rupi*

13 Ahe ari pipeve caharuse, ñuvirío semimbohe yuviraso tecua Emaús ve. Ahe once kilómetro tecua Jerusalén sui.

14 Ahe peri rupi oñemoñeta yuviraso opacatu co mbahe oime vahecuer rese.

15 Oñemoñeta vitesese, Jesús teieté oyemboya sese, oguata supi.

16 Yepe osepia tēi, ahe rumo ndoyepiacua ucai eté chupe.

17 Evocoyase Jesús oporandu chupe:

—¿Mbahe rese vo pe ñehe etepri pe guatasa rupi peico? —ehi.

Aipo hese, opita, ndovihai yuvinoha.

18 Ipãhu pendar Cleofas serer vahe omboyeve chupe:

—Nde güeraño revo Jerusalén ve ereico vahe ndereicuai mbahe oime vahe tecua pipe —ehi.

19 Evocoyase,

—¿Mbahe vo oime yandeu? —ehi.

—Jesús mo Nazaret pendar, ahe Tũpa ñehe mombehusar seco pĩrata vahe opacatu mbahe apo ãgua, mbahe mombehu ãgua avei Tũpa rovaque iyavei opacatu ava rovaque.

20 Omondo pahĩ rerecuar iyavei yande rerecuareta yamotarẽhisave yuca uca ãgua curusu rese yuvireco.

21 Ore rumo oroyeroya ité sese. “Ahe yande pĩsirora yande amotarẽhimbar sui” orohe chupe viña. Cũritei rumo opa mbosapĩ arĩ yucare.

22 Ore pãhu pendar cuña ndore mbovihai eté oyeveise suvipa sui yuvireco. Esepia, yipindar yuvirasose añihiveive tuvipave,

23 ndoyosui eté sehõgüer yuvireco. Ahese aipo osepia Tũpa rembiguai aipo ehi vahe yuvireco chupe: “Jesús mo oicove cũritei” ehi. Ahe evocoyase yugüeru imombehu oreu.

24 Iyavei ambuae ore ndugüer yuvirasose tuvipave cuña remimombehu rupi tupri avei. Ndosepiai eté rumo Jesús yuvireco —ehi Cleofas chupe tupri ité.

25 Evocoyase aipo ehi ahe ñuvirío mbia upe:

—¡Ndapeicuai eté rumo pe p̄iha pipe seroya tupri ãgua opacatu Tũpa ñehe mombehusar remi-mombebugüer!

<sup>26</sup> ¿Ndapeicuai vo Porop̄ĩsirosar iparaisu rane itera mbahe-mbahe t̄ei virecosa pipe güecua porañetesave güeique ãgua renondeve? —ehi.

<sup>27</sup> Ipare opa omombehu icuachiapri Moisés cuachiar pipendar iyavei opacatu Tũpa ñehe mombehusar cuachiar pipendar oyese ñehe agüer.

<sup>28</sup> Oyepotase ahe tecuave yuviraso, Jesús rumo aviye oguataño vite vaheñã senonde.

<sup>29</sup> Co mbia rumo oñehe yuvireco chupe:

—Epitaño ore p̄iri, caharu etepri. P̄itura moco ndeu —ehi yuvireco chupe.

Evocoyase oique, opitaño ip̄iri yuvireco.

<sup>30</sup> Oguapise yuvinoi mesave, oip̄isi pan, “Aviye ndeu” ehi Tũpa upe. Ipare ombohi co ñuvirio mbia upe imondo.

<sup>31</sup> Ahese voi semimbohe omahecua ramo yuvireco sese, ahe rumo c̄uriteimi ndoyemboyecua iri sovai chupe.

<sup>32</sup> Evocoyase aipo ehi oyeupe yuvireco:

—Yande mbopihañemoñeta p̄iratami eté peri rupi oñehese yandeu co tecocuer icuachiapri rese —ehi yuvireco.

<sup>33</sup> Ipare ndop̄ita pucu iri; oyeviño voi yuviraso tecua Jerusalén ve. Aheve osepia once tupri vahe apóstol, omboetasa avei.

<sup>34</sup> Ahese oñemonuha vahe aipo ehi yuvireco:

—Supi eté rumo yande Yar ocuerayevi. Esepia, oyemboyecua ité Simón upe —ehi.

<sup>35</sup> Evocoyase ahe avei omombehu, “Oreu avei oyemboyecua oroguatase peri rupi. Ombohise

pan ore piri, ahese ramo oroicua” ehi yuvireco omboetasa upe.

*Jesús oyemboyecua güemimbohe eta upe*

<sup>36</sup> Ahe oñehe vitesese yuvireco co tecocuer rese, ahese Jesús oyemboyecua chupe aipo ehi:

—Avirave, mbahe tupri pipe tapeico —ehi güemimbohe eta upe.

<sup>37</sup> Ahe rumo oyembosiquiye guasu yuvireco ‘hãgüer revo’ oyapave.

<sup>38</sup> —¡Mahera pesiquiye! ¡Mahera pereco vite pe poreroyaẽhisa pe piha pipe!

<sup>39</sup> Pemahe che po rese, che pi rese avei. Che ité niha co aico. Pepoco ru che rese. Tache reroya ru peye. Esepia, ava hã ndovirecoi voho iyavei ocangüer; che rumo areco ité —ehi güemimbohe eta upe.

<sup>40</sup> Aipo ohe vitesese omboyecuapa opo, opi avei chupe.

<sup>41</sup> Ahe rumo vorivetesa pipe iyavei oyepihambosiquiye vitesa sui ndoviroya tupri vitei eté yuvireco. Evocoyase aipo ehi:

—¿Perecomi vo mbahe yande caru ãgua? —ehi güemimbohe upe.

<sup>42</sup> Evocoyase omondo pira apiremi oyi vahe yuvireco chupe.

<sup>43</sup> Ipare oipisi, ohu opacatu güemimbohe rovaque.

<sup>44</sup> Ipare aipo ehi:

—Co rese acoi añehe vichico cuese pe rese aico vitesese che mano renondeve. Yaviye ranera opacatu ñehesa che resendar Moisés porocuita cuachiapri pipe, iyavei Tũpa ñehe mombehusar

yuvirecoi vahe rembicuachiagüer pipe, Salmo pipe avei —ehi.

<sup>45</sup> Ëgüe ehi evocoyase opacatu osenducua uca aracahendar icuachiapirer güemimbohe upe

<sup>46</sup> aipo ehi:

—Co icuachiasa Poropĩsirosar iparaisura omano ãgua. Ipare mbosapi ari pare ocuerayevira.

<sup>47</sup> Jerusalén sui tupri opacatu ivi yacatu rupi imombehusara serer pipe, “Pemboasi pe angaipa, peyevi Tũpa upe pẽu ñeroi ãgua” hesara.

<sup>48</sup> Pe niha peico opacatu co nungar mbahe repi-  
asar imombehu ãgua.

<sup>49</sup> Che amboura che Ru remimombehu pe harive. Pepitañora rumo cohave tecua Jerusalén ve acoi peipisise voi pĩratasa iva suindar —ehi güemimbohe eta upe.

*Ivave Jesús so agüer*

<sup>50</sup> Evocoyase Jesús yuvinose tecua sui yuviraso tecua Betania popive. Aheve ñuvirio opo omop-  
uha, osovasa mbahe tupri reime ãgua chupe.

<sup>51</sup> Ipare oyepepi güemimbohe sui. Ahe ramoseve serasosa ivave.

<sup>52</sup> Semimbohe evocoyase osapucai imboetisave. Ipare oyevi Jerusalén ve vorivetesa pipe yuvireco.

<sup>53</sup> Iyavei ahe ari yacatu rupi yuviraso tũparo guasu pipe osapucai Tũpa mboetisave yuvireco yepi. Aipo rupive.

**Tũpa Ñehengagüer**  
**New Testament in Guarayu (BL:gyr:Guarayu)**

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 18 Apr 2025 from source files  
dated 29 Jan 2022

c27c2d97-c359-59f5-b367-83efb2e33739